

RAFUDOO AKARAFa

Isipa maqannaasa Isaraee maqannaasa mandaikamma nimaqaqau.

¹ Yakooboona amaaku oondamara misa faqa Isipa maqusai ooqu fusa misa nuqu maaqimminoo maridanoo. ² Reeubeenafa faqa Simeeoonafa faqa Reefifa faqa Yudafa faqa ³⁻⁴ Isakarafa faqa Seeburunafa faqa Beensaminafa faqa Dannaafa faqa Napatarifa faqa Kadaafa faqa Aseerafa faqa minamusa faqa misa faiqinamu faqa nari nikoona ninaakuna faqa Isipa maqa maaqaki ooqu fiqau. ⁵ Moodaanaki ruqauiga ooqu fusa qaaramoo fasiqa niku nisauku taikasee moo fasiqa asaukuqara kai taikasee 70 Isipa maqa maaqaki ooqu mariqau. Yooseefaafa ooqai miqoo maruqoo marinau.

⁶⁻⁷ Miqoo mariiufaqa Yooseefaafa faqa nari afasausamara faqa aiqama mi akiiqausa kuqu taikafufaqa misa faiqi namu niku nisauku findifufaqa faiqi moomoo uqanna maqasoofaqa kambiqaqau. Kambiqafiqa Isipa maqa maqa umbiqamma aqiqa mariqau. ⁸ Faraofa Isipa maqannaa rakisirafa kuqufufanoo kisaagasaa marinoo fuka moo Faraofa kambiqanau. Mifa Yooseefaanara faqa aandaroo aukuana rakisiiunara faqa mina aiku asaukuara faqa sia irinai. ⁹ Faraofa nari maqannaasa qimannimino qinai. Isaraee maqannaasa moomoo uqanna maqa maqa

umbiaqa mariafaqa maasa uridaaqaramaseeqa maasa rafaafaqa qimaqeefaara. ¹⁰ Rakirafa kambiqainaqa misa maasa namuqaa faqa moodaanaki kammafi maasa darusee quqasee sandee foora. Inni saimbaqa naqiffee mandee oonumafi irisee misa rafaafaqafusaanaqee misa sia moomoo kambiqeefaree.

¹¹ Miqi qimasooafa Isipa maqannaasa Isaraee maqannaasa karafusa saika nimaqau. Afeeka rakisirausa misasaa rakisi mariqau. Isaraee maqannaasa karafusaki maridaqa qaara maqusa auqiqau. Moo maqusa auqu Pitoona maqusa auqusee moo maqusa auqu Raqamaseesa maqusa auqiqau. Mi maqusa qanda narana afeedimaru maqusa qanda mariqau. Qafee maqannai kai maaqa usakeemariqau. ¹² Isipa maqannaasa Isaraee maqannaafaa kafaafaa kafaafaa ummaara nimufaqa moomoo kambiqafiqa maqa maaqa qumbiaqau. Isipa maqannaafaa misa nindafeeqa kaaqa rufiee mariqau. ¹³ Miqunara sia moomoo asumu kambiqaaqeeera firaa kadaapi uqanna misa nimuaafa quqasoofaqa misa manda marira mariqau. ¹⁴ Isipa maqannaasa qufaqa Isaraee maqannaafaa qafee maqa qumaree ausirira ooniara foora moomoo auquseeqa minannai maaqa usakeeqa kafaafaa afuqaki ainaina faqa imariqau. Miqi marufaqa sia Isipa maqannaasa misara qimudaoo qimariqau.

¹⁵ Faraofa mi kadaapirirana Isaraee maqannaafaa nimiseenoo quandaafinoo Isareee maqannaafaa anaasee qaaraqanda Sifaraa nammarisa Puaa nammarisa inaamunai fusasaa rakisimaru anaasee qanda qimanniminau.

16 Inneeqara innaamunai fidaqara dadaaqiqa faiqi maqaseeqa akoonaiqi aiqama aqee uqanna rutukuqa, maanaqa kai kaqi mariaqa. 17 Mi anaaseeqanda Faraona ufa iriseeqara Anutuna ufara rufiseeqa sia akoonaiqiuqa nari mariqau, kaqi mariqau.

18 Faraofa akoonaiqi moomoo kambiqoofanoo nindafamaseenoo innaamunai nifiqaganu aanaaseeqanda naaramaseenoo niqinoo qinai. Inneeqara naqaafee ifaqee sia akoonaiqi naridee qini ufa rukiaafanoo. 19 Miqanda mina ufa iriseeqa qiqa. Heeburu anaasee sia Isipa anaasee naannaraidaqa misa kaqi kaqi faiqi maqaidaqa. Maaqanda oonu raunaqa faasai faiqi maqaqaafaqa oonu nindafaidaqa.

20 Anutufa mi anaaseeqanda oosana nindafamaseenoo amiqi amiqimasoofaqa Israee maqannaasa moomoo kambiqafiqa afeeka maqanna mariqau. 21 Miqanda Anutunara rufioofanoo mina akiqara Anutufa miqanda faqa faiqi asumu niminai.

22 Faraofa misa nindafeenoo nari maqanna Isipa maqanna aiqamausa naaramaseenoo ufa afeeka ufa qimanniminai. Heeburu anaasee akoonaiqi maqasaifaqa innee mina mareeqee nammari firaana Niru nammariqi aqusaifaqa kuquaqa. Aiqama kuquaqera maanaqauqa kai kaqi mariaqera qinai. Miqi qimasoofaqa miqimmi mariqau.

2

Misa sia Mooseena faiqi aanaaqi ariqau.

¹ Mi kamuqoo mi aukuanna Reefina atikiqari kumaaraa moo fannoo findi finoo maanaaqa Reefina oosanaki maranau. ² Maraseenoo faiqi moo akoonaiqi maqaseenoo mina anoofa qafoofoo amiqira faiqi marufanoo Isipa maqannaasa arifoo qimaseenoo qaaramoo quqoonasaa kukeeqa amaqaqoofanoo marinau. ³ Qaaramoo quqoona aiqaroofanoo faiqi aanaaqi kaqikaqoo aqoo irufanoo mina anoofa akoofa rafaqaqfirara oonumafi irusia mina anoofa furaa amanee uqa kisaqa difaaniara fooraa auqinau. Mifa koorootaqa qumareenoo furaa uqamau sia nammari ruqiqaki keeqaanifeera akinau. Uqa auquseenoo mina anoofa faiqi aanaaqi uqaki rumaseenoo furaa moomoo nammari ammausai marunaki kukeeqa qoofanoo minaki marinau. ⁴ Nammariki marufanoo mi faiqina anasaafa nianaindari kukeeqanoo maridanoo rakisi marinau. Nanee kambiqaanoo qimasaidanoo rakisi marinau.

⁵ Faraona araamuna nammari auqaaneera nari rakisimaru manaaqausa faqa mi nammarinai quminau. Mifa nammari auqaidanoo furaaki qafoofoo uqa marinau. Marufanoo qafamaseenoo nari ainaini maru manaaqana qimamufanoo mi uqana nammarikinaana maranau. ⁶ Marasoofanoo Faraona araamuna asaukukinaana maraseenoo uqa oo raqasee faiqi aanaaqi qafanau. Faiqi aanaaqi ikiraqoofanoo mina irufanoo amuqusufanoo qinau. Maafa Heeburu maqannaasa faiqi akoonaiqi maridanoo fee qinau. ⁷ Mifa miqi qimarufanoo mi faiqi anaqina anasaafa anireenoo Faraona

araamuna maaqi qimasee qimaminau. Amanee Heeburu anaasee moo ooru afigee muqusaananoo fee naamma amiannoo fee. ⁸ Faraona araanuna eedoo qufanoo mi faiqi anaqina anasaafa ooru nári ninoona uqanna afigee quminau. ⁹ Qumuroofanoo Faraona araanuna fannoo maaqi qimaseenoo mi anaaseena qimaminau. Anee maa faiqi anaqina naamma amidana rakisi marinaqa qinee maqee maqee feefauru ani ami marianaaranoo. Mi anaaseefa eedoo qimaseenoo narí faiqi aanaaqi uqanna narí maaqai munu qaqee idanoo rakisi marinau. ¹⁰ Mi faiqi anaqifa kaqi kaaqoo innooqafufanoo narí anoofa afigeenoo Faraona araanuna maruqoo minisoofanoo narí faiqi kamambinau. Fuka anoofa auqu rarara maaqi qinau. Qinee nammarikinaana maraunannara auqu Mooseenee qianaara.

Mooseefa Midianna maqusai sandanau.

¹¹ Mariiufanoo Mooseefa innooqafufanoo moo kari narí maqanna Israaee maqannaasa oonu nindafoofaqa firaa kadaapi rimariqau. Isipa maqannaa moo fannoo Heeburu maqannaa Mooseena aqoonnana arimarufanoo Mooseefa qafanau. ¹² Aranaqoofanoo faiqiyara dinni dinni munu afu maqee mini afu maqee ufanoo faiqi sia marufanoo Isipa maqannaa fasiqa Mooseefa kuqa aruseenoo mina iri nukuda afaqaseenoo minaki kukeeqasee akundanau.

¹³ Iqaqoofanoo kananaana rafudamakufanoo Mooseefa narí maqannaa nindafarara kafaa fina. Oonuree nindafoofaqa Heeburu fasiqa

qaaraqanda rakiqau. Mooseefa aqoonnana arimaruna qimaminoo qinau. Anee naqaafee ifanee aneenna aqoonnana oosana siainaki fifau aridanee. ¹⁴ Miqi qufanoo aru fasiqafa qinau. Yafee aniara karaambaiqee qifanee anee maasa ufa irisee andeeqaidanee. Eenda anee Isipa maqanna aruanafa kafa maqee qini faqa darinna-ree qufanoo Mooseefa tautinau. Tautumandee qinau. Doo eenda arunnaara aiqama kooroominoo maridanoommifoo qimaseenoo rufianau.

¹⁵ Faraofa minara iriseenoo Mooseena kuqa aruaneera ufanoo Mooseefa minara rufiamareenoo Isipa maqa maaqa quqasee Midianna maqa maaqai nianai sandanau.

¹⁶ Sandee oonureenoo nammari madika afaisaa oogu marinau. Midianna maqanna amaana maqaki aanaiqikirana mina auqu Yeetaroonaa araamuqmaaka dinni qisauku taikasee dinni oonu qaara marasee 7 mariqau. Mooseefa nammari madika afaisaa marufaqa mi manaaqausa nári nikoona sipsipauqa faqa mimmiuqa faqa nammari saka nimianee qimasee aniraqau.

¹⁷ Faiqí akaqausa nári sipsipasaa rakisimarusa mi manaaqausa niqiqoofaqa anirandee fufaqa misa nári sipsipa naaree nammari nimianeera qufanoo Mooseefa findifinoo misara qaoo qimaseenoo maanaaqauqa naaroofofaqa aniroofanoo Mooseefa narí kai misa sipsipauqa faqa mimmiuqa faqa nammari saka nimiranau.

¹⁸ Mi manaaqausa sipsipauqa nammari neesoofaqa nifiqee maaqai fiqau. Oonu roofanoo misa nikoofa iramirinoo qinau. Innee naqifee

ifaqee maqee faasaanasaa anidee. ¹⁹ Miqi qufaqa misa qiqau. Isipa maqanna fasiqa moo fannoo faiqi sipsipasaa rakisi mariasa oonu raafanoo misara qaoo qimaseenoo maasa sipsipauqa nari kai nammari saka qumaree nimiisaifaqa dauni anidaqa. ²⁰ Misa nikoofa mina irinoo qinau. Mi fasiqafa yaiffee maridanoo fee. Nanaree innee minni aisee anidee. Doo sandee oonu afiqaifanoo narana ani naani. Miqi qimasooafaqa oonu Mooseena afafee aniqau. ²¹ Yeetarooafa Mooseenara qini faqa mariannee qufanoo eedoo qimasee marinau. Marufanoo Yeetarooafa nari araamuna Sipooraa nammarina Mooseena amufanoo maranau. ²² Maraseenoo faiqi akoonaiqi maqanau. Maqaseenoo Mooseefa nari faiqi auqureenoo qinee aanaamuru maqusaki maridee qimaseenoo Keerasoomma nee qinau.

²³ Mooseefa miqoo moomoo aukuanaki marufanoo Isipa maqanna karaambaiqa Faraooafa kuqinau. Kuqufufaqa Isaraee maqannaasa Isipa maqannaasa afeeka rumberana ameemaanai kaqi kai annadannada qidaqa maridaqa Anutufinnai dadaaqianifeera innaaru qimariqau. Misa innaaru qirafa Anutufinnai ooru finau. ²⁴ Anutufa misa qiki raqarana iriseenoo Abarahaamana faqa Isakeena faqa Yakooboona faqa moodaanaki kira ufa qimaqooafa misa faiqinamu faqa dadaaqianifeera oonu mafi irinau. ²⁵ Anutufa misa mandainainaki marufanoo misara oonu mafi irufanoo amuqusinau.

3

Anutufa Mooseena aaranau.

¹ Moo kari Mooseefa narí airaamaku Yeetaroona Midianna maqannaa amaana maqaki aanaiqi kirafa maruna sipsipasaa faqa mimmisaa faqa rakisi marinau. Moo kari Mooseefa narí airaamaku sipsipauqa faqa mimmiuqa faqa nifiqa mareenoo aadana maqa maaqa fiqareenoo Hooreeba naaquqara aaqanasaa muruqoofaqa andanda neemarufanoo rakisi marinau. ² Miqi marufanoo Anutuna qangiroo Mooseena afusaa tautumma amaqaaseenoo kooroomafinoo saqari amimikiqari idauru kambiqanau. Mooseefa mina qafuufanoo idauru firaafa qaidanoo sia mi saqari amimina qanau. ³ Mooseefa mina qafamaseenoo moo ainainammifoo saina aaqa oonuree qafaa, nanaree saqari amimi sia qaidanoo fee qimasee aaqa finau.

⁴ Mooseefa quandakinoo aaqa oonu roofanoo Anutufa minakiqari Mooseena aaraidanoo qinau. Moosee Moosee qufanoo Mooseefa iriseenoo maqi qimaseenoo qinau. Qinee maa maridaqa. ⁵ Miqi qimasoo fanoo Anutufa kafaa qimaminau Moosee sia anee adeedi ania. Aneenna aiku aanaamu raipaqusee miqoo maria. Naaquqara maqa maaqa marinara aneenna aiku aanaamu mara aqua. ⁶ Miqi qimaseenoo Anutufa kafaa qimaminau. Qinee ani akoona Anutusa maridaqa. Abarahaamana faqa Isakeena faqa Yakooboona faqa Anutusa maridaqa. Mooseefa mi ufana iriseenoo Anutuna qafaanoo qimaseenoo rufiaseenoo oorissaa ititanau.

⁷ Anutufa kaifaa Mooseena qimaminoo qinuu. Qini faiqí anaasee Isaraee maqannaasa Isipa maqasaa firaa aupurarana nimi mariafaqa nindafaidaqa. Misa qiniara maasa afeeka rakisira rakisi mariasa nisaukukinaana rafia quqaannee qimasee qini daaree mariafaqa iridaqa. Qinee misa aiqama aupurarana maree marianara iridaqa. ⁸ Qinee innaarunaindari qumuree Isipa maqannaasa nisaukukinaana mareeqee firaa maqa maaqa ainoo faqaa maqa aiqama ainaina rairaa imariqoo quqaanaura. Mi maqanasaa Kannaana maqannaasa faqa Heeta maqannaasa faqa Amooraa maqannaasa faqa Peerisita maqannaasa faqa Hifita maqannaasa faqa Yeebusa maqannaasa faqa misauqa mariaqoo quqannisaanaura. ⁹ Isipa maqannaasa Heeburu maqannaasa radami mariafaqa misa qiki raqee mariafa doo qini daaqoosaa rifaqa niqafaidaqa. ¹⁰ Qinee ani Isipa maqannaasa karaambaifaqaa Faraoo finnai aiqaanana oonureenana qini faiqí anaasee indaarunni kamma nimaqainafaqaa Faraona maqa maaqakiqari quqasee aniaqa.

¹¹ Mooseefa mi ufana iriseenoo Anutunara qaoo qidanoo qinuu. Akasaa qinee maaqirausa naqimaseeqee Faraoo finnai oonuree fee Isaraee maqannaasa Isipa maqa maaqaki mariana nifiqaanauree. ¹² Anutufa iriseenoo qinuu. Qinee anifaqa marianana anee Isaraee maqannaasa Isipa maqasaa qaraana nifiqamaree maa aqaanasaa aniree qini qimoo qifaranoo. Miqinna oosanafa qinee ani aiqaafannanara kooroo iannoo.

13 Mooseefa iriseenoo kafa Anutuna qimaminoo qinau. Anee qini diqqaanaqa qinee Isaraee maqannaa innannai oonu reeqa maaqi qianaara. Inni nisaifaqausa ninaakusa Anutufa qini diqqaifaqa inni qimannimirara anidaqa. Miqi qianaqa misa maaqi qimasee qini ireefaranoo. Mina auqu yafee maridanoo fee qifaqa qinee naqifee qimasee qimannimianauree. 14 Anutufa iriseenoo Mooseena qimaminoo qinau. Qinee qeeqa marunausa qidaqa. Anee maaqi qimasee qimannimia. Nariara qinee qeeqa marunausee qimarifa diqqaifaqa innee iannai anidaqa. 15 Maaqi qimasee kafa moo faqa qimannimia. Inni nikausa Abarahaammana faqa Isakeena faqa Yakoobona faqa Anutusa Yaaweesa maridaqa ani Isaraee maqannaa iannai ani aqqaidaqa. Qini mi duqufa naaruara mariannoo. Kasooaqee kambiqainausa qini mi duquna reefaranoo. 16 Anutufa kaifaa Mooseena qimaminoo qinau. Anee oquree Isaraee maqannaa uriqararawsa suqusee maaqi qimasee qimannimia. Yaaweefa inni ninaakusa Abarahaammana faqa Isakeena faqa Yakoobona faqa Anutusa qini qifusaa kooroo mafino qimaqiminoo. Misa qimannimia, qinee misa iannai aniree qafaunaqa Isipa maqannaasa qumaara moomoo nimimariafaqa qafaidaqa. 17 Qinee Isipa maqa maaqakinaana maraanauree qimasee iridaqa. Misa firaa aupurarana kinaana nifleeqee ainoo faqaa maqasaa irairaa ida reemindeemiri mariqoo Kanna maqasaa faqa Heeta maqasaa faqa Amooraa maqasaa faqa

Peerisita maqasaa faqa Hifita maqasaa faqa Yeebusa maqasaa faqa quqannisaanaura.

¹⁸ Moosee anee Isaraee maqannaasa mi ufana qimanniminaqa irifara. Anee Isaraee maqannaa uriqararawsa faqa nifiqamareenana Isipa maqannaa karaambaiqa marinnai oonuree maaqi qimasee qimamia. Maasa Heeburu maqannaasa Yaaweefa maasa Anutufa maasa qifusaa kooroo mafinoo qimanniminoo. Maqee anee maasara eedoo qinaqa qaaramoo faasaana aadana maqa maaqaki oonuree maasa Yaaweena maasa Anutuna tatufirana suqa amianee qia.

¹⁹ Qinee iridaqa anee qimaminanoo Isipa maqannaa karaambaiqa fannoo sia inni niiqainaqa fifaranoo. Qinee mina aidafirana amiananoo miqoo inni niiqaannoo. ²⁰ Qinee qeeqa afeekannai Isipa maqannaasa oosana oosana naaquqara ainainannai fitiqnarana nimianaura. Nimiananoo Faraoofa miqoo inni idukuannoo.

²¹ Qinee Isipa maqannaasa inniara naaquqarana nimianaqa innee Isipa maqasaaqari sia kaqi fifaranoo. Ainaina nimifaqa maree fifaranoo. ²² Innee firarifaqa inni ninaaqmaaka Isipa maqannaa aanaaseeuqa nári naqa maria aanaaseesa faqa nariqa maaqaki mariasara faqa qifaqa qamunna faqa kooraa faqa siruaa faqa nifaaqa auqi maria ainainausa faqa nimifaqa inneeqa faiqi namu niraamuqmaaka Isipa maqannaa amiqira qamunna ainaina kai afisunnimaqaifaqa maree fuaqa. Miqinnanannai innee Isipa maqannaasa ainaina maree fiara foora ifaranoo.

4

Anutufa Mooseena oosana oosana kudifaanna auqaani feera afeeka aminau.

¹ Mooseefa Anutuna ufa iriseenoo kaifaa iramirinoo qinau. Misa Isaraee maqannaa sia qini ufa qaindusia, sia qini ufa iria qiniara unna fee qimasee Yaaweefa sia ani afusaa kooroo ifana unna qiaanoo qifaqa qinee naqiffee ianauree. Naqiffee ianaqee misa qini oosana qafee fee kuqaa fee qifaree. ² Miqi qufanoo Anutufa qinau. Ani asaukuki anee nanee uqirafa nidanee, qufanoo Mooseefa qinau. Saunu uqirausa nidaqee qinau. ³ Anutufa iriseenoo qinau. Doo mina maqasaa aqua qufanoo maqasaa aqusoofanoo mi saunufa sakani kambiga fufanoo Mooseefa mina qafamaseenoo rufiasee sandanau. ⁴ Anutufa kafaa qimaminoo qinau. Aneenna asaukunnai mara miami ameesa qumaraa qufanoo qumaroofanoo kafaa asaukuki saunu kammafinau. ⁵ Miqooqari Yaaweefa Mooseena qimaminau. Anee ooqu Isaraee maqannaa nifusaa miqinaqa misa qiniara Abarahaamana faqa Isakeena faqa Yakooboona faqa misa Yaaweefa misa Anutufa kuqaa ani afusaa kooroo iifoo qifaranoo.

⁶ Yaaweefa kafaa Mooseena qimaminau. Anee aneenna siutaki asauku upeekaa. Miqi qufanoo Mooseefa miqimminau. Asauku upeekaseenoo radukusee qafooofanoo asaukumau aiqama namuandaundau inoo marufanoo qafanau. ⁷ Anutufa kafaa qinau aneenna asauku kafaa upeekaa qufanoo upeekaseenoo radukuseenoo

qafoofoo asauku mau namuandaundau irafa sia marinau. Dinniara foora kai marinau. ⁸ Anutufa kafa Mooseena qimaminoo qinau. Anee indaaruu saunu uqannifiqaina sia irifana innaaqiana asauku uqannifiqainaqa iriaqa. ⁹ Misa ani mi ainaina qanda qafamasee sia ani ufa irifana anee Niru nammari saka qumareenana aadana maqasaa adiasainanoo fidika kai mandifinaqa qafaaqa.

¹⁰ Mooseefa Yaaweena ufa iriseenoo qimaminau. Oo Yaawee sia qini diiqaa. Qinee ooqaindari sia amiqimmasee faiqí nifusaa ufa qunausa maridaqa. Maqee anee qini qima qimiannaqooqari sia mifa qini mareeqee ufa qimarunausaikamma qiseenoo. Qinee sia ufa qunausa ufara mamma qimarunausa maridaqa. ¹¹ Miqi qufanoo Anutufa Mooseena qimaminoo qinau. Yafee nifauru nimidanoo fee. Yafee sia ufa qiasaika faqa naaqoo qaunirausaika faqa mannisaidanoo fee. Yafee nifu maqarana faqa nifu dimbarana faqa nimidanoo fee. Qinee Yaaweesa kai miqidaqa. ¹² Moosee anee doo fua. Qinee ani ufa dadaaqi aakapaanana qinnaranoo.

¹³ Mooseefa kaifaa Yaaweena qimaminoo qinau. Oo Yaawee anee moo aqiqainanoo fuani. ¹⁴ Yaaweefa mina iriseenoo aranaqoofanoo qinau. Doo amana ani afasaafa Aaroonafa Reefina atikinaafa andeeqasee ufa qimarifa marifaqa qinee iridaqa. Mifa maqee aniara randanoo anidanoo. Mifa ani paqurimandee asasiannoo. ¹⁵ Anee mina qimaminanoo mifa misa qimannimiani. Qinee inniqara dadaaqianaqa ufa qimannimifaranoo. Qinee

inneeqara ifandinna ainaina qimannimianaqa auqeefaranoo. ¹⁶ Anutufa kafaa Mooseena qimaminau. Aaronafa ani ufa mareeqee faiqí anaasee qimannimiannoo. Mifa ani oora foora marinana anee mina Anutufara foora maridana mifa auqaaninna ainaina anee aakapeennaranoo. ¹⁷ Anee aneenna saunu faqa uqirafa fua. Minannai oosana oosana ainaina faiqí sia amana auqaaqaa ira ainaina auqeennaranoo.

Mooseefa Isipa maqusai kafaa anirandee finau.

¹⁸ Mooseefa Yaaweená ufa iriseenoo narí airaamaku Yeetaroo funnai oonureenoo qimaminoo qinau. Amanee qinee Isipa maqusai kafaa anirandee oonuree qeeqa ainaina niqafaanau-ree. Misa kaqi fee maridee doo fee kuqia. Miqiqufanoo Yeetaroofa iriseenoo eedoo qimasee aiqanau.

¹⁹ Mooseefa Midianna maqa maaqai kaqi marufanoo Anutufa kafaa qimaminoo qinau. Doo findi finana kafaa Isipa maqusai fua. Ani arirari marusa doo kuqia. ²⁰ Mooseefa irisee eedoo qimaseenoo narí anaqa faqa faiqi namu faqa mareeqee doonkisaa quqaseenoo finau. Anutufa maree fuannee qu saununa faqa maree finau.

²¹ Anutufa Mooseena qimaminoo qinau. Anee Isipa maqa maaqai oonureenana misa karaambaiqa afusaa faiqí sia amana auqaaqaa ira ainaina qinee amiafanna afeekanannoo auqaa. Miqi marinaqa qinee Faraona kaukaata qira irirana amiananoo sia eedoo qinaqa Isaraee

maqannaasa fifaranoo. ²² Anee maaqi qimaseenana Faraona qimamia. Yaaweefa maaqi qidanoo. Isaraee maqannaasa qini ooqa faiqiaara foora maridammiaafoo qia. ²³ Qinee ani qimamidaqa. Anee qini ooqa faiqiuqa Isaraee maqannaasa quqasainaqa misa oonuree qini qimooqi-aqa, qunana anee qaoo qianaqa doo maqee ani ooqa faiqi aruanaura.

²⁴ Mooseefa narí faiqi anaasee faqa fidanoo eendufanoo aanai faiqanau. Eendaki Anutufa anireenoo Mooseena kuqa arirara inau.

²⁵ Miqufanoo Mooseena anaqa Sipooraa nammarifa ooni raiqarana qumareenoo narí amaaku afaqa ati aukuseenoo minannoo Mooseena aiku auqamaseenoo maqasaa quqanau. Quqaseenoo qinai. Anee qini qifaaqi fidika aanaaqi fasiqa mariananoo fee qinai. ²⁶ Miqimmasoofanoo Yaaweefa Mooseena sia arinai.

²⁷ Miqi qimarufanoo Yaaweefa Aaroona qimaminoo qinai. Anee aadana maqa maaqai fidana Mooseena paquria. Aaroonafa eedoo qimasee Anutuna naaquqara aaqanai ooru Mooseena paqurinai. Paqurimasee amooqa nanau. ²⁸ Amooqasoofanoo Mooseefa Isipa maqa maaqai fuanifeera Yaaweefa qimamuna faqa oosana oosana ainainara faqa Aaroona qimaminai. Yaaweefa faiqí sia amana auqaaqaa ira ainaina auqannee quna faqa Aaroona qimaminai. ²⁹ Mooseesa Aaroonasa Isipa maqa maaqai ooqureeqa Isaraee maqannaa faiqí firaasa naarama quqaqau. ³⁰ Quqaseeqa Yaaweefa Mooseena qimamu ufausa aiqama Aaroonafa qimannimisoofanoo Mooseefa faiqí

sia amana auqaaqaa ira ainainauqa misa nifusaa auqanau. ³¹ Isaraee maqannaasa Aarona mi ufana iriseeqa kuqaa mifoo qiqau. Misa Yaaweefa misa unnai anunara nariqa firaa aupuraranara irisee kumma ramafufaqa innaaru qiqau.

5

Mooseesa Aaroonasa Isipa maqannaasa kinna oonu qafaqau.

¹ Innaaru qimasoofaqa Mooseesa Aaroonasa Faraoo funnai oonuree qimamiqa qiqau. Oo Faraoo, Yaaweefa maasa Isaraee maqanna Anutufa aniara maaqi qinoo. Anee qini faiqi namu idukusainaqa aadana maqa maaqaki oonureeqa oomaqa mandee qiniara innaaru qidaqa qimooqiaqee qinoo. ² Faraofa miqanda ufa iriseenoo qinau. Yaaweefa yafee. Nanaree mina ufara eedoo qimasee Isaraee maqannaasa niiqaana fifaree. Sia qinee Yaaweenara iridaqa. Minara qinee sia uqanna Isaraee maqannaasa niiqaanaura.

³ Mooseesa Aaroonasa kafa Faraona qimamiqa qiqau. Maasa Heeburu maqannaasa Anutufa maasa qifusaa koorooinoo. Anee maasara eedoo qinaqa qaaramoo faasaana aadana maqa maaqaki oonuree Yaaweenana maasa Anutuna tatufirana suqa amianaura. Maasa sia miqiananoo mifa firaa manda auriranannai fee firaa dariranannai fee maasa aiqama daruannoo. ⁴ Faraofa iriseenoo Mooseesa Aaroonasa qimanniminoo qinau, inneeqara

nanaree faiqí anaasee qini ainaini mariasa nifiqee fuafaqee minnisee fidee. Saina kafaá anirandee ainainiranaki fuaqa. ⁵ Innee Isaraee maqannaasa maqee moomoo kammafi qini ainainirana minnisararee fee qidafee.

⁶ Mi faasaana kai Faraofa Isipa maqannaá karabusasaa rakisi marusa faqa Isaraee maqannaá niqoonausasaa rakisi marusa faqa qimanninoó qinau. ⁷ Innee maqee sia kafaá uita asaki atekasee Isaraee maqannaá nimifaqa minannoo maaqa usakee maria simmeerana auquaqa. Sai faqa nári kai maraaqa. ⁸ Maraseeqa sia oorudupi masee auquaqa. Aiqama kari auqi mariana amana kai auquaqa. Misa kudiki mariasa maridaqa qiniara maasa idukusainaqa maasa oonuree Yaaweena nári Anutuna tatufirana suqa amianee qidaqa. ⁹ Miqi qidaqifaqa innee firaa kadaapi nimifaqa misa oonauqee anauqee idaqa Mooseesa Aaronasa qinna unnufausa sia iriaqa.

¹⁰ Miqi qufaqa karabusasaa rakisi marusa faqa Isaraee maqannaasa nári niqoonausasaa rakisi marusa oonuree maaqi qimasee Isaraee maqannaasa qimannimiqau. Faraofa maasara sia uita asaki raraku mini nimiaqee qidanoo. ¹¹ Mifa inniara inneeqa kai minakinaí randasee maree miniseeqa ooqai auqiu simmeerana amana kai auquaqee qinoo. ¹² Miqi qufaqa misa Isipa maqa maaqaki aiqamatinaí nidaqa uita asaki randasee suqimariqau. ¹³ Isipa maqannaá karabusasaa rakisi marusa fuki faaki qidaqa qiqau. Innee ooqai maasa uita asaki nimiafana auqeeundee masee mina amana kai simmeera auquaqa.

¹⁴ Miqi qimaseeqa karabusasaa rakisi maru Isipa maqanna fasiqausa Isaraee maqannaasa nari niqoonausasaa rakisiaqeera mara quqaqoosa naruseeqa qiqau. Innee nanaree simmeera ooqai auqiuna amana sia auqidee.

¹⁵ Qufaqa Isaaraee maqanna rakisirausa Farao funnai oonuree qimamiqa qiqau. Oo uriqararafa. Anee naqaa fee ifanee maasa maaqimma qimaqaidanee. ¹⁶ Misa sia uita asaki nimiseeqa kaqi maasara simmeera auquaqee qidaqa. Mina saara maasa daria. Sia maasa oosanasaa fau. Inneeqa oosanasaa fifau miqiafanoo.

¹⁷ Faraoofa iriseenoo qimanniminau. Innee kudiki mariasa ainainiranara nikooqai faqa qiniara maasa idukuqisainaga Yaaweenata tufirana suqamianee qimariafanoo. ¹⁸ Doo kaqi kaqi anirandee inneeqa ainainai fuaqa. Misa sia inni uita asaki nimifaranoo. Inneeqa kai uita asaki maree miniseeqa ooqai iundee kai moomoo simmeera auquaqe. Doo fuaqa.

¹⁹ Isaraee maqannaasa nari niqoonausasaa rakisi marusa Faraoofa ooqai auqiundee kai masee auquaqee qunara irisee doo maasa ummaarak maridee qiqau. ²⁰ Farao funnaindari quqasee anidaqa Mooseesa Aaroonasa misa nifeesidaqa marufaqa ani paquriqau. ²¹ Ani paqurimmasee qimannimiqa qiqau. Yaaweefa inniqara oosana qafamaseenoo mina akiiqara nimiannoo. Inneeqara oosana arasaafanoo minasaara Faraoofa nari rakisirausa faqa maasa

daruannoo. Inneeqara Faraofa maasa daruani-feera andaana rumasaafanoo daruannoo.

Mooseefa aundura ummaara roofanoo Anutu funnai anunu rinau.

²² Mooseefa misa ufa iriseenoo quandakufanoo oonureenoo Yaaweenara innaaru qinau. Oo Yaawee, anee naqaafee ifanee Isaraee maqannaa maa mandaikana mannimaqaidanee. Anee naqi fee ifanee qini mai diigeenee. ²³ Qinee Faraoo funnai oonureeqa ani ufa qimamifanna qooqari Faraofa Isaraee maqannaasa mandaika kai mannimaqaidanoo. Anee sia uqanna dadaaqira kari mariananoo.

6

¹ Yaaweefa Mooseena ufa iriseenoo qimaminau. Amana doo anee maqee qini oosana qafeennaranoo. Qinee Faraona afeekaikam-masee qimamiananoo qini faiqi anaasee iduku-sainaga fifaranoo. Sia kaqi idukuannoo qinee qiananoo idukuseenoo fuki faaki qinaqa mina maqasaaqari quqasee fifaranoo.

Anutufa kafa Mooseena aaranau.

² Anutufa kafa Mooseena qimaminoo qinau. Qinee Yaaweesa maridaqa. ³ Qinee Abarahaa-mana faqa Isakeena faqa Yakooboona faqa misa nifusaa aiqama afeeka faqaa Anutusa qeeqa duqu kooroo iqiafana. Qinee sia qeeqa fuka naaquqara duqu Yaaweesee qirana qimannimi qiafana. ⁴ Qinee qeeqa moodaanaki kira ufa misa faqa qidaqa Kannaana maqa maqa misa nimira-ree qima afeekaikiqiafana. Misa minaki asaqiraa

faira foora mariunaki quqannisaanauranoo fee qiqiafana. ⁵ Qinee maqee Isaraee maqannaasa Isipa maqannaasa karafusaki maridaqa aupuraida annada annada imarianara iriseeqa qinee qeeqa moodaanaki kira ufara oonu mafi iriqa.

⁶ Moosee anee Isaraee maqannaasa maaqi qimasee qini ufa qimannimia, qinee Yaaweesa maridaqa. Innee Isipa maqanna rumbaranaki mariana qinee inni idukeeqee asumu mariranaki quqannisaanaura. Qinee afeeka qisaukunnai manda aupurarana Isipa maqannaasasaa quqaanaura. Quqaseeqa inni Isaraee maqannaasa asumu maraanaura.

⁷ Qinee inni qeeqa faiqi aanaaseekammaseeqa qinee inni Anutusa mariana. Qinee inni Isipa maqanna karabusa kinaana iduku nisaanaqa miqoo innee qini Anutusara irifaranoo.

⁸ Qinee inni niffeegee kuqaa qima afeekaikammasee Abarahaamma faqa Isakeena faqa Yakooboona faqa nimianauree qiafannaqoo quqannisaanaura. Qinee inni nimiananoo mi maqafa innindi kammiannoo.

Qinee Yaaweesa qidaqa. ⁹ Mooseefa Isaraee maqannaasa qima nimufaqa misa sia mina ufa iriqau. Misa firaa ummaara maree marufa mifa misa naaqoo nifu furufara masoofaqa sia iriqau.

¹⁰ Anutufa kafa Mooseena qimaminoo qinau.

¹¹ Anee Isipa maqanna karaambaiqa Faraoo finnai oonuree Isaraee maqannaasara qimamia. Misa karafusaki mariana idukusaina fuaqa.

¹² Mooseefa mi ufana iriseenoo Yaaweena qimaminoo qinau. Isaraee maqannaasa ririmma sia qini ufa iria naqaa fee masee

Faraofa iriannoo fee. Qinee ufa qirara mamma qimarunausa maridaqa. ¹³ Yaaweefa Mooseena faqa Aarona faqa qimannimino qinau. Inneeqara Isaraee maqannaasa faqa Faraona faqa maaqi qimasee qimannimiaqa, qinee ani Mooseenara Isaraee maqannaasa Isipa maqa maaqaindaraana nifiqee fuannee qunnanara qimannimia.

Mosseesa Aarona niku nisauku nuqu.

¹⁴ Yakoobona indaruqaa faiqi Reebeenafa qaara faqa qaara faqa 4 faiqi maqanau. Misa nuqu Hanookafa faqa Paruafa faqa Heesarona faqa Karamifa faqa minamusa mariqau. Misa nári nifaafurara maqa maaqakina marusa ninaakusa mara mariqau. ¹⁵ Simeeonafa qisauku dinni taikasee dinni ani moodaa marasee 6 faiqi maqanau. Misa nuqu Yeemueerafa faqa Yaminafa faqa Ooqadafa faqa Yakinafa faqa Soogarafa faqa Sauroofa faqa mariqau. Sauroona anoofa Kannaa anaasee marinau. Misa nári nifaafurara maqa maaqakina marusa ninaakusa mara mariqau. ¹⁶ Reefifa qaara moo faiqi maqanau. Misa nuqu Keerasoonafa faqa Kooqatafa faqa Meerarifa faqa mariqau. Misa nikoofa Reefifa 137 aukuna maraseenoo kuqinau. Misa nári nifaafurara maqa maaqakina marusa ninaakusa mara mariqau. ¹⁷ Keerasoonafa qaara faiqi maqanau. Miqanda nuqu Ribinifa faqa Simeeifa faqa mariqau. Miqandasaaqari moomoo kambiaqau. ¹⁸ Kooqatafa qaara faqa qaara faqa 4 faiqi maqanau. Misa nuqu Amarammafa faqa Isaqaranafa faqa Heebaroonafa faqa Usieerafa

faqa mariqau. Misa nikoofa Kooqatafa 133 aukwana marasee kuqinau. ¹⁹ Meerarifa qaara faiqi maqanau. Miqanda nuqu Maqarifa faqa Musaqifa faqa mariqau. Reefina faiqi namu anaiqi mara miqimmiqa mariqau.

²⁰ Amarammafa nari akoona auna nari amaamuna Yookebeeda nammarina maraseenoo Aarona faqa Mooseena faqa maqanau. Amarammafa 137 aukwana maraseenoo kuqinau. ²¹ Isaqarafa qaaramoo faiqi maqanau. Misa nuqu Kooraafa faqa Neefeekafa faqa Sikirifa faqa mariqau. ²² Usieerafa faqa qaaramoo faiqi maqanau. Misa nuqu Misaeerafa faqa Eerasafanafa faqa Sitirifa faqa mariqau. ²³ Aaroonafa Aminadafana araamuna Nasoonaa asookina Eeriseepa nammarina maraseenoo minasaa Nadabana faqa Abiquna faqa Eeriasarana faqa Itamarana faqa maqanau. ²⁴ Kooraafa qaaramoo faiqi maqanau. Misa nuqu Asirafa faqa Eerakanafa faqa Abiasafa faqa mariqau. Misa Kooraanasaa ani aruaki kambiqainausa ninaakusa mara mariqau. ²⁵ Aarona amaaku Eeriasarafa Putieerana araamuna maraseenoo Fineeasana maqanau. Miqimmasee doo Reefinakiqari ani aruaki faiqi oosana oosana mariqau.

²⁶ Yaaweefa Aaroonasa Mooseesara kai qufaqa Isaraee maqannaasa Isipa maqannaasa rumbarana kinaana nifiqa maree aniaqee qimaqoo qanda mariqau. ²⁷ Miqanda kai Isipa maqanna karambaiqa Faraona Isaraee maqannaasa idukuanifeera qimamiqau.

Yaaweefa Mooseena faqa Aaroona faqa ufa nimirau.

²⁸ Yaaweefa Isipa maqa maaqaki maaqi qimasee Mooseena qimaminau. ²⁹ Qinee Yaaweesa maridaqa. Anee Isipa maqanna kaaraambaiqa Faraona aiqama qinee qunnufana qimamia. ³⁰ Mooseefa iriseenoo Anutuna qimaminoo qinau. Qinee ufa qirara mamma qimarunausa maridaqa. Faraofa naqiffee masee qini ufa iriannoo fee.

7

¹ Yaaweefa Mooseena qimaminoo qinau. Qinee ani aiqaanana anee Faraona afusaa Anutufara foora marinnaranoo Aaroonafa ani afasaafa ani tamummaqara fasiqara foora mariannoo. ² Qinee aiqama ufa qimamunnana anee Aaroona qimaminanoo mifa Faraona qimaminanoo Isaraee maqannaasa Isipa maqa maaqaki rumbaqa mariana idukusainaqa mi maqa maaqana quqasee fuaqa. ³ Inneeqara Faraona qimami marifaqa qinee kaukaata qimasee qaoo qira irirana amiananoo sia inniqara ufa iriannoo. Qinee moomoo naaquqara ainaina Isipa maqa maaqai auqaananoo sia inni ufa iriannoo. ⁴ Qinee firaa aupurarana uqanna Isipa maqannaasa nimisee qeeqa faiqi anaasee aiqama faiqi oosaa indaarunni kiqa nifiqee fuanaura. ⁵ Qinee Isipa maqannaasa naruseeqa Isaraee maqannaasa misa maqa maaqaki mariana nifiqee fuaqa Isipa maqannaasa qinee kai Yaaweesa marunnana misa irifaranoo.

⁶ Mooseesa Aaronasa Yaaweena ufa iriseeqa doo miqimmiqau. ⁷ Mooseefa Faraona faqa ufa quu kari Mooseefa 80 aukuana faqaafa marufanoo Aaronafa 83 aukuana faqaafa marinau.

Aaroona saunu.

⁸ Yaaweefa Mooseesa Aaronasa qimaniminoo qinau. ⁹ Faraofa inni qarara moo naaquqara ainaina auqamasai faqa kuqaa anoonee qianee qinaqa Moosee anee Aaroona qimaminanoo mifa narí asaukukinaa saunu maqasaa Faraona afusaa aqusainanoo sakanikiani.

¹⁰ Mooseesa Aaronasa Faraoo funnai oonuree Yaaweefa qimannimundee qiqau. Aaronafa narí saunu Faraona faqa mina uriqarara fasiqauqa faqa nifusaa aqusoofanoo sakani kinau. ¹¹ Faraofa mina qafamaseenoo narí irirana faqaa fasiqauqa faqa narí afunee fasiqauqa faqa naaroo faqa anireeqa narí afuneenoo Aaronafa auqoo ainaina auqau. ¹² Mi afunee fasiqausa faqa nariqa saunu maqasaa aqusoofanoo sakanikinau. Sakani kamafufanoo Aaroona saunu fannoo misaindi nambiqamasanau. ¹³ Faraofa mina qafamaseenoo Yaaweefa qundee inoo kaukaata qira irirafa kaqi minaki marufanoo sia Mooseesa Aaronasa ufa irinau.

Mandainaina Isipa maqannaasaki kambiqa nau.

¹⁴ Sia irufanoo Yaaweefa kafa Mooseena qimaminoo qinau. Faraofa kaaqa kaukaata qira irirafa minaki marifanoo idukirara akooqaidanoo. ¹⁵ Duna kananaana Faraofa

Niru nammari auqarara ooqufinaqa inneeqara mina minni ooqu paquriaqa. Sakaniki mari saununa faqa mara maree nammari afainni ooqu marida minara rakisiaqa. ¹⁶ Paquri maseeqa maaqi qimasee qimamiaqa. Yaaweefa Heeburu maqanna Anutufa maaqanda diqaiqafa Isarae maqannaasa anee idukusainaqa aadana maqa maaqai oonureeqa qiniara innaaru qiaqee qifaqa ani qimamidaqa. Anee sia iri mariananoo. ¹⁷ Maqee Yaaweefa aniara maaqi qidanoo. Anee qinee auqaanna ainaina qafamasee anee qiniara Yaawee fee qimasee irinnaranoo. Anee qafainaqa qinee nammari amuaqu maa saununannoo rukamu amiananoo nammari fannoo fidikaika miannoo. ¹⁸ Miqinanoo noodaanna minakinaafauqa aiqama kuqu taikainanoo nammari faqa manda unda inaqa Isipa maqannaasa sia amana mi nammarina neefaranoo. ¹⁹ Yaaweefa Mooseena kafaa qimaminoo qinau. Anee Aaroona maaqi qimasee qimaminanoo narí saunu qumaree aiqama nammariuqa faqa oorakinaa nammariuqa faqa akammandira nammariuqa faqa aiqama nammari amummaqa uqeeraani. Nammari fannoo aiqama fidikaika kai mafuannoo. Aiqama Isipa maqa maaqakinaa nammariuqaki fidika kai mariannoo. Difaaniki faqa afeeki faqa sakaqainafa faqa kai fidika aruannoo.

²⁰ Mooseesa Aaroonasa Yaaweefa qima nimundee iqau. Faraona faqa mina uriqarara rakisirausa faqa nifusaa Aaroonafa narí saunu uqeeraseenoo nammari amuaqu arufanoo aiqama mi nammarisa fidika kai arinau.

²¹ Noodaanna aiqama nammarikinaafa kuqu taikafufanoo nammari kaaqa manda undufaqa Isipa maqannaasa sia mi nammarisa nee mariqau. Aiqama Isipa maqa maaqakinaa nammariuqaki fidika kai arinoo marinau.

²² Faraona afunee fasiqauqa nariqa afuneenoo Aaroonafa undee iqau. Miqufanoo Faraofa Yaaweefa qundee inoo kaukaata qinoo Mooseesa Aaroonasa ufa sia irinau.

²³ Faraofa mina qafamaseenoo nari maaqai oonureenoo sia mi ainainausara irinau.

²⁴ Isipa maqannaasa nammariara randoosia Niru nammari afaiqara nukuda indufusaida amiqira nammari sakasaidaqa neemariqau. Anoona nammari mandaikinoo marunara sia neemariqau. ²⁵ Qisauku dinni taikasee dinni ani qaara marasee 7 faasaana nammari kaqi fidika arinoo marinau.

8

Eeqamoosauqa kambiiqau.

¹ Yaaweefa kafaa Mooseesa Aaroonasa qimanmininoo qinau. Inneeqara Faraoo finnai oonuree maaqi qimasee qimamiaqa. Yaaweefa aniara maaqi qidanoo. Anee qini qiku qisauku iduku-sainaaqaa misa qiniara innaaru qidaqa qimooqi-aqee qinoo. ² Anee qaoo qinaqa qinee eeqamoosa moomoora qianaqa anireeqa ani maqa maaqa qumbiqeefaranoo. ³ Niru nammariki faqa ee-qamoosa kai qumbiaqa marifaranoo miqooqari

anee kooti marianna fira maqaanaki faqa kee-
qeefaranoo. Anee faiqee mariannanaki faqa kee-
qeefara. Ani qaari qamunnasaa faqa qumbiqee-
faranoo. Ani faiqi firaasa faqa ani maqannaasa
faqa misa oonidaki faqa afeeki faqa qumbiqee-
fara. ⁴ Eeqamoosa fannoo urureenoo ani faqa
ani ainainirausasaa rakisi mariasa faqa ani
maqannaasa faqa nifaaqai akareefaranoo. Miqi
qufanoo Faraofa sia mi ufana irinau.

⁵ Yaaweefa kafaa Mooseena qimaminau. Anee
Aarona maqi qimasee qimamia. Doo aneenna
saunu uqeereseenana aiqama nammari faqa
oorakinaa nammari faqa aka mandira nammari-
uqa faqa uqeera uqafiqasainanoo eeqamoosa
fannoo moomoo urureenoo Isipa maqa maqa
rafaaqa fuani.

⁶ Aarona ufa iriseenoo saunu
uqeereseenoo aiqama nammariuqa nimummaqa
uqeeranau. Uqeerasoofanoo eeqamoosauqa
moomoo nammarikiqari urureeqa maqa maqa
rafaaqa fiqau. ⁷ Isipa maqannaa afunee
fasiqauqa misa faqa nari afunee auqusoofanoo
eeqamoosa moomoo nammarikiqari Isipa maqa
maaqa qumbiqaqau.

⁸ Faraofa eeqamoosara akooqoofanoo
Mooseena faqa Aarona faqa naaramasee
qimanniminau. Inneeqara oonu Yaaweenara
innaaru qimasaifanoo kafaa eeqamoosa
niiqaani. Eeqamoosa aiqama niqamasainaga
qinee Isarae maqannaa karabusakinaana
idukusaanaqa oonureeqa Yaaweena aandau
tatufirana suqa amiaqa.

⁹ Mooseefa Faraona ufa iriseenoo qimaminau. Qinee inniara innaaru qirara asasammi-daqa. Aneenna kai yairee fee innaaru qiannee qinaqa qinee aniara faqa ani ainainirausasaa rakisirausara faqa ani maqannaara faqa innaaru qianaara. Mi faasaanna kai inni maaqakiaqa qari eeqamoosauqa quqasee Niru nammariki kai ooqu marifarannoo.

¹⁰ Faraofa iriseenoo duna kai innaaru qiannee qufanoo Mooseefa iriseenoo qimaminau. Anee qianandee ianaara. Miqianana anee mina qafamaseenana sia moo maqasaa anutufa Yaaweena maasa Anutuna fooqaafa maridanoo fee qimasee irinnaranoo. ¹¹ Aniki faqa ani ainainiranasaa rakisirausaki faqa ani maqannaasaki faqa maria eeqamoosausa taika fuannoo. Sia uqanna moodaa faqa kaqi mariannoo. Niru nammariki kai marifaranoo.

¹² Mooseefa faqa Aaroonafa faqa Faraona maaqakiqari raudeeqa oonuroofanoo Mooseefa Yaawee funnai eeqamoosa Faraona faqa nari maqannaasaki faqa quqaqoona taika nisaanifeera innaaru qinau. ¹³ Yaaweefa Mooseefa iroondee inau. Aiqama maaqakinaa eeqamoosauqa faqa maaqa naambeeqa qara maru eeqamoosausa faqa maaqa saqama atiqara marusa faqa aiqama qufaqa kuqu taikaqau. ¹⁴ Isipa maqannaasa mi eeqamoosausa kuqiranauga mareeqaida moodaanaki quqeesoofaqa putaa iqa aiqama maqa maaqaki putaa undi marinau. ¹⁵ Eeqamoosa kuqu taikafufanoo Faraofa qafamaseenoo Yaaweefa

qundee inoo kaukaata qimaseenoo sia Mooseena faqa Aaroonaa faqa ufa irinau.

Aakukauqa kambiqau.

¹⁶ Yaaweefa Mooseena qimaminoo qinau. Aaroonaa maaqi qimasee qimamia. Aaroonaa anee aneenna saanu qumaree maqa rupeemma aminanoo kookooma fannoo quandaki aakukaikamafi Isipa maqa maaqaki umbiqaani.

¹⁷ Aaroonafa nari saanu samu kookooma rupeema amufanoo aiqama Isipa maqa maaqakinaa kookoomma fannoo aakukaikinau. Mifa faiqi anaasee faqa aandaufa faqa nifaaqasasa qumbiaqa marida ukaqa nimi mariqau. ¹⁸ Isipa maqannaafunee fasiqauqa Aaroonaa oosana qafamaseeqa misa faqa nari afuneennai aakuka amanammasee qafaanee qimasee amanufanoo sia ufaqa minnisauqa. Minnisooafaqa aakukauqa aiqama atinai amanaikiqa mariqau.

¹⁹ Afunee fasiqauqa Faraona qimamiqa qiqau. Anutufa maa ainaina auqaidanoo. Faraofa misa ufa iriseenoo Anutufa qundee inoo kaukaata qimasee Mooseesa Aaroonasa ufa sia irinau.

Faufaariuqa kambiqau.

²⁰ Yaaweefa Mooseena kafaafunee qimaminoo qinau. Duna kananaana uqanna Faraofa nammari auqarara ooqu fuannoo. Anee kananaana findifinana ooqureenana paqurimasee maaqi qimasee qini ufa qimamia. Faraoo Yaaweefa aniara maa ufana qinoo. Anee qini qiku qisauku idukusinaqa qini qimoo qiaqee qinoo. ²¹ Qinee ani aaqu qimama

qaidaqa anee sia idukinaqa qinee ani faqa ani ainainiranasaa rakisirausa faqa ani maqannaasa faqa faufaarinnoo aupurarana nimianauro. Isipa maqannaasa maaqauqaki faufaari kai qumbiqaannoo. Aiqama misa maqa maaqa faqa rafaqa fuannoo.

²² Miqi mafinaqa qinee Kooseena maqa maaqaki qini faiqi anaasee mariasasaa ititasaana sia faufaari iannoo. Qinee miqianana anee qini Yaaweesara mi maqa maaqanaki maridanoo fee qinnaranoo. ²³ Qinee ani faiqi anaasee faqa qeeqa faiqi anaasee faqa rainaanauro. Mi rainarafa naaquqara ainaina duna kambiqannoo.

²⁴ Kananaana Yaaweefa qufaqa faufaari moomoo uqanna nukudara foora anireeqa Faraona ufa irira maaqaki faqa mina ainainiranasaa rakisi marusa maaqakiaqa faqa aiqama Isipa maqa maaqaki faufaari fannoo mandaika uqanna masanau.

²⁵ Miqimmasoofanoo Faraofa Mooseesa Aaroonasa naaramaseenoo qimanniminou. Innee maaqoo Isipa maqa maaqaki moo atinai inneeqa Anutuna tatufirana suqasee innaaru qiaqa.

²⁶ Mooseefa nari qimaminoo qinau. Maasa sia amana miqianauro. Isipa maqannaasa Yaaweena maasa Anutuna tatufirana suqa amiranara nikooqaandoo. Maasa maa aandausannoo tatufirana suqarafa Isipa maqannaasa nikooqarana nimianaqa maasa qiqafamaseeqa oonisamu maasa kuqa darifooa.

²⁷ Maasa qaaramoo faasaana aadana maqa

maaḳaki oonuree aandau tatufirana Yaaweena maasa Anutuna narí qimannimundee kai iqa suḳa amianauro.

²⁸ Faraofa iriseenoo qinau. Doo amana innee aadana maḳa maaḳai oonu maridaḳa aandau tatufirana suḳasee Yaaweena inneeḳa Anutuna amiaḳa. Sia nianai fuaḳa, adeedi maridaḳa innaaru qidaḳa qiniara faḳa innaaru qiaḳa.

²⁹ Mooseefa Faraona ufa iriseenoo qimaminau. Ani maaḳakiqari raudeeḳa qumureeḳa innaaru qianauro. Duna kananaana faufaari taikaannoo. Ani maaḳaki faḳa ani ainainiranasaa rakisirausa maaḳaki faḳa ani maḳannaasa maaḳaki faḳa duna kananaana taikaannoo. Faraoo sia kaifaa unna qimaseenana qaoo qia. Isaraee maḳannaasa Yaaweena tatufirana suḳamiranara sia kafa qao qia.

³⁰ Miqi qimaseenoo Mooseefa Faraona maaḳaki aiseenoo raudamaḳinoo Yaaweenara innaaru qinau. ³¹ Yaaweefa Mooseena irara ufa iriseenoo faufaari Faraona maaḳakinaana faḳa mina ainainiranasaa rakisi marusa maaḳakinaana faḳa mina maḳannaasa maaḳakinaana faḳa aiḳama taikannisanau. Sia moodaa faufaari kaqi marinau. ³² Miqi marufanoo Faraofa kafa kaukaata qimaseenoo sia Isaraee maḳannaasa idukusoofaḳa fiḳau.

9

Isipa maḳannaasa firimaru aandausa kuḳiqau.

¹ Anutufa kaifaa Mooseena qimaminau. Anee Faraoo finnai oonureenana maaḳi qimaseenana

qimamia. Oo Faraoo, Yaaweefa Heeburu maqanna Anutufa aniara maaqi qidanoo. Anee qini qiku qisauku idukusainaqa qiniara innaaru qimaseeqa qimooqiaqee qinoo. ²⁻³ Anee kaifaa qaoo qimasee Isaraee maqannaasa sia idukinaqa, qinee manda auriranara qiananoo ani aandau qoosauqa faqa doonkiuqa faqa kameerauqa faqa burimakauqa faqa sipsipauqa faqa mimmiuqa faqa mi aurirana nimianauranoo. ⁴ Qinee aandau rainaauranoo Isipa maqanna aadau aurirana nimianauranoo. Isaraee maqannaasaindi sia aurirana nimianaqa sia misaindi kuquannoo.

⁵ Qinee Yaaweesa duna faasaana miqianauranoo fee qidaqa. ⁶ Iaqoo kananaana Yaaweefa nari qundee inau. Isipa maqannaasa aandau aiqama kuqu taikaqau. Isaraee maqannaasa aandau sia moo kuqinau. Kaqi mariqau. ⁷ Faraoofa minara iriseenoo nari maqannaasa niqiqoofaqa oonu qafamasee aniree Faraona qimamiqau. Isaraee maqannaasa aandau sia uqanna moodaafa kuqinoo. Miqi qufanoo Faraoofa kaukaata qimasee sia Isaraee maqannaasa idukusoofaqa fiqau.

Isipa maqannaasa nifaaqai abeemauqa kambiqanau.

⁸ Yaaweefa kafa Mooseena faqa Aaroona faqa qimannimino qinau. Moosee anee danda qoodaa asaukunoo afaqamaree Faraona oorinni oonuree innaarunai aqua. ⁹ Miqimmasainanoo mi dandafa kookoomara foora aiqama Isipa maqa maaqakinai aqufinoo aandauqa faqa faiqi anaasee faqa nibeema

naruani. Naru finoo radiqinoo namuana firaafa kambiqaani.

¹⁰ Mooseefa faqa Aaronafa faqa Yaaweena ufa iriseeqa danda afaqamaree Faraoo funnai fiqau. Faraona oorinni oonu kikiqa mafu-faqa Mooseefa mi dandana innaarunai aqinau. Aqusoofanoo maqasaa aqufinoo mi dandafa aandauqa faqa faiqi anaasee faqa abeema niminau. Nimisoofanoo mifa radiqinoo namuana firaafa nari marinau. ¹¹ Isipa maqannaafunee fasiqauqa sia amana Mooseena afusaa anirana amanaikiqau. Misa faqa aiqama Isipa maqannaafunee kai inoo abeema nari marunara sia Mooseefa maruqoo aniqau. ¹² Miqufanoo Yaaweefa qufanoo Faraoofa kaukaata qimasee Yaaweefa qundee inoo sia Mooseesa Aaronasa ufa irinau.

Firaa aaku faqa pupusamu faqa aqufinau.

¹³ Yaaweefa mina qafamaseenoo kafa Mooseena qimaminoo qinau. Inneeqara duna kananaana findifiqa oonureeqa Faraona maaqi qimasee qimamiaqa. Heeburu maqannaafunee maasa Anutufa Yaaweefa aniara maaqi qidanoo. Anee qini faiqi anaasee idukusainaga misa qini qimooqiaqee qidanoo. ¹⁴ Anee sia miqinaqa mikari qinee sia ani ainainiranasaa rakisirausa faqa ani maqannaasa faqa kai naruanauranoo, ani faqa aupurarana amianauranoo. Miqianana anee irinnaranoo, sia moo fannoo qini daanna rarafa aiqama maqa maaqaki maridanoo. ¹⁵ Qinee ani faqa ani maqannaasa faqa manda auriranannai amana naru taikaunaiqini.

¹⁶ Qinee inni qeeqa afeeka uqannifiqarara inni minni nisaunaqa kaqi marianara qini afeeka duqu aiqama maqa maaqaki daraaniannoo.

¹⁷ Faraoo, anee kaqi kai ramoo ramaa idana sia qini faiqí anaasee idukusaanaqa fidammia.

¹⁸ Duna suani afu maa maqee marina amanasaa ururainaqa qinee qiananoo aaku firaafa pupu samu namufaqa aqufuannoo. Miqira pupu samu Isipa maqannaasa oogai faqa maqee mariaqooqari faqa sia qafoo ainainafa maqee kai kambiqaanoo.

¹⁹ Doo aneenna maqannaasa qimanniminaqa nariqa aandaufa faqa aiqama ainaina madaanai mari ainainausa faqa mareeqee maaqaki quqaqa. Madaanai marinna aandausasa faqa faiqí aanaasesaa faqa firaa pupusamu aqufinoo kuqa naruannoo.

²⁰ Kinna Faraona ainainasaa rakisi marusa uriqararausa akaqausa Karaambaiqa mi ufanara rufiasee nariqa ainainira faiqiuqa faqa aandaufa faqa mareeqee maaqaki uqaqau. ²¹ Akaqausa Yaaweena ufa irisee nikooqoosa misa nariqa ainainira fasiqauqa faqa nariqa aandaufa faqa kaqi madaanai quqaqoofaqa mariqau.

²² Iaqoofanoo Yaaweefa Mooseena qimaminoo qinau. Aneenna asauku innaarunai uqeeraa. Uqeerasainanoo pupu samu aiqama Isipa maqa maaqakinaa fasiqa aanaasesaa faqa aandaufasaa faqa aiqama afuqakinaa naranauqasaa faqa aqufuani. ²³ Miqi qufanoo Mooseefa nari saunu innaarunai uqeerasoofanoo Yaaweefa innaarunai qirana faqa aakuusaa faqa pupusamu faqa quqasoofanoo maqasaa

quminau. ²⁴ Yaaweefa aaku faqa pupu samu faqa quqaseenoo aakuusaara qufanoo aiqama atinai uqi marinau. Ooqai Isipa maqannaasa miqirana sia qafaqau. Mikari kai firaafa uqanna kambiqoofaqa qafaqau. ²⁵ Pupu samu fannoo aiqama Isipa maqannaa maqusai quqaqoo ainainausa faqa aiqama faiqi anaasee faqa aandauqa faqa narinau. Mifa aiqama afuqakinaa narana faqa saqari qaqama nee marunauqa faqa itairi aqinuu. ²⁶ Kooseena maqa maaqaki Isaraee maqanaasa maruqoo kai pupu samu sia aqufinoo narinau.

²⁷ Faraoofa mina qafamaseenoo Mooseena faqa Aarona faqa naaramaseenoo qimannim-inuu. Maqee qinee aaqamamma seeqa. Yaaweefa andeeqarafa maridanoo. Qinee faqa qeeqa maqannaasa faqa aaqee marunausa maridaqa. ²⁸ Inneeqara oonuree Yaaweenara innaaru qifaqa. Maasa innaarunai qiranara faqa pupu samuara faqa qikoo uqanna qeenoo. Qinee inni idukusaanaqa fifaranoo fee qimasee qima afeekaikidaqa. Innee sia maaqoo kisaqaqasaa marifaranoo.

²⁹ Miqi qufanoo Mooseefa qimaminuu. Qinee ani maqusa naambeeqai oonureeqa qisauku Yaawee finnai uqeerasee innaaru qiananoo innaarunai qirafa faqa pupu samu faqa taikaanoo. Miqimmasaanana anee maa maqa maaqanara Yaaweenaindi fee qimasee irinnaranoo. ³⁰ Qinee iridaqa anee faqa ani ainainiranasaa rakisirausa faqa sia Yaaweenaa maasa Anutunara rufiee mariafanoo.

³¹ Mikari Isipa maqannaasa reepaa faqa raisa fooqaa ira ainaina baari faqa mandaikinai. Baari fannoo akuqamafufanoo reepaa qaqama irarara deedaqa mafufanoo pupu samu fannoo aqufinoo mandaika masanau. ³² Sia moodaa uita fannoo mandaikinai. Mifa inaaqianna ummaqi- rafa maridanoo maqee uri marunara sia mifa mandaikinai.

³³ Mooseefa Faraona maaqakiqari raudeenoo naambeeqai qumureennoo asauku innaarunai uqeerasee Yaaweenara innaaru qinau. Innaaru qufanoo innaarunai qirafa faqa pupu samu faqa aaku faqa aiqama taikanau. ³⁴ Taikafufanoo Faraofa qafamaseenoo kafaa aaganau. Mifa faqa narí ainainiranasaa rakisi marusa faqa kaqi kai kaukaataqiqa ani mariqau. ³⁵ Ooqai Yaaweefa Mooseena qimamundee kai inoo Faraofa kaukaata qimaseenoo sia Isaraee maqannaasa idukusoofaqa fiqau.

10

Pandaaqauqa moomoo kambiqaqau.

¹ Yaaweefa kafaa Mooseena qimaminoo qinau. Anee kafaa Faraoo finnai fua. Qinee Faraona faqa mina ainainiranasaa rakisirausa faqa kaukaataqira irirana nimiseeqa qeeqa faiqí sia auqaaqaa ira ainaina misa qambaana auqarara miqianaura. ² Innee inneeqa faiqi namu faqa ninaiqimara faqa, qinee Isipa maqannaasa faiqí sia auqaaqaa ira ainainannai misa mara furufarirausaika mannimaqaafannanara qimannimia. Innee aiqamausa qini Yaaweesara

irifaranoo. ³ Mooseefa faqa Aaroonafa faqa Faraoon funnai oonuree maaqi qimasee qimamiqa qiqau. Yaaweefa Qeeburu maqannaasa Anutufa aniara maaqi qidanoo. Kisaagasaa fee anee qaoo qidanee sia fee aneenna auqu mara maree muqufisee qini qimeemaanai marinnaree. Anee qini faiqi anaasee idukusainaqa oonureeqa qiniara innaaru qiaqee qidanoo.

⁴ Anee kaqi kai qaoo qimarinaqa qinee duna pandaaga moomoo mara quqasaanaqa ani maqa maaqaki qumbiqaannoo fee qinoo. ⁵ Pandaaga moomoo uqanna kambiqafi maqa ititafinaqa sia maqa qafeefaranoo. Pupusamu fannoo nari-danoo mafisai andandausa aqama nama taikeefaranoo. Saqari mafisainauqa faqa neefaranoo. ⁶ Mi pandaagausa ani ufa irira maaqaki faqa ani ainainiranasaa rakisi mariasa maaqakiaqa faqa ani maqannaasa maaqakiaqa faqa qumbiqee-faranoo. Ani akeeku akaaku maruqooqari faqa maqee anee mariannaqooqari faqa sia qafaa ainainafa mandainaina uqanna mariannoo. Miqi qimaseenoo Mooseefa raudamaki finau.

⁷ Faraoona ainainirana saa rakisi marusa Faraoona qimamiqa qiqau. Maa fasiqafa Mooseefa kisaagasaa maasa ummaara qimidanoo. Isaraee maqannaa idukusainaqa oonuree nari Anutuna Yaaweenara innaaru qiaqa. Anee sia fee qafaidanee Isipa maqa maaqa doo mandaikidanoo.

⁸ Miqi qufaqa Mooseesa Aaroonasa nifiqee Faraoofa maruqoo minisoofanoo Faraoofa qimannimino qinau. Innee oonureeqa inni Anutuna Yaaweenara innaaru qiaqa. Inneeqa fi-

ranara faqa amiqi masee qimaqimifaqa iria. Yauyausee fifaranoo fee.

⁹ Miqi qufanoo Mooseefa narí qimaminoo qinau. Maasa aiqamausa fuanauranoo. Maasa qeeqa faiqi asooqa faqa fuanauranoo. Maasa qeeqa sipsipauqa faqa mimmiuqa faqa burimakauqa faqa aiqama oonuree Yaaweena oomaqa suqamianauranoo.

¹⁰ Miqi qufanoo Faraofa qinau. Qinee Yaaweena auqu ramasee qeeqa qimana aiqamasee maaqi qidaqa. Qinee sia eedoo qianaqa innee inneeqa faiqi anaasee nifiqee fifaranoo. Innee akooqoo maasa mandaikamma qimaqarara tipundaara maqaqee miqi mariafanoo. ¹¹ Minara qinee inniara faiqi kai oonureeqa innee iri mariandee Yaaweenara innaaru qimaseeqa amooqi-aqa. Miqi qimasee narí sundiauqara qufaqa Mooseesa Aaroonasa niqoofaqa raudee fiqau. ¹² Yaaweefa mina qafamaseenoo Mooseena qimaminoo qinau. Aneenna asauku Isipa maqa maaqa amummaqa uqeerasainaqa pandaqaqauqa aniaqa. Anireeqa misa Isipa maqannaasa narana amanee aiqama naqa. Pupu samu aridanoo mafisoona namataikaqa.

¹³ Mooseefa iriseenoo narí saunu uqeerasoofanoo Yaaweefa ufaira qufanoo suani oosanaindari mi faasaana faqa mi eendanaki faqa uqinau. Kananaana ufai fannoo pandaqaqauqa moomoo maree urinau.

¹⁴ Pandaqaqauqa moomoo nukudara foora urureeqa aiqama Isipa maqa maaqaki amanaikiqa mariqau. Moomoo indaaru ooqbiqasee urufaqa kafa inaaqiana akaqausa

ooqbiqasee urufaqa, miqi kai masaida moomoosa uru maqa maaqa qumbiaqau. Ooqai sia miqirana qafaqa, naaru faqa sia qafeefaranoo. ¹⁵ Mi pandaqausa aiqama maqa rafaqafusoofanoo sia maqa ati faqa kooroo inau. Maqa faqa kai kudima arinoo marinau. Pupu samu fannoo aridanoo mafisoo andandausa faqa aiqama saqari qaqama faqa namasaqau. Sia saqari amanee arira ainaina, saqarisaa faqa ummaqira ainainasaa faqa Isipa maqa maaqaki marinau.

¹⁶ Faraofa Mooseesa Aaronasara aniaqee qufaqa aniroofanoo qimanniminau. Qinee Yaaweena inni Anutuna faqa inni faqa mandaikamma nimaqeeqa. ¹⁷ Inneeqara qini aaqarana akiiqara kafaa maqee kai minni qisaqa. Minni qiseeqa Yaaweena inneeqa Anutufinnai innaaru qifanoo maa kuquaqa ira aupurarana mara aqu qisaani.

¹⁸ Mooseefa iriseenoo raudamaku fanoo oonureenoo Yaawee funnai innaaru qinau. ¹⁹ Yaaweefa qufanoo ufai fannoo suani afu oosana qaannaindari uriufa mara quandasee suani afu keeqee marunnaindari afeeka ufai uqanna uqinoo aiqama pandaqauqa fuaqa Taatuqee ooruku nammarinni aqinau. Sia uqanna moodaa pandaqa Isipa maqa maaqaki kaqi marinau. ²⁰ Yaaweefa qufanoo Faraofa kaukaata qimasee sia Isarae maqannaasa idukusoofaqa fiqau.

Asukuna firaafa narinau.

²¹ Yaaweefa kafa Mooseena qimaminoo qinau. Anee aneenna asauku innaarunai uqeerasainanoo asukuna fannoo aiqama Isipa maqa maaqa rafaafuani. Asukuna firaafa misa nifaafai atooqanoo maridanoora foora inoo mariannoo. ²² Mooseefa nari asauku innaarunai uqeerasoofanoo Isipa maqa maaqa asukuna firaafa qaaramoo faasaana ititannimaqanau. ²³ Isipa maqannaasa mikari sia nari qafee nari qafee imariqau. Sia aana nimariqau, maaqaki kai mariqau. Isaraee maqannaasa maruqoo kai kaaqa qee marufaqa marinau.

²⁴ Faraofa Mooseena aaramaseenoo qimaminau. Aneenna maqannaasa faqa doo oonureeqa Yaaweenara innaaru qimaseeqa amooqiaga. Innee inneeqa faiqi anaasee faqa aiqama nifiqee fuaqa. Inneeqa aandaufa maaqoo quqasee inneeqa kai fuaqa. ²⁵ Miqi qimasoofanoo Mooseefa qinau. Maasa nariqa aandaufa faqa maree oonureeqa Yaaweena maasa Anutuna tatufirana suqa amianaaura. ²⁶ Maasa qeeqa aandaufa maree fuaanaura. Sia moodaa maaqoo kaqi mafi quqaanaura. Maasa qeeqa kai nana aandaufee aruseeqa Yaaweena maasa Anutuna tatufirana suqa amianauree. Maasa maqee sia iridaqa. Miqoo oonuree irianaaura. Nana aandaunoo fee tatufirana suqaanauree.

²⁷ Yaaweefa qufanoo Faraofa kaukaata qira irirana maraseenoo ititammaseenoo Isaraee maqannaasa sia idukinau. ²⁸ Miqi qimaseenoo Faraofa Mooseena qimaminau. Doo qinee qafee mariana qini qifusaaqari fifua. Qinee sia kaifaa ani qafaanaura. Ani qafaana

kuqinnaranoo. ²⁹ Mooseefa mina ufa iriseenoo Faraona qimaminau. Anee kuqaa qiananoo. Anee sia kafaa qini qiqafeennaranoo.

11

Akoonaiqi ooqa faiqiuqa kuquaqee qiqau.

¹ Miqi qimasoofanoo Yaaweefa Mooseena qimaminoo qinau. Qinee moodaa ummaara kai Isipa maqannaasa karaambaiqa faqa mina maqannaasa faqa nimianauro. Miqimmasaanoo mifa inni idukusainaqa fifaranoo. Kuqaa uqanna mifa sia reendeenasaa inni niqaannoo. Kaukaata qidanoo niqaannoo.

² Moosee anee aneenna maqannaasa maaqi qimasee qimannimia. Misa aiqama Isipa maqannaasa nári naaqa mariasa iramirifaqa nifaaqa auqi maria ainainna siruaannoo faqa koorannoo faqa auqirana nimiaqa. ³ Yaaweefa qufaqa Isipa maqannaasa Isaraee maqannaasara uriqararausee qiqau. Isipa maqanna Faraona ainainiranasaa rakisi marusa faqa aiqama faiqi anaasee faqa Mooseenara kaaqa uriqarara fee qimasee ainaina nimiraree qiqau.

⁴ Mooseefa Yaaweena mi ufana iriseenoo oonu Faraona qimaminoo qinau. Yaaweefa aniara maaqi qinoo. Eendamuqusai uqanna qinee Isipa maqa maaqaki nuanauro. ⁵ Isipa maqanna akoonaiqi ooqa faiqiuqa aiqama kuqifaranoo. Ani Faraona faiqi ani amaqa maqaaninana saaqari oosana arasee miqooqaraasa ooqa faiqiuqa faqa kaaqa ureeqarasa ooqa faiqiuqa faqa aiqama naru taikaannoo. Aiqama

burimmakauqa ooqa aanaaqiuqa faqa kuqifaranoo. ⁶ Aiqama Isipa maqa maaqaki ikifaafau qirafa firaafa mariannoo. Ooqai sia miqira iki raqarafa marinau. Kasooqagee faqa sia miqira qikiraqarafa mariannoo. ⁷ Miqi marifanoo sia uqanna faini fannoo Isaraee maqannaasa faqa misa aandaufa faqa nindafeenoo kau kau qianoo. Miqinana anee qinee Yaaweesa Isaraee maqannaasa faqa Isipa maqannaasa faqa rainnee marunnanara irinnaranoo. ⁸ Mooseefa kafa Faraoona qimamidanoo qinau. Ani ainainiranasaa rakisi mariasa aiqamausa qinee iannannai anireeqa qini doorinni niqoori saunu arafiqa qiniara doo aneenna maqannaasa nifiqee fuannee qifaranoo. Miqi qifaqa qinee doo fuanauranoo. Mooseefa miqi qimasee aranaqoofanoo aanoomaseenoo raudanau.

⁹ Raudamafufanoo Yaaweefa Mooseena qimaminoo qinau. Faraoofa ani ufa sia uqanna iriannoo. Miqi marinaqa qinee faiqi sia auqaaqaa ira ainaina moo faqa moo faqa auqaanaura. ¹⁰ Mooseefa faqa Aaroonafa faqa Faraoona oorisaa mi oosana oosanna ainainna auqoofanoo mifa sia irinau. Yaaweefa qufanoo kaukaata qira irirana maraseenoo sia niqiqoofaqa mina maqa maaqakiqari fiqau.

12

Ainnaaqarara qoomaqa oosana arasee naqau.

¹ Mooseena faqa Aaroonafa faqa Isipa maqa maaqaki Yaaweefa kafa qimanniminoo qinau.
² Innee aiqama aukuanaki maa quqoonnara maasa indaarufaa quqoona fee qifaranoo.

³ Anutufa Mooseena qimaminoo qinau. Aiqama Isaraee maqanna ma ufana qimannimia. Maa quqoonnasaa qisaukuqara taikasee faasaanasaa moodaa moodaa fasiqa oonu sipsipa aanaaqi fee mimmi aanaaqi fee nári maaqaki mariasa naaqeera maraaqa. ⁴ Mi maqanakinaasa oodaa maridaqa sia mi aandauna nama taikaaqaa inaqa misa naqa marinausa naaramasee misa faqa amana rainasee naqa. Faiqí anaasee nimana nimana kai aukusee niminaqa naifanoo taikaani. ⁵ Innee sipsipa aanaaqi fee mimmi aanaaqi fee akoona kai moodaa akuwana marasainnana, sia moo nammuana faqa aurirana faqa marinnana maraaqa. ⁶ Mi quqoonnasaa qisaukuqara taikasee qikunni qaara faqa qaara faqa marasee 14 faasaana eenee marinaqa kai aiqama Isaraee maqannaasa mi aandausa aruaqa. ⁷ Sipsipa arusaifaqa mina fidika sakaseeqa maaqa kooqiuqa dinni dinni afaimau faqa mirinni auni riranasaa faqa akuqa. Innee mi aandausa neefandinna maaqana kooqi aku amaqaqa. ⁸ Mi eendanaki kai mi aandauna amaqi idasaa kasooqammasee sukaqee mari adasana namufaqa naqa. Sia innooqee mari pauraqana aqira bereeta suqasee sipsipa amaqi namufaqa naqa. ⁹ Sia fuka naqa. Nammariki faqa sia suqasee naqa. Idaki kai akiiqa faqa aiku faqa arada faqa suqasee naqa. ¹⁰ Eendaki mina aiqama taikaaqa. Mina ataraasa sia kananaana kaqi mariani, ida qarasinanoo taikaani. ¹¹ Innee maaqimmasee mi aandauna naqa. Amunnanda maraseeqa niku aanaamu afisuseeqa, saunu

nisaukuki qumareeqa doo kaqi kaqi naaqa. Namaseeqa maaqooqari innee mi narannara Yaaweefa ainnaaqaroo narana fee qiaqa.

¹² Mi eendanaki qinee Isipa maqa maaqa aiqamai oonuree aniree idaqa aiqama ooqa akoonaiqi faqa ooqasaa andau akoonauqa maqarana faqa kuqa naruanaura. Qinee Yaaweesa Isipa maqannaasa unna anutusa faqa aupurarana nimianaura. ¹³ Fidika kooqi afaisaa aku amaqarafa mifa kai innee maria maaqana koorooiannoo. Qinee Isipa maqannaai aiqama nariqa fidaqa inni maaqa kooqisaa fidika qafamasee ainaaqaraanaura sia inni naruanaura.

¹⁴ Innee mi faasaana amaana qoomaqa faasaanara foora marinaqa qinee Yaaweesa auqaafanna ainainara naaqoo auqainaqa irisee asasifaranoo. Innee aiqama kari mi faasaannara asasifaranoo.

Pauraqa sia quqara bereeta neemaru firaa faasaanafa.

¹⁵ Yaaweefa kaifaa maaqi qinau. Qisauku dinni taikasee dinni ani qaara marasee 7 faasaana innooqee mari pauraqana aquqaa bereeta sia naaqa. Sia pauraqa aqira bereeta kai naaqa. Oomaqa indaaruuqaa faasaana inneeqa maaqaki-aqa aiqama innooqee mari pauraqana mara aqusaaqa. Oomaqaki faiqi moo fannoo innooqee mari pauraqana aqira bereeta nainna fasiqanara sia Isaraee maqannaai fee qiaqa. ¹⁶ Oomaqa indaaruuqaa faasaana faqa qoomaqa taikara faasaanara faqa naaquqara faasaanee qimasee suqufi

innaaru qiaqa. Sia moo ainainirafa mi faasaana qandasaa mariani. Narana deedaqirafa kai mariani.

¹⁷ Innee miqimmasee qoomaqa naida mari-aqa. Mi faasaana qinee inni faiqí oosana faiqí oosana Isipa maqa maaqaindaraana nifiqee aniqiafana. Innee aiqama kari mi faasaannasaa qoomaqa sakeera foora mi faasaannara asasiaqa.

¹⁸ Indaaruqaa quqoonasaa 14 faasaanasaa eenee marinaqa oosana arasee fifiinaqa mi quqoonana 21 faasaanasaa innee sia innooqee mari pauraqana aqira bereeta naaqa.

¹⁹ Innee 7 faasaana qoomaqa nara faasaana innooqee mari pauraqafa sia inni maaqakiaqa mariani. In-nikiqari faiqí moo fannoo fee moo aanaamuru ani marina fee innooqee mari pauraqana aqira bereeta nainaqa innee sia minara Isaraee maqanna fee qiaqa.

²⁰ Innee yai yai fee maridaqa sia innooqee mari pauraqana aqira bereeta kai naaqa.

Indaaruqaa ainnaaqarara qoomaqa.

²¹ Anutufa Mooseena mi ufana qimamisoofanoo Mooseefa Isaraee maqannaasa uriqararasa qimannimino qinau. Innee moodaa moodaa sipsipa akoona fee mimmi akoona timmusa fee inneeqa faiqí anaasee nimana kai mara minisee aruseeqa ainnaaqaroo qoomaqaana suqasee naidaqa asasiaqa.

²² Aandau aruseeqa fidika difaaniki sakaqa. Innee hisoopa saqari amanee raudasee minannoo fidika difaaniki raaraammasee kooqi afai dinni dinni faqa mirinni faqa akuaqa. Akuseeqa innee

sia raudaaqa, maaqaki kai marifanoo iaqaani.
²³ Fafaa eendaki Yaaweefa Isipa maqannaasa ooqa faiqi narinoo fidanoo inni kooqi mirinni faqa dinni dinni faqa fidika qafamaseenoo narinoo nimari qangiroonara qinanoo sia mi maqanaki keeqaannoo.

²⁴ Innee faqa inneeqa faiqi namu faqa naaru naaru maaqi kai iqa fuaqa. ²⁵ Innee Yaaweefa qima afeekaikamasee nimiraree qimaqoo maqannaasa oonureeqa maaqimmiqa fuaqa. ²⁶ Kasooaqee inni faiqi namu mi qoomaqana qafamaseeqa mina oosanara irafafa innee maaqi qimasee qimannimiaqa. ²⁷ Maa qoomaqafa Yaaweefa ainnaaqaroo qoomaqafa maridanoo fee qimasee qimannimiaqa. Ooqai mifa Isipa maqa maaqaki maasa ainnaaqareenoo Isipa maqannaasa ooqa faiqiuqa narinoo maasa sia darinau maqi qiaqa. Mooseefa miqi qimasooafaq Isaraee maqannnaasa iriseeqa aiqama kumma ramafi Anutunara susuiqau. ²⁸ Susummaseeqa misa daraanimafiqa Yaaweefa Mooseesa Aaroonasa nimu ufa mau fiqa aiqama ainaina andeeqasee deedaqiau.

Isipa maqannaasa akoonaiqi ooqa faiqiuqa kuqiqau.

²⁹ Mi eendanaki kai eenda amuqusai Yaaweefa Isipa maqannaa ooqa akoonaiqiuqa narinau. Faraona amaaku narí akona ainaina maraaninnana saaqari oosana arasee rumberanaki mariasa faiqi namu faqa aiqama narinau. Aandau aanaaqiuqa akona ooqasaa maqaranauqa faqa Yaaweefa narinau.

³⁰ Narusoofaqa mi eendanaki Faraofa faqa narí ainainasaa rakisi marusa faqa aiqama Isipa maqannaasa faqa aiqama tauti findifiqau. Iki faafau qirafa firaafa Isipa maqa maaqaki marinau. Sia moo maqaki kaqi mariqau, aiqama maaqaki kuqirafa marunara iki raqee mariqau.

³¹ Mi eendanaki kai Faraofa Mooseena faqa Aarona faqa naaramaseenoo qimanniminau. Inneeqara faqa inneeqa maqannaasa Isaraee maqannaasa faqa qini maqa maaqakiqari quqaseeqa inneeqa qiannai oonureeqa Yaaweena amooqiaqa. ³² Inneeqa sipsipauqa

faqa mimmiuqa faqa burimakauqa faqa doo fuaqa nani. Oonuree qini faqa amiqi amiqimma qimaqaanifeera innaaru qiaqa. ³³ Isipa maqanna faiqí anaasee misa faqa Isaraee maqannaasa niqiqeeqa qiqau. Innee kai kaqi fuaqa. Innee kaqi marifaqa maasa aiqama kuqu taikaanoora. Innee doo fuaqa.

³⁴ Miqi qimasoofoqa Isaraee maqanaasa innooqee maru pauraqana sia aqira bereeta sia suqarana difaaniki qamunnasaa kukuqamma quqasee nikumaaqa akumaree fiqau ³⁵ Isaraee maqannaasa Mooseefa qundee kai iqa Isipa maqanna nifaqa auqimaru ainainara siruaara faqa koorara faqa qamunnaara faqa iraqau.

³⁶ Yaaweefa qufaqa Isipa maqannaasa Isaraee maqannaasara uriqararausee qimasee misa iroo ainainna kaqi nimiqau. Miqunannai Isaraee maqannaasa Isipa maqanna aiqama ainaina maree fiqau.

Isaraee maqannaasa Isipa maqa maaqa min-nisee fiqau.

³⁷ Isaraee maqannaasa sandeeqa Ramaseesa maqusa quqasee Sakoota maqusai fiqau. Misa nambaqa maaqimminoo marinau, 600,000 faiqí kai mariqau, sia faiqí anaasee nisaana riqau. ³⁸ Moomoo maqusanaasa Isipa maqa maqaki ani marusa misa faqa nári burimakauqa faqa sipspauqa faqa mimmiuqa faqa maree fiqau. ³⁹ Misa aanai fidaqa fuka bereeta innooqee mari pau-raqana sia aqirana maree funa suqa naqau. Isipa maqannaasa Isaraee maqannaasa nifaqasoonara aaqmuriqa bereeta innooqee maru pauraqana sia aqirana maree fiqau.

⁴⁰ Isaraee maqannaasa 430 aukwana Isipa maqa maaqaki mariqau. ⁴¹ 430 aukwana taikarana namu faqa faiqí aiqama oosana Yaaweena aiku asauku Isaraee maqannaasa Isipa maqa maaqa quqasee fiqau. ⁴² Eendaki Yaaweefa Isaraee maqannaasa qumee rakisidanoo nifiqee finau. Aiqama aukuanaki mi eendiranara kai Yaaweenaindi fee qimasee innaaru qidaqa rakisi mariqau.

Ainnaaqaroo oomaqana suqara naakaparufa.

⁴³ Yaaweefa Mooseena faqa Aaroonu faqa qima niminau. Ainnaaqaraafanna oomaqana suqara naakapara ufa maaqimminoo marianoo. Moo maqanaindari ani marinafa sia amana mi oomaqana naannoo. ⁴⁴ Inneeqa munnimman-nai feefaurummaqoo ainainira fasiqausa fainanduqu saifaqa misa amana neefaranoo. ⁴⁵ Ufaasu ani mariasa faqa feefauruara ainaini mariasa

faqa sia neefaranoo. ⁴⁶ Aiqama mi aandau naranna deedaqia maqanaki kai nama taikaaqa. Sia uqanna madaanai maree fuaqa. Sia aandau amudaani itairiaqa. ⁴⁷ Aiqama Isaraee maqaannaasa mi oomaqanara asasiaqa. ⁴⁸ Sia fainanduqira fasiqa fannoo sia amana naannoo. Anaamuru fasiqa inni qambaana marinafa ainnaaqaroo oomaqanara asaidanoo Yaaweena auqu uqeerararee qinaqa innee mina maqaki mariasa akoonaiqiuqa fainanduqu saifaqa misa faqa mi oomaqanara asasiaqa. Miqi masaifanoo mifa Isaraee maqannaasaki kambiqara fara foora maridanoo mifa faqa oomaqa naranaki mariani. ⁴⁹ Innee faqa moo maqanna inniki ani marinafa faqa moodaa sanda mau kai fuaqa. ⁵⁰ Yaaweefa Mooseesa Aaroonasa qima nimundee Isaraee maqannaasa iqau. ⁵¹ Mi faasaanna Yaaweefa Isaraeerana aiku asauku Isipa maqasaa qaraana nifiqee finau.

13

Isaraee maqannaasa akoonaiqi ooqa faiqiuqara Yaaweena amiqau.

¹ Yaaweefa Mooseena qimaminau. ² Innee aiqama akoonaiqi ooqa faiqiuqa qini kai qimia. Aiqama Isaraee maqanna ooqa faiqiuqa faqa aiqama aandau ooqasaa maqarana akoonauqa faqa qinindi marinara qini qimiaqa.

Innooqee maru pauraqana sia aqira bereeta suqoo oomaqafa.

³ Mooseefa Isaraee maqannaasa qima niminoo qinau. Innee maa faasaannara iriaqa. Innee

karabusakiqari maa faasaanna Yaaweefa nari afeekannoo nifiqee anunara innooqee mari pauraqana aqira bereeta sia naaqa. ⁴ Innee maqee Abiba quqoona indaaruga faasaana marifaqa Isipa maqa maaqa quqasee ani mariafanoo. ⁵ Yaaweefa inni nikeeku nikaaku faqa oori kandamasee qima afeekaika masee Kannaana maqa maaqa faqa Heeta maqa maaqa faqa Amooru maqa maaqa faqa Hifita maqa maaqa faqa Yeebusa maqa maaqa faqa misa maqa maaqa inni nimiraree qinau. Mifa inni nifiqeenoo ainoo faqaa maqa ainaina rairaa imariqoo munu sainaqa innee aiqama aukwana indaaruga quqoonasaa maa oomaqana sakasee naidaqa asasiaqa. ⁶ Dinni taikasee dinni ani qaara qanda marasee ⁷ faasaana innooqee mari pauraqana sia aqira bereeta naaqa. Innee miqimmaseeqa naidaqa mi ⁷ faasaanafa taikainaqa miqoo innee Yaaweenara uriqarara fee qimasee firaa oomaqa sakasee naaqa. ⁷ Dinni qisauku taikasee dinni ani qaara qanda marasee ⁷ faasaana innooqee mari pauraqana sia aqira bereeta kai naaqa. Mi kamuqoo inni maaqaki faqa inni maqa maaqaki faqa innooqee mari pauraqafa faqa innooqee mari pauraqana aqira bereeta faqa sia uqanna mariani. ⁸ Mi oomaqana nainna kari inneeqa faiqi namu maaqi qimasee qimannimiaqa. Maasa Isipa maqa maaqakinaana Yaaweefa nifiqee anunara maa oomaqana sakasee naidaqee qiaqa. ⁹ Mooseefa kafa Isarae maqanna qimannimidano qinau. Maa oomaqana narafa inni naaqoo auqaannoo. Nisaukuki sanda rumbeera foora

faqa niqinaaqa rumbeera foora inoo maridanoo, mifa inni naaqoo auqainaqa innee Yaaweena sandufa qirana faqa mina ufa asaana rumasee irirana faqa naaqoo auqaannoo. Yaaweefa narí afeekannoo inni Isipa maqa maaqaindaraana nifiqee anunara miqiaqa. ¹⁰ Aiqama aukuanaki maa faasaana maa oomaqana sakasee naidaqa asasiaqa.

Akoonaiqi ooqa faiqiuqa.

¹¹ Yaaweefa ooqai inni faqa inni nikeeku nikaaku faqa nimirara qima afeekaikammasee Kannaana maqa maaqa nimianauree qimaqoonnai nifiqee fuannoo. ¹² Mifa inni mi maqana niminaqa innee ooqa faiqi akoonaiqiuqa Yaaweena amiaqa. Aiqama aandau ooqasaa maqarana akoonauqa Yaaweenaindi mariani. ¹³ Doonki ooqasaa maqarana aanaaqi minisee sipsipa aanaaqi moodaa maraseeqa doonki aanaaqi amaaqa maqasaifanoo doonki aanaaqi kaqi mariannoo. Innee sia moo andaunnai doonki aanaaqi amaaqa maqaani qimasee doonki aanaaqiuqa ninuka qumaree kuridiyaqa. Innee inneeqa ooqa faiqiuqa faqa Yaaweenaindikinoo marina kafaa inneeqa feefauriyaqa. ¹⁴ Kasooqaqee inni faiqi namu mi suqanara oosannara inni iraiyaqa innee maaqi qimasee qimannimiyaqa. Yaaweefa narí firaa afeekannoo maasa Isipa maqa maaqai rumberanakinaana qifiqee aninau maqi qiaqa. ¹⁵ Faraofa kaukaata qimasee sia maasa idukiraree qufanoo Yaaweefa ooqa faiqiuqa akoonaiqiuqa Isipa maqa maaqakinaana aiqama

narinau. Aiqama aandau akoona ooqasaa maqaranauqa faqa narinau. Minara maasa aiqama ooqasaa maqara aandau Yaaweena tatufirana suqa amiseeqa nári faiqi namu kafaa maraidaqa. ¹⁶ Maa oomaqana narafa maasa daaqoo auqaannoo. Nisauku sanda rumbeera foora faqa niqinaaqa rumbeera foora inoo maridanoo, mifa maasa daaqoo auqainaga Yaaweefa maasa Isipa maqa maaqaindaraana narí firaa afeekannoo nifiqee anunara irianaura.

Anutufa qasuruki faqa idauruki faqa maridanoo misa nifiqee finau.

¹⁷ Faraoofa Isaraee maqanna idukusoofaqa fimarufanoo Anutufa Firistianni qusa aatata sia nifiqee finau. Isaraee maqannaasa Firistia maqannaasa faqa rakiqa anirandee kaifaa Isipa maqa maaqai fifoo qimaseenoo nifiqee moo aatata finau.

¹⁸ Minara iriseenoo Anutufa misa nifiqeenoo aadana maqa maaqai fiqinoo taatuqee nam-mari fimarunnai nifiqee fiqinau. Fidaqa Isaraee maqannaasa rakira ainaina deedaqa muqirausa fiqau. ¹⁹ Ooqai Yooseefaafa kaqi maridanoo maaqi qimaseenoo Isaraee maqannaasara qufafa noori kandamasee mina amudaani maree firara qima afeekaikiqau. Yooseefaafa maaqi qimasee qimanniminu. Kasooqaqee Anutufa inni nifiqee finaqa innee qini qimudaani faqa maa maqusanakinaana maree fuaqa. Mooseefa minara iriseenoo Yooseefaana amudaani faqa mareenoo finau.

²⁰ Isaraee maqannaasa Sakoota maqusakiqari fifufafa aadana maqa maaqa atinni Eetama maqusai oonuree miqoo uiqaana maqauqa usakasee faigaqau. ²¹ Yaaweefa faasaana oonnamuki marufanoo oonamu fannoo nifiqee fimarinau. Eendaki mifa idauruki marufanoo idauru fannoo kaaqa qamannimaqee marufaqa eendaki faqa faasaana faqa kaqi kai fimariqau. ²² Aiqaama faasaana oonnamu misa noorinni fimarinau. Aiqaama eendaki idauru faqa miqikai imarinau.

14

Misa Taatuqee ooruku nammari taqaqau.

¹ Yaaweefa Mooseena qimaminoo qinau. ² Anee Isaraee maqannaasa qimanniminaqa misa oonurandee quandaki Piqaqiroota maqusa oorinni Mikadoora maqusa dinni taatuqee ooruku nammari dinni mina qambaana Baa Seefoona maqusa aqa uiqaana maqauqa usakaaqa. ³ Faraofa maaqi qimasee iriannoo, Isaraee maqannaasa aadana maqa maaqaki firanara rufiqaidaqa maqa maaqaki oonuree aniree idammiaafoo qiannoo. ⁴ Qinee Yaaweesa kaukaata qira irirana Faraona amiananoo mifa inni ninaaqiana nifaqee fuannoo. Qinee Faraona faqa mina rakira fasiqauqa faqa urinnaaqararanannai firaa duqu maraanaura. Miqimmasaanaqa Isipa maqannaasa qini Yaaweesara irifaranoo. Miqi qimasooafaqa Isaraee maqannaasa Yaaweena ufa mau fiqa anirandee fiqau.

⁵ Isipa maqanna karambaira Faraofa nari ainainiranasaa rakisirausa faqa Isaraee maqanna quqasee funara kaifaa oonu mafi irufanoo sia andeeqoofanoo qinau. Maasa nana furufaree qimarunaqee Isaraee maqannaasa idukuaki quqasee fidaqee. Maasa Isaraee maqannaasa quqasaafaqa fuafanoo yafee maasa ainainira faiqi kiannoo fee. ⁶ Miqi qimasoofanoo Faraofa nari qoosa rarisee maru rakira karana faqa nari rakira fasiqauqa faqa deedaqinau. ⁷ Faraofa qoosa rarisee maru rakira karausa amiqiranauqa kai sikis handareeta 600 faqa Isipa maqa maqaki maru qoosa karausa faqa minasaa rakisi marusa faqa mara quqasoofaqa Isaraee maqannaasa nifaqee fiqau. ⁸ Yaaweefa kaukaataqira irirana Faraona Isipa maqanna uriqararana amufanoo Isaraee maqannaasa idukuakiqa fidaqa nasuriqa fimarufanoo Faraofa nifaqee finau. ⁹ Isipa maqanna sudiauqa nariqa qoosauqa faqa nari qoosa rarisee maru karausa faqa daraiwauqa faqa Isaraee maqannaasa nifaqeeqa Taatuqee ooruku nammari aaqa Piqaqiroota maqusa dinni Baaraseefoona maqusa dinni qambaana uiqaana maqa usakasee marufaqa oonu paquriqau.

¹⁰ Oonuroofaqa Isaraee maqannaasa Faraona faqa mina rakira fasiqauqa faqa niqafamaseeqa tautumaseeqa rufiidaqa Yaaweefa dadaaqianifeera faaqariqau. ¹¹ Faaqaridaqa Mooseena qimamiqa qiqau. Isipa maqasaa madika sia amanaikifanee anee maasa qifiqeenanee maa aadana maqa maqanaki kuquaneera aninanee.

Anee maasa Isipa maqa maaqakinaana qifiqee anianafa quandafina qafaa. ¹² Ooqai maasa ani ufa qimamiqiafana maasa Isipa maqa maaqaki kaqi maridaqa maa ainainafa kambiqaanoo fee qiqiafana. Maasa ani qimamiqiafana saina maasa kaqi Isipa maqannaasa ainainira faiqi kiqa marianee qiqiafana. Miqoo maridaqa misa ainainira faiqikirafa amiqirafa mariqini anee maa aadana maqa maaqanai fifau qifiqee minisaanaqa kuquanaura.

¹³ Mooseefa misa ufa iriseenoo qimanniminoon qinau. Innee sia rufiaaqa, kaqi nimatautasee maridaqa Yaaweefa innee asumu mari-aqeera itita nimaqainaqa qafeefaranoo. Maqee innee Isipa maqannaamiqimasee nindafaaqa. Innee maaqooqari sia kafaa nindafeefaranoo. ¹⁴ Yaaweefa inni rakirana nimaqa maqa finoo misa saimbaqa rakuannoo. Miqinaqa innee sia moo ainaina auqaaqa, kaqi kai mariaqa.

¹⁵ Miqi qimasoofanoo Yaaweefa Mooseena qimaminau. Anee nanaree qiniara dadaaqiannee qimasee faaqaridane. Anee Isaraee maqannaasa qimanniminaqa noori munduqaannai fuaqa. ¹⁶ Anee aneenna saunu nammari amummaqa uqeeraa. Miqimma sainaqa nammari raina finaqa Isaraee maqannaasa amana aadana maqasaa taqaaqa. ¹⁷ Qinee Yaaweesa Isipa maqannaasara qianaqa kaaqa firaqoo kaukaataqira irirana marasee Isaraee maqanna ninaaqianna nifaqee fifaranoo. Qinee Faraona faqa mina sundiaufa faqa mina qoosa rarisee mari karausa faqa daraiwauqa

faqa rakirana urinnaaqararanannai firaa duqu maraanaura. ¹⁸ Qinee misa urinnaaqarama saanaqa misa qiniara Yaawee fee qifaranoo.

¹⁹ Anutuna qangiroom fannoo Isaraee maqannaasa noorinni mariufa aiqareenoo ninaaqiannai finau. Oonnamu faqa miqi kai inoo aiqaree ninaaqiannai finau. ²⁰ Mi oonnamufa Isipa maqannaasa dinni Isaraee maqannaasa dinni qambaana marinau. Mi oonnamufa Isipa maqannaasa asukuna nimisee Isaraee maqannaasa kaaqa qamannimaqanau. Miqinoo marufaqa mi eendanaki Isipa maqannaasa faqa Isaraee maqannaasa faqa sia nari aqa nari aqa fiqau.

²¹ Mooseefa asauku nammari amummaqa uqeerasoofanoo Yaaweefa suani afu urimarunaindaraa afeeka ufainnook ooruku nammari rainanau. Mi ufaifa mi eendanaki uqidanoo mariufanoo ooruku nammari rainasoofanoo aadana maqa koorooinau. Miqimmafufanoo nammari rainanau. ²² Miqimmafufaqa Isaraee maqannaasa ooruku nammari qambaana aadana maqasaa taqaqau. Dinni dinni nammari fannoo safasara foora inoo marufaqa fiqau.

²³ Isipa maqannaasa misa niqafamaseeqa misa ninaaqianna nifaqeeqa nammari qambaana ooquraqau. Isipa maqannaasa nariqa qoosauqa faqa nariqa qoosa rarisee maru karausa faqa nariqa daraiwaauga faqa Isaraee maaqanaasa nifaqee nammari ooku raqau. ²⁴ Iaqarooka Yaaweefa oonnamukiqari faqa idaurukiqari faqa Isipa maqannaasa nindafamaseenoo maparaa irana niminau. ²⁵ Yaaweefa qufanoo qoosa rarisee maru karausa misa niku utusamafufaqa

firara firaaqoo anuqi mariqau. Miqufaqa Isipa maqannaasa qiqaau. Yaaweefa Isaraee maqannaasa saaroo qinoo maasa daridanoo. Maraifaqa quqasee fua.

²⁶ Miqimasoofanoo Yaaweefa Mooseena qimaminau. Aneenna asauku nammari amummaqa uqeerasainanoo kafaa nammari fannoo quminoo Isipa maqanna nári qoosa rarisee maru karausa faqa daraiwaauga faqa rafaaga fuani. ²⁷ Mooseefa iriseenoo asauku nammari amummaqa uqeeranau. Miqimma soofanoo iaqarooka nammari fannoo kafaa oonurandeenoo ooqai mariundee kai mafinau. Isipa maqanna sandeeqa fuaneera qufanoo Yaaweefa misa mareeqee nammariki aqinau. ²⁸ Nammari fannoo kafaa quminoo Faraona rakira fasiqauqa faqa qoosa kara faqa daraiwaauga faqa aiqama Isaraee maqannaasa nifagee nammariki ooquroosa aiqama rafaaga finau. Sia uqanna moodaafa kaqi marinau.

²⁹ Isaraee maqanna ooruku nammari qambaana aadana maqasaa taqaqau. Nammari dinni dinni safasara foora inoo marufaqa fiqau. ³⁰ Mi faasaanna Yaaweefa Isaraee maqannaasa Isipa maqannaasa nisaukukinaana maranau. Marasoofaqa Isaraee maqannaasa quandafi niqafooafa Isipa maqanna nammari afaiqara kuqiqqeeqee mariqau. ³¹ Isaraee maqannaasa Yaaweena moo ainaina afeeka eeraarirana rakiranaki Isipa maqannaasa urinnaaqaroonara irufanoo naaquqooafa nári saqarikirana Yaaweenasaa faqa mina ainainira

faiqi Mooseenasaa faqa mundiqau.

15

Mooseena Idi.

¹ Mikari Mooseefa faqa Isaraee maqanna faqa maaqi qimasee Yaaweenaa amooqira idi raqau.

Qinee Yaaweenara idi raanauranoo.

Mifa rakiranaki uriqarainara miqianaura.

Mifa qoosauqa faqa qoosasaa marusa faqa ooruku nammariki mara aqinara idi raanaura. ² Yaaweefa qini afeeka ititarafa maridanoo.

Mifa qini asumu maroofa maridanoo.

Mifa qini Anutufa marifaqa qinee mina amooqianaura.

Qini qikoona Anutunafa marifaqa qinee mina afeekara idi raanaura. ³ Yaaweefa afeeka rakira fasiqa maridanoo.

Mina auqu Yaaweefa maridanoo. ⁴ Mifa Isipa maqanna sundiauqa faqa misa qoosa karauqa faqa rafusu ooruku nammariki aqinoo.

Mina uriqarara sundiauqa Taatuqee Ooruku Nammariki ukuqneea. ⁵ Ooruku nammari faruma fannoo misa rafaqa fusaifaqa misa oonara foora meemaqoo maqasaa ooqu maridaqa.

⁶ Oo Yaawee ani asauku uqannai asauku fannoo naaquqara afeeka maridanoo.

Mi asaukufa namuqaa naruseenoo utitiqeenoo.

⁷ Aneenna firaa uriqararanannai aneenna namuqaa rafusu aquananoo.

Ani aanoo qirafa ida dudaqasaaqari qeera foora mannimaqaananoo. ⁸ Anee ooruku nammari fuaqasaanoo nammari mandi mareenoo aqaanara foora ooru finoo.

Nammari dinni dinni innooqa maree safasara foora ooru finoo.

Nammari dinni dinni raina fufanoo maqa meemaqoo afeekaika minoo.

⁹ Namuqaauqa maaqi qiqau.

Maasa misa nifaqasee qumaraanuranoo.

Misa qumaraseeqa misa amiqira ainaina maasa didimarina aiqama maraanaura.

Maasa qeeqa rakira paipanannai naruseeqa misa aiqama ainaina mararee qia. ¹⁰ Miqi qiafana anee Yaaweefa moodaannai aidoo fuaqasaanoo Isipa maqannaasa ukuqnea.

Miqimma saifaqa misa ooniara foora firaa difukunaki ooqu fia. ¹¹ Yaawee, yafee unna anutusakiqari ani fooqaafa maridanoo fee. Sia moo fannoo.

Yafee ani amana maridanoo kaaqa naaquqara andeeqarafa maridanoo fee.

Yafee faiqi sia amana auqaqaa ira ainaina faqa afeeka ainaina anee imarianandee masee auqaannoo fee. ¹² Aneenna asauku uqannannai uqera saananoo maqa fannoo namuqaa nambiqeenoo.

¹³ Aneenna qima afeekaikiranasaa mapukusee maridana faiqi anaasee mandainainaki mariusa nifiqa maree fimariananoo.

Aneenna afeekannoo misa indaarunni
kamma nimaqa maree aneenna

naaquqara andeeqara maqasaa quqanni seennaranoo. ¹⁴ Anaamuru minara irifanoo naaquqeenoo naindiri raannoo, Firistia maqannaasa iriafanoo maparaairafa misa qumareenoo. ¹⁵ Idooma maqannaa karaambaiquuqa faqa iriafanoo naaquqeenoo.

Mooapa maqannaa afeeka fasiquuqa faqa naindiri raidanoo.

Kannaana maqannaasa afeeka faqa nammari kidanoo. ¹⁶ Maparaa irafa faqa firaa rufi- arafa faqa misaki maridanoo.

Misa ani Yaaweena afeeka qafamasee naaquqaiquuqa kaqi muquriqa mariafaqa ani faiqi anaasee karabusakinaana iduku saanausa misa nifusaa fiqaraidaqa. ¹⁷ Anee misa nifiqa maree aneenna aaqanasaa munuseenana asumu ainainara fooru ummaqu saananoo.

Anee Yaaweefa aneennara utaaqama qaanna maqusanaki munusaananoo.

Amaana maqa aneenna usakaqaanna maqusanaki munusaananoo. ¹⁸ Anee Yaaweefa naaru naaru uriqarara karaambaiquuqa marinnaranoo.

Miriamma nammari idi.

¹⁹ Isarae maqannaasa ooruku nammari qambaana aadana maqasaa taqaquu. Fitaqafuqu Isipa maqannaasa qoosa kara faqa nari qoosauqa faqa nari daraiwauqu faqa mi ooruku nammari mariara qufanoo quminoo misa rafaqu finau.

²⁰ Aaroonaa anasaafa Miriama nammarifa Anu-tuna tamummaqara anaasee marufa marinau.

Isipa maqannaasa nammariki kuqutaika fufanoo dukaanaa qumareenoo aridanoo idi ranau.

Anaasee aiqama qafamaseeqa nári dukaanaa maree mina faqa oonuree aridaqa niqoori raqee mariqau. ²¹ Miriama nammarifa maaqi qimasee idi ranau.

Yaaweenara idi raaqa.

Mifa rakirana firaaqoo uraaqareenoo,

mifa qoosauqa faqa qoosaa nimariasa faqa ooruku nammariki rafusu aqinoo.

Sukaqee mari nammarifa.

²² Mooseefa Isaraee maqanna taatuqee ooruku nammarindaraana nifiqeenoo Suraa aadana maqa maaqaki quqanau. Qaaramoo faasaanasaa aadana maqa maaqaki fidaqa sia nammari paquriqau. ²³ Misa Maraa maqa maaqaki oonureeqa nammari moo paqurimasee noofanoo suka narufaqa sia naqau.

Minara mi maqa maaqana auqu Maraa fee qiqau. Mi auquna oosana sukaqee mari fee qiqau.

²⁴ Isaraee maqannaasa Mooseena aanoo qimamaqaidaqa qiqau. Maasa nana nammari fee naanaaree.

²⁵ Mooseefa iriseenoo afeekaika maseenoo Yaaweenara innaaru qinau. Innaaru qufanoo Yaaweefa Mooseena saqari moo uqafiqoofanoo Mooseefa mi saqarina nammariki aqusoofanoo nammari amiqinau. Miqoo Yaaweefa narí sanda ufa mi mau fuaqeera nimiseenoo miqoo misa

nimana masee qafanau. ²⁶ Yaaweefa qiman-niminoo qinau. Innee qini ufa qaidusiqa qinee andeeqara ainainee qimarunnana auqeeqa kafa qini sanda ufa mau fifaqa qinee sia manda aupurarana Isipa maqanna nimiafannandee iqa inni nimianaura. Qinee Yaaweesa inni aurirana taikannisee marunau maridaqa.

²⁷ Miqooqari Isarae maqannaasa fiiuufaqa Eerimma maqa maaqaki oonuraqau. Miqoo qisaukuqara taikasee qikunni ooqu qaara marasee 12 nammari maqakiqari ururee maruna faqa fasaafana fooqaa ira saqari moomoo 70 marinau. Miqoo nammari afainni misa uqaana maqa usakasee mariqau.

16

Isarae maqannaasa mannaa faqa ufini faqa mara naqau.

¹ Isarae maqannaasa Isipa maqa maaqaindari quqasee anuqooqari inaaqianna quqoona 15 faasaanasaa Sinai aqana dinni Eerimma maqa maaqa dinni qambaana Sinnaa aadana maqa maaqaki oonuraqau. ² Misa aiqamausa aadana maqa maaqai funara Mooseesa Aaroonasa kaukaata qimannimaqasee qiqau. ³ Maasa Isipa maqa maaqaki mariafannaqoo Yaaweefa daruaqaana. Miqoo maasa maridaqa aandau faqa akaqa narana maasa didi maruna maasa qimana kai neemariqafana. Inneqara miqooqaraana maasa qifiqeeqeeqa maa aadana maqa maaqanaki quqasaafaqa aandaroo darinaqa kuqu taikaanaura.

4 Yaaweefa misa ufa iriseenoo Mooseena qimaminoo qinau. Qinee maqee inni aiqamausa naranara qiananoo innaarunaindari aakuara foora aqufina mara neefaranoo. Faasaambaasaana narana quqasaanaga faiqí anaasee raudamafiqa moodaa faasaana amanakai maree marifaranoo. Qinee

miqimmasee misa nimanamasee qafaanaura. Misa qini ufa irifaree sia fee irifaree.

5 Moodaannai qisauku taikasee dinni ani moodaa marasee 6 faasaana qaara eenda narana amanasaa mara deedaqamma quqaaqa.

6 Mooseesa Aaroonasa Isaraee maqannaa aiqama suqusee qimannimiqa qiqau. Maqee eenee marinaga innee Yaaweenara Isipa maqa maaqaindari nifiqee anunara irifaranoo.

7 Kananaana innee Yaaweefa maasaki maridanoo daroo daraa ida kaaqa qeemarina qafeefaranoo. Innee minara aanoo qimariana doo mifa irinoo. Innee sia maaqanda rau qimariafanoo fau. Maaqanda faiqí faiqi kai maridaqa mina naakapurufa mau fidaqa mina kai qimannimidaqa.

8 Mooseefa kafaa qimanniminoo qinau. Eendinanoo Yaaweefa aandau niminaqa neefaranoo. Kananaana bereeta fooqaana inni nimana kai nimiannoo. Innee mina firaagoo aanoo qimarianara miqiannoo. Innee maasara aanoo qimariana sia maasarau miqi mariafanoo, Yaaweenara aanoo qimariafanoo.

9 Mooseefa Aaroonaa qimaminoo qinau. Anee Isaraee maqannaa aiqama qima niminaqa Yaaweena oorinni ani kikiqiaqa. Mifa misa

aanooqira ufa irinara miqiaqa.

¹⁰ Aaroofa faiqí anaasee ufa qimannimi maru-
faqa quandafi aadana maqa maaqai qafóofanoo
oonamuki Yaaweena daroo daraa ira kaaqa
qarafa koorooinau.

¹¹ Yaaweefa Mooseena qimaminoo qinau.

¹² Qinee Isaraee maqanna aano qira ufa
doo iriqa. Maaqi qimasee qimannimia fafaa
eendinoo mammandi marinaqa misa aandau
nimianauna duna kananaana uqanna bereeta
fooqaana nári narana nimana kai nimianauna.
Nimisaanaqa innee qini Yaaweesa inneeqa
Anutusara irifaranoo.

¹³ Miqi qimasoofanoo eendi marufanoo
afidauqa moomoo qaamaraidaqa anirameeqee
uiqaana maqusa amanaikiqau. Kananaana
qififaramu uiqaana maqa aiqama fiqú fiqú
inoo marinau.

¹⁴ Qififaramu taikafufanoo
adamanna ainaina kaqikaafauqa aadana maqa
mau marinau. Mi ainainafa pupusamuara foora
kaqikaafauqa marinau.

¹⁵ Isaraee maqannaasa
mina qafamaseeqa mina oosanara randeeqa
narí qimami narí qimamiqa qiqau. Maana nana
ainaina fee maridanoo fee qiqau. Miqi qufanoo
Mooseefa maaqi qimasee qimanniminau.
Yaaweefa narana naaqeera nimidannoo.

¹⁶ Yaaweefa maaqi qimasee qimanniminau.
Innee inneeqa faiqi anaasee faqa inneeqa
nimana kai maraaqa. Inneeqa maaqaki mariasa
nimana nimana kai susufinna qumbiqa quqaqa.

¹⁷ Isaraee maqanna irisee miqimmiqau.
Akaqausa moomoo maroofaqa akaqausa qoodaa
maraqau.

18 Aiqamausa suqusee narí amani narí amani masee qafóofanoo akaqausa moomoo suqufanoo akaqausa oodaa suqiqau. Moomoo suqusa namasoofanoo nimuaqumminau. Oodaa suqusa misa faqa namasoofanoo nimuaqu kaimminau. Aiqamausa nári nimana kai suqiqau. 19 Mooseefa qimanniminoo qinau. Sia ataraasa duna nararee qimasee quqaaqa. Aiqama naaqa.

20 Miqi qufaqa akaqausa Mooseena ufa rukiasee duna kananaana nararee qimasee quqasoofanoo putaa undufanoo qimi kai qumbiqoofanoo Mooseefa aranaqoofanoo aanoomannimaqanau.

21 Aiqama kananaana nári nimana kai suqusaida neemariqau. Kaqi mafisoofauqa suani urureenoo ididiufanoo nammari nammarmima taikanau. 22 Dinni ani moodaa marasee 6 faasaanasaa qaara kari suqarana amana kai maraqau. Miqi masoofaqa Isaraee maqannaasa uriqararausa aniree mi ainainnara Mooseena qimamiqau. 23 Mooseefa iriseenoo moo ufa maaqi qimasee qimanniminau. Duna Yaaweena naaquqara idooara faasaana mariannoo. Mi faasaanna minaindi mariannoo. Innee nana ainainee suqararee qinnana maqee suqaaqa. Kaqi marinna narana aaduma quqaaqifanoo marinaqa duna suqa naaqa.

24 Misa Mooseefa qimannimundee iqa dunaindi kaqi maaqaki quqaaqau. Iqaqoofaqa qafóofanoo sia putaa inoo qimi marinau amiqinoo marinau. 25 Mooseefa minara qimanniminoo qinau. Doo maqee mina naaqa. Maqee Sabata idooara faasaana Yaaweenaindi

maridanoo. Minara innee fuka narana uiqaana maqusa naambeeaqara mararafa sia mariannoo. ²⁶ Innee qisauku dinni taikasee dinni ani moodaa marasee 6 faasaana narana suqu quqaqa. Qisauku dinni taikasee dinni ani qaara marasee 7 faasaana idooara faasaana marinaqa sia miqoo narana mariannoo.

²⁷ Qisauku dinni taikasee dinni ani qaara marasee 7 faasaanasaa akaqausa narana suquanee qimasee oonu qafoofanoo sia marinau. ²⁸ Anutufa mina qafamasee Mooseena qimaminau. Innee kisaagasaa fee qini ufa rukiidaqa sia qini sanda ufa afaqefaree. ²⁹ Innee iriaqa. Qinee Yaaweesa idooara faasaana nimiga. Miqunnanara qinee dinni taikasee dinni ani moodaa marasee 6 faasaanasaa qinee qaara faasaana narana amana kai nimianaura. Aiqamausa mi faasaana inneeqa mariaqoo kai mariaqa, sia kasiaqa. ³⁰ Faiqi anaasee minara iriseeqa dinni ani qaara marasee 7 faasaanaikufaqa sia ainaini mariqau. ³¹ Isaraee maqannaasa mi narannara mannaa fee qimariqau. Mifa ooroorana qaama fooqaafa eekara arirafa marinau. Mina namasoofofanoo mina adiafaa irafa ookasaasa anoonannai auqira biskitara foora imarinau. ³² Mooseefa Yaaweena ufa iriseenoo maqi qimasee qimanniminau. Yaaweefa inniara maqi qidanoo, qinee mannaa nimmunnana akaqana afeeki mara quqaqai marinaqa inneeqa ninaiqimara nikaaku uqannifiqaidaga maqi qimasee qimannimiaqa. Yaaweefa Isipa maqasaqari maasa aadana maqasaa nifiqee

anireenoo qimufaqa naafannanee qimasee uqannifiqaaga.

³³ Miqi qimasee qimannimiseenoo Mooseefa Aaroonaa qimaminau. Anee qafee moo mara maree mannaa suqeeqee Anutuna afusaa quqasainaga kasooaqee kambiqainausa qafaaga.

³⁴ Yaaweefa Mooseena qimamundee inoo Aaroonafa mi naranna mara mareenoo moodaanaki kira bookisa aaqa quqasoofanoo marinau. ³⁵ Isaraee maqannaasa 40 aukuanaki mannaa neemariqau. Mi naranna naqa fifiufaqa Kannaana maqasaa nariqa mariraree quqoo oonuraqau. ³⁶ Mikari misa ummaara amana masee qafee marufa qaaraqanda marinau. Moo fannoo moodaa kaqikaa susufinna amana marinau. Moo fannoo qisaukuqara 10 kaqikaa susufinauqa amana marinau.

17

Oonikiqari nammari quminau.
(Namba 20:1-13)

¹ Yaaweena ufa mau fiqa Isaraee maqannaasa Sinnaa aadana maqa maaqakiqari quqasee fiqau. Fidaqa misa maqusa maqusa faiqaqa fimariqau. Misa Reefidimma maqa maaqaki nammari sia maruqoo oonu mariqau. ² Sia marufaqa misa Mooseenara kaukaata qidaqa qiqau. Anee nammari nimina naanee qufanoo Mooseefa qimanniminoo qinau. Innee nanaree qini aanoo qima qimaqaidee. Nanaree innee Yaaweena amanam-masee qafaidee.

³ Isaraee maqannaasa nammariara kaaqa nid-ufaqa Mooseena kaqi kai aanoo qimamaqee mariqau. Misa maaqi qiqau. Nanaree anee maasa Isipa maqa maaqaindaraana qifigee mini saananoo fee nammariara didirafa maasa faqa maasa faiqi namu faqa maasa aandauqa namu-faqa kuqa daruannoo fee.

⁴ Miqi qufanoo Mooseefa afeekai kammaseenoo Yaaweenara innaaru qidanoo qinau. Oo Yaawee qinee maa fasiqa anaaseesa naqifeemma nimaqaanauree. Misa qusasaa oonisamu qini darifaranoo. ⁵ Yaaweefa Mooseena qimaminoo qinau. Moosee anee Isaraee maqannaasa uriqararausa nifigee indaaru fua. Ooqai anee Niru nammari arunna saununa faqa maree fua. ⁶ Qinee Sinai aaganasaa inni noorinni oonisaa kikiqiqa marianaara. Aneenna saunu samu ooni arusainanoo nammari minakiqari quminaqa faiqi anaasee naaqa. Miqi qufanoo Mooseefa Isaraee maqanna uriqararausa nifusaa miqimandoofanoo nammari quminau. ⁷ Misa mi maqa maaqana auqu qaara auqu raqau. Masaa faqa Meeribaa faqee qiqau. Mi auqu qanda oosana amana masee qafarafa faqa aanoo qirafa faqee qiqau. Aanoo qidaqa qiqau. Yaaweefa maasa faqa maridanoo fee sia fee maridanoo fee. Misa mi ufanannai Yaaweenana amana masee qafaqau.

Isaraee maqannaasa Amareeka maqannaasa faqa rakiqau.

⁸ Isaraee maqanna Reefidimma maqa maaqai marufaqa Amareekana aiku asauku anireeqa

misa nariqau. ⁹ Mooseefa misa nidafamasee Yoosuaana qimaminoo qinau. Anee akaqa fasiqauqa mara quqasainaqa duna kananaana Amareekana aiku asauku faqa oonu rakuqa. Qinee aaqanasaa Anutufa marana nuannee qimasee qimaqimu saununa uqusee kikiqiga mariana. ¹⁰ Yoosuaafa eedoo qimasee kananaana iqaqoofanoo doo Amareekana aiku asauku faqa rakirara nifiqee finau. Fufaqa Mooseefa faqa Aaroonafa faqa Hurafa faqa aaqanai ooru fiqau. ¹¹ Mooseefa aaqanasaa kikiqamambufanoo asauquqara uqerasoofaqa Isarae maqannaasa rakiranaki afeekaikiqau. Kafa nari asauku muqufisoofaqa Amareekana aiku asauku rakiranaki afeekaikiqau. ¹² Mooseena asauku anuda qoofaqa Aaroonasa Hurasa ooni ufiqisoofanoo Mooseefa minasaa ooqu marifufanoo Aaroonasa Hurasa Mooseena asauquqara uaqeeufanoo kisaaqasaa marufanoo suani keeqanau. ¹³ Miqimmasee uaqeeunara Yoosuaafa faqa nari rakira fasiqauqa faqa Amareekana aiku asauku amiqimmasee naruqaraasiqau.

¹⁴ Miqimmasoofanoo Yaaweefa Mooseena qimaminau. Anee papiqaki maa rakiranara akararumma quqaa. Miqinoo marinaqa kaqi iriqa nuaqa. Yoosuaana qimamia. Qinee Yaaweesa Amareekana aiku asauku kuridi taikasaanaura. ¹⁵ Rakirafa taikafufanoo Mooseefa ooniuga qumareenoo mi maqa maqanaki qainda auquseenoo mi qaindana auqureenoo Yaaweefa qini rakira saqari fee qimasee mi qaindana auqu ranau. ¹⁶ Mooseefa

kafaa qinau. Innee Yaaweena rakira saqari uqeeraaqa. Yaaweefa kaqi kai Amareekana aiku asauku faqa naaruara rakida mariannoo.

18

Yeetooroofa Mooseena ani qafanau.

¹ Yeetaroofo Middianna maqannaasa aanaiqiki- rafa Mooseena airaamaku marinau. Aiqama ainaina Anutufa Mooseena faqa Isaraee maqannaasa faqa dadaaqa marunara faqa Isipa maqa maaqakinaana nifiqee anunara faqa Yeetaroofo irinau.

² Iriseenoo mifa faqa Mooseena anaaqa Sipooraa nammarina maqasai quqasee anuna afiqee aninau. ³ Mina faiqiqara Keerasoommana faqa Eerieesarana faqa nifiqee aninau. Mooseefa maaqi qinau. Qinee aanaamuru maqa maaqaki asaqiraafai ani maridee qimasee nari amaaku auqureenoo Keerasoommanee qinau.

⁴ Mooseena inaaqianaa faiqi auqu Eerieeseerafa marinau. Mina anoofa maqasoofanoo Mooseefa qinau. Qini qikoona Anutufa qini dadaaqinoo Faraona duru feefa ookinaana qini ititaqisainaree qinoo mina auqu Eerieesaranee qinau.

⁵ Yeetaroofo Mooseena anaaqa faqa mina faiqi qara faqa nifiqeenoo aadana maqa maaqaki naaquqara aaqana aaqa Mooseefa uiqaana maqa usakasee maruqoo aniranau. ⁶ Yeetaroofo Mooseenara ufa quqaidanoo qinau. Oonuree maaqi qimasee qimamiaqa. Ani airaamaku faqa ani faiqi anaasee faqa anidammiaafoo qia.

⁷ Mooseefa mi ufana iriseenoo narí airaamaku oonu aanai paqurimaseenoo mina oorinni aqoori saunu arafufanoo mina amooqa nanau. Miqi masoofaqa nári mariranara narí iree narí iree maseeqa doo Moosena uiqaana maqaki keeqaqa. ⁸ Minaki ooru maridanoo Mooseefa narí airaamaku oosana oosana aupurarana Yaaweefa Faraona faqa Isipa maqannaasa faqa nimiseenoo Isaraee maqannaasa maroonara qimaminau. Mifa Isaraee maqannaasa aanai anidaqa moomoo ummaara maree marufanoo Yaaweefa dadaaqunara faqa qimaminau. ⁹ Yeetaroofa mi aiqama ufana iriseenoo asasinau. ¹⁰ Asasammaseenoo qinau. Yaaweefa Faraona asaukukinaana faqa Isipa maqannaasa nisaukukinaana marainara mina amooqia. Yaaweefa narí faiqí anaasee rumberana kinaana idukunara mina amooqiaqa. ¹¹ Doo maqee qinee iridaqa, Yaaweefa aiqama unna anutusa urinnaaqararafa maridanoo. Isipa maqannaasa inni mandaikamma nimaqee marufanoo inni idaaqamma nisoonnai mifa aiqama unna anutusa urinnaaqararafa maridanoo. ¹² Miqi qimaseenoo Yeetaroofa aandau marasee aruseenoo muduka ida aiqama qama taikara tatufirana Anutuna suqa aminau. Kafaa mifa akaqa tatufirana faqa Anutuna suqa aminau. Aaroonafa faqa Isaraee maqannaasa uriqarararusa faqa anireeqa Mooseena airaamaku faqa Anutuna amooqidaqa mi naaquqara qoomaqana naqau.

Misa akaqa siaasa mara quqaqau.

(Lo 1:9-18)

¹³ Iaḡoo kananaana Mooseefa findifinoo narí maḡanna qambaanaa oonureenoo misa kootauḡa irinau. Kananaana oosana arasee kootinoo fifi ufanoo eenda kai maḡanau.

¹⁴ Yeetarooḡa Mooseena kadaapirirana ḡafamaseenoo maḡi ḡimaseenoo Mooseena ḡimaminau. Anee nanaree aneennaraa maa saikausa auḡaidanee. Faiḡi anaasee kananaana kootirara ani marida rakisi mariafanoo eendidanoo.

¹⁵ Mooseefa iriseenoo ḡimaminoo ḡinau. Qinee miḡianaḡa faiḡi anaasee ḡinee unnannai aniree Anutuna aidiranara irifaranoo. ¹⁶ Qaara fasiḡa ḡara ufa rainaida narí afu mau narí afu mau maseeḡa ḡinee unnannai aniraafaḡa ḡinee andeeḡai fasiḡanara maafa andeeḡee maḡi ḡimaseeḡa Anutuna sanda ufa naakapaidaḡa.

¹⁷ Yeetarooḡa Mooseena ḡimaminoo ḡinau. Anee sia andeeḡee mariananoo. ¹⁸ Anee miḡidana aneenna afeeka taikainaḡa maa fasiḡa anaaseesa faḡa miḡi kai ifaranoo. Aneennaraa sia amanaiki mariananoo. ¹⁹ Anee maḡee ḡini ufa iria. Qinee amiḡira aakapara ufa ani amianauro. Anee irinanoo Anutufa ani faḡa marida dadaaḡiannoo. Anee andeeḡaseenana Anutuna afusaa aanaiḡikina maridana faiḡi anaasee ummaara Anutuna ḡimami mariananoo. ²⁰ Anee Anutuna sanda ufa ḡimannimisee andeeḡara marirana oosana naamua ḡimasee misa ifandinna ainainara faḡa ḡimannimia. ²¹ Qima nimiseenana anee mina

amuaaqa irirana faqaa fasiqauqa mara quqa-sainaaqaa Isaraee maqannaasa uriqararusaikiqaa mariaqaa. Akaqausa wan tauseenna (1,000) fasiqa aanaaseesaa rakisifaqa akaqausa wan handareetasaa 100 rakisifaqa akaqausa fiftisaa 50 rakisifaqa akaqausa teennasaa 10 rakisifaqa. Misa Anutunara rufiee mariasa maridaqa misa andeeqara oosana faqaasa maridaqa sia umee raqee munnimma maree marinausa mariaqaa. ²² Mi fasiqausa aiqama kari faiqi anaasee koota ufa irimarinausa mariaqaa. Moo afeeka ainaina firaa ainaina kambiqafinaqa maree mini ani amifana anee mina andeeqaa. Kaqikaa ainaina nari kai andeeqaaqa. Misa miqimandee ani qummaara raina maraifanoo ani afaaqa aufadaani. ²³ Anutufa eedoo qinana qini ufa mau finana sia kudoosaapeennaranoo. Miqinaqa maa fasiqa anaaseesa aanoo qirafa taikafinaqa quqasee ni-maaqa fifaranoo.

²⁴ Mooseefa Yeetaroonaa ufa iriseenoo mi mau kai finau. ²⁵ Mooseefa irirana faqaasa Isaraee maqannaasa kinaana mara quqasoofaqa uriqararusaikiqau. 1,000 fasiqasaa rakisirausa faqa 100 fasiqasaa rakisirausa faqa 50 fasiqasaa rakisirausa faqa 10 fasiqasaa rakisirausa faqa mara quqasoofaqa rakisimariqau. ²⁶ Misa aiqama kari siaasara foora naaruara mariqau. Maridaqa kaqikaa kootauqa misa andeeqee mariqau. Firaa koota Moosee funnai maree fimariqau.

²⁷ Miqimmasee Mooseefa Yeetaroonaa amandama soofanoo amaaqa finau.

19

Isaraee maqannaasa Sinai aaqana aikunni ani mariqau.

1-2 Isaraee maqannaasa Isipa maqa maaqakiqari Reefidimma maqa maaqaki ani mariufaqa miqooqari qaaramoo uqoona indaarufaa faasaanasaa Reefidimma maqa maaqaindari Sinai aadana maqa maaqai oonu mariqau. Miqoo misa Sinai aaqana aikunni uigaana maqa usakasee mariqau.

3 Mooseefa miqooqari Sinai aaqanasaa Anutuna faqa ufa qiraree qimasee ooru finau. Yaaweefa aaqana saaqari Mooseena aaramaseenoo qimaminau. Anee Yakooboona aiku asaku Isaraee maqannaasa maaqi qimasee qimannimia. 4 Innee qini oosana qafee mariafanoo. Qinee Isipa maqanna narunnana innee qafaafanoo. Qinee inni quqaumu aanaaqiara foora itateeqeeqa qiqaosasaa quqaseeqa uqeereeqee qeeqa marunannai quqagaunaqa mariafanoo. 5 Innee qini ufa iriseeqa qini moodaanaki kira ufa mau fiqa qini faiqi anaasee marifaranoo. Aiqama maa maqa maaqafa faqa faiqi anaasee faqa qinindi kai maridaqa innee qinee qeeqara utaaqama qaunasa mariafanoo. 6 Innee qinindi uqanna maridaqa qini aanaiqi kirausa mariafanoo.

7 Mooseefa irisee ooqureenoo Isaree maqanaa uriqararausa suquseenoo aiqama Yaaweefa qimamu ufana qimanniminau. 8 Faiqi anaasee Yaaweena ufa iriseeqa aiqamausa moodaa kari noo raqa maree qiqa. Yaaweefa aiqama ufa

qinnana maasa irianauree qiqau. Miqi qufanoo Mooseefa misa ufa iriseenoo Yaaweena qimaminau.

⁹ Yaaweefa misa ufa iriseenoo Mooseena qimaminoo qinau. Qinee amatooki arira oonna-muqiari anee iannannai qumuree ani faqa ufa qianaqa faiqí anaasee iriseeqa miqooqari ani ufara kuqaa fee qifaranoo. Miqi qimasoofanoo Mooseefa faiqí anaasee quu ufana Yaaweena qimaminau.

¹⁰ Qimamisoofanoo Yaaweefa kafaa Mooseena qimaminoo qinau. Anee kafaa ooquree faiqí anaasee maaqi qimasee qimannimia. Misa aiqama maqee faqa duna faqa nári qamunna nammari uqusee nári nifaqa anukamasee qini qimooqirara deedaqiaqa. ¹¹ Deeda qimarifaqa duna kaqi mari mooná qinee Sinai aaqanasaa qumuraanaqa aiqama faiqí anaasee qini qiqafee-faranoo. ¹² Anee aaqana ameemaanaí fiqumma oosumma sainaqa sia faiqí anaasee mina fiaaqaraaqa. Miqimmaseenana qimanniminaqa sia aaqanaí ooru fuaqa, sia uqanna mina aaqa fuaqa. Minasaa aiku rainafa kuquannoo. ¹³ Innee miqinna fasiqana sia uqanna nisaukunnaí aruaqa, ooni samu fee feefannaí fee kuqa aruaqa. Maa ufana faiqí faqa aandaúra faqa qidaqa. Miqinna fasiqa fee aandaú fee kuquanoo. Ukeena fuaqaiifaqa kai faiqí anaasee aaqana aikunni ooru fuaqa.

¹⁴ Mooseefa aaqanaíndari qumureenoo faiqí anaasee Yaaweenara deedaqa masee amooqiaqeera qimanniminau. Miqi qufaqa faiqí anaasee nariqa qamunna nammari uqiqau.

¹⁵ Miqi marufanoo Mooseefa qimanninau. Duna kaqi mari moona deedaqiaqa. Maqee oosana arasee sia anaasee sakasee faiqaaqa.

¹⁶ Qaara afuru faisoo fanoo qaaramookufanoo kananaana aaqanasaa ukeena firaana fuaqarana namu faqa qamatooki kira oonnamu namu faqa aakuusaa innaarunai namu faqa ufaqa faiqi anaasee uiqaana maqaki mariusa aiqama naindiri roofaqa rufiaqau. ¹⁷ Mooseefa

faiqi anaasee aiqama uiqaana maqakinaana nifiqeenoo Yaaweena paqurirara aaqana aikunni oonu kikiqino marinau. ¹⁸ Yaaweefa idauruki qari Sinai aaqanasaa qumu marunara ida muna fannoo aaqana aiqama rafaqaqafinoo marinau. Mi munafa firaada ida munara foora ooru fufaqa faiqi anaasee qafoo fanoo firaqoo naindiri ranau. ¹⁹ Ukeena feendundaanai qimarinau. Miqi qimarufanoo Mooseefa

Yaaweena qimamufanoo Yaaweefa kafaa innaarunai darara qiranakiqari nari qimaminau.

²⁰ Yaaweefa Sinai aaqanasaa qumureenoo Mooseena aaroo fanoo oorufinau. ²¹ Ooru roofanoo Yaaweefa Mooseena qimaminoo qinau. Anee ooquee faiqi anaasee qimanniminaqa sia oosu aiaaqaree qini qiqaqarara aniaqa. Misa miqiqa moomoosa kuqifaranoo.

²² Aanaiqikirausa faqa qini daaqa aniani qimasee anukamafiqa aniaqa. Sia miqifaqa misa aupurarana nimianauro. ²³ Mooseefa

Yaaweena ufa iriseenoo qimaminoo qinau. Faiqi anaasee sia amana Sinai aaqanasaa urifaranoo. Anee anenna kai maasa daakapama seenana naaquqara aaqana fiqumma amusa

arasaanaqa sia urifaranoo.

²⁴ Yaaweefa iriseenoo Mooseena qimaminau. Ooqureenana Aarona faqa afiqee urua. Qini aanaiqikirausa faqa faiqí anaasee faqa sia qini qiqafararee qimasee amusa rapeemmasee uru-aqa. Miqifaqa qinee misa ummaara nimianaura.

²⁵ Mooseefa iriseenoo ooqureenoo faiqí anaasee aiqama Yaaweefa quu ufana qimanniminau.

20

Anutuna qisauku qara sandufa.

(Lo 5:1-21)

¹ Anutufa maaqi qinoo. ² Qinee Yaaweesa inni Anutusa maridaqa. Qinee Isipa maqasaa rumberanaki maruna inni mareeqee mai quqaafanausa maridaqa. ³ Innee sia moo anutuna amooqiaqa, qini kai qimooqiaqa. ⁴ Innee sia innaarunai mari ainainausa faqa maqasaa mari ainainausa faqa nammariki mari ainainausa faqa nimana auqusee maasa anutufee qiaqa. ⁵ Minara sia moo ainaina amana auqirana oorinni mapamufida innaaru qidaqa amooqiaqa. Qinee Yaaweesa inni Anutusa marunnanara sia mi ainainausa nimooqiaqa. Qinee sia uqanna moo anutunara qiananoo qini qimaaqa maqaannoo. Faiqí qiniara fidiqaa inausa aupurarana nimiananoo misasaa faqa misa faiqí namu saa faqa misa ninaiqimara saa faqa nisaifaqausa saa faqa mariannoo. ⁶ Moomoosa qiniara ridaqa qini sanda ufa mau finausa qinee misa faiqí namu

kasooaqee nukudara foora kambiqainausa qeeqa didirana uqannifiqaanaura. ⁷ Innee sia qini duqunnai manda oosana auqaqa. Qinee Yaaweesa inni Anutusa qini duqa fifau faafau inausa aupurarana nimianaura. ⁸ Innee Sabata faasaanara naaquqara faasaanee qimasee iriqa fuaqa. ⁹ Dinni taikasee dinni ani moodaa marasee 6 faasaana inni ainainira faasaana mariani. ¹⁰ Dinni ani qaara marasee 7 faasaanasaa qini Yaaweesa adoora faasaana maridanoo. Mi faasaannasaa sia uqanna moodaafa faqa ainainiani. Innee faqa inni faiqi namu faqa inni ainainira faiqiuqa faqa inni aandauqa faqa aanaamuru inniki ani mariasa faqa sia uqanna ainainiqa. ¹¹ Dinni taikasee dinni ani moodaa marasee 6 faasaana qinee Yaaweesa innaaruna faqa maqa faqa ooruku nammari faqa minauqaki mari ainainausa faqa auqi qiafana. Dinni ani qaara marasee 7 faasaanasaa qinee qidooa qiafana. Minara qinee Yaaweesa Sabata faasaana afaaqooqa qimasee naaquqara faasaanee qidaqa. ¹² Inneeqa ninausa nikausara qeerairidaqa misa ufa qaindusuaqa. Innee miqiqqa qinee nimianna maqanasaa kisaagasaa marifaranoo. ¹³ Innee sia faiqi anaasee nuqu qimasee naruaqa. ¹⁴ Innee faiqi anaasee sia narí ummuari narí umuariaqa. ¹⁵ Innee sia moonaa ainaina umuariaqa. ¹⁶ Innee sia akaqausara unna qimasee misa kikiqa ususee ufa nimia. ¹⁷ Sia moonaa maaqa umiasanara amuqusiani. Sia moonaa aanaaqara amukaani mina ainainira fasiqa anaaseera faqa misa aandau ainainara faqa mina aiqama ainainara

faqa sia amukaani.

Faiqí anaasee Anutunara rufiaqau.

(Lo 5:22-23)

¹⁸ Faiqí anaasee aiqama innaarunai qirana faqa aakuasaa faqa ukeena firaana faqa aaqanasaa idamuna namu faqa qafuofanoo naindiri reenoo naaquqoofaqa nianasaa marida qafee mariqau. ¹⁹ Miqi masee misa rufiasee Mooseena qimamiqa qiqau. Anutufa maasa qimaqiminaqa maasa irisee kuqanoora rufiaidaqa anee kai maasa qimaqiminaqa iria.

²⁰ Mooseefa iriseenoo qimanniminau. Innee sia rufiaaqa Anutufa inni nimanamasee qafainaqa aiqama kari minara rufiasee mina ameemaanai maridaqa numoo ainaina sia auqaaqera. ²¹ Miqi qimasoofofaqa faiqí anaasee nianai marufanoo Mooseefa kai Anutufa asukuna arira oonamuki maruna aqa finau.

Aidaraindaraa sandufa.

²² Yaaweefa Isaraee maqannaasa qimannimianifeera maaqi qimaseenoo Mooseena qimaminau. Qinee innaarunaindari inni faqa ufa qimarunaqa innee inneeqa nifunnai mina qafaafanoo. ²³ Innee sia siruaannai faqa koorannai faqa unna anutuna amana auqusee qini Yaaweesa faqbaqa masee amooqiaqa.

²⁴ Innee maqannai qainda auqusee minasaa inneeqa sipsipa faqa burimakau faqa miniseeqa ida qama taikara tatufirana suqasaifaqa faiqí anaasee qini faqa moodaanaki kiaqa. Aiqama maqusa innee qini qimooqiaqera utaaqama

qaunna maqusanaki oonureeqa miqifaqa qinee innee iannai qumuree amiqi amiqimma ni-magaanaura. ²⁵ Innee ooninnai qini aidara auqiraree qimasee sia faiqi rukamuqaa ooninannai auquaqa. Innee faiqi rukamuqaa ooninannai auquseeqa minasaa tatufirana suqa qimirafa sia amanaikiannoo. ²⁶ Innee sia aidara auqusee minni akarara irirasu auquaqa. Innee miqifaqa umee nifaaqa kooroo ifaqa qafeefoora.

21

Fifau ainainira faiqi kiqa mariasasaa rakisira oosana.

(Lo 15:12-18)

¹ Anutufa Mooseena qimaminoo qinau. Anee maa sandufana Isaraee maqannaasa qimannimi.

² Innee Heeburu maqannaasa ainainira faiqi munnimmannai feefaurumasaiifanoo mifa inni faqa moodaannai taikasee dinni ani moodaa 6 marasee aukuaana ainaina masainaqa dinni ani qaaraikinaqa ⁷ doo quqasaifanoo kaqi fuani. Idukinnana akiigara sia feefauriani.

³ Mifa adeedaana maridanoo ani ainainira faiqikinoo mariinafa amaaqa firarinoo sia anaasee maree fuannoo. Kafaa anaasee faqaafa inni ainainira faiqi kinoo mariinafa amaaqa finoo amana nari anaqa afigee fuannoo. ⁴ Mina feefauru mina rakisiifa anaasee aminanoo mifa faiqi maqaseenoo mariinanoo mina aukuaana taikainanoo anaasee faqa faiqi faqa miqoo quqaseenoo kaqisamu amaaqa fuani. Mi anaaseena faqa mina faiqi faqa rakisiranaindi kai marifaranoo.

⁵ Ainainira fasiqa fannoo narí faiqi aanaaseera amuqusinanoo sia amana uqaanauree qimaseenoo ⁶ qinee qeeqa rakisiranara didimarifaqa qimaseenoo sia qinee taikasee fuanaura kaqi rumberanaki marianauree qimasainanoo mina rakisirafa mina qumareenoo amaana maaqaki munuseenoo quka qumareenoo kooqi mammaaqai aaqoo ruqiaani. Ruqiasainanoo mi fasiqafa naaruara ainainira faiqi mariinanoo miqoo kuquannoo.

⁷ Faiqí moo fannoo narí araamuna ainainira maanaaqaikianifeera amisainanoo sia ainainira fasiqauqa iduku nisaandee masee idukusaina fuannoo. ⁸ Mi manaaqana ainaina faqaafa feefauru meequeenoo narí ainainiranaki quqasee qinaaqara maraanauree qimasee mariinoo akooqai fannoo sia mareenoo. Miqinannai mi manaaqana mandaikama amaqaaseenoo sia aanaamuru nimisee feefauru maraannoo. Narí akoofa kai kaifaa feefauriannoo. ⁹ Faiqí moo fannoo narí faiqi amiraree qimaseenoo ainainira maanaqa feefauru maseenoo narí araamunara foora rakisiani. ¹⁰ Faiqí moo fannoo anaasee faqaafa moo maraseenoo indaarugaana narana faqa qamunna faqa mina ainaina dadaaqirana faqa sia minnisaani, ooqai iundee kai iani. ¹¹ Mi fasiqafa indaarugaana sia mi ainainausa andeeeqa amaqaenoo mi fasiqafa mi anaaseena aiqainanoo finanoo sia feefauru maraannoo.

Rakirana andeeqara sandufa.

¹² Faiqí moo fannoo moo fasiqa kuqarusainaqa narí faqa kai kuqaruqa. ¹³ Faiqí moo fannoo

sia moo fasiqa auqu qimasee arinafa mifa amana qinee inni utaaqama nimaqa qaunna maqusanaki keeqafinoo asumu mariannoo. ¹⁴ Yafee moo fannoo moonara aranaqainanoo auqu qimasee arinafa mifa faqa kuquani. Qini aidarai mifa oonu kukeeqafi asumu marianauree qinaqa innee mindaraana rarisamasee kuqa aruqa. ¹⁵ Yafee moo fannoo nari anoona akoona narinaqa innee mina kuqa aruqa.

¹⁶ Faiqi moo fannoo moo fasiqa mareeqeenoo nari ainainira faiqi kee iannoo fee moo atinai nimisee feefauru fee marainnana kuqa aruqa.

¹⁷ Yafee moo fannoo nari anoona akoona manda ufa qimannimaqainnana mina kuqamma aruqa.

¹⁸⁻¹⁹ Faiqi misa tinooramamaree fidaqa faiqi moo fannoo moonaa ooni samu fee saamu samu fee arusainanoo sia kuqirai aurida mariinanoo findifinoo nimarinaqa innee mina akiiqara ari fasiqana sia aupurarana amiaqa. Arinna fasiqafa nari qaarisa mariinanoo findifinoo madaanai saunusaa ooquree ururee irana amanaikinanoo ari fasiqafa mina feefauru auriranaki mariinna faasaana amana kai feefauru amisee minasaa rakisi marinanoo findi fuani. ²⁰ Faiqi moo fannoo nari feefaurummaqai ainainira fasiqa nee maanaqa nee saamu qumaree arusainanoo aqee kuqinaqa innee mina akiiqara nari faqa moo aupurarana amiaqa. ²¹ Mi ainainira fasiqa nee manaqa nee sia aqee kuqirai moodaa eenda fee qaara eenda fee kaqi mariinanoo kuqinaqa innee sia mina uriqararafa mina arinnana

akiiqara amiaqa. Narí ainainira faiqiara aupurama amaqaifa narí ariranasaa ititeenoo.

²² Faiqí rakinnanaki moo fasiqa fannoo amuaqu faqaa anaasee arusainanoo kuqira faiqi maqaseenoo mina anoofa kaqi marinanoo mi anaaseena afaaqi fannoo nana feefauruaree irainanoo mi fasiqafa feefauriannoo. Siaasauqa eedoo qinna feefauruna kai amiannoo. ²³ Mi anaaseefa moo aupurarana marinaqa mina arinna fasiqana faqa mi aupuraranna kai amiaqa. Kuqa arinaqa narí faqa kuqa aruaqa. ²⁴ Nifu dimbasainaqa narí afu faqa dimbaaqa. Nifai itairisainaqa narí afai faqa itairiaqa. Nisauku raudasainaqa narí asauku faqa raudaqa. Niku itairisainaqa narí aiku faqa itairiaqa. ²⁵ Idati raquru niminaqa narí faqa idati raquru amiaqa. Kaakadi narinaqa narí faqa kaakadi aruaqa. Saamu narinaqa narí faqa saamu aruaqa.

²⁶ Faiqí moo fannoo narí ainainira maanaqa fee fasiqa fee arumareenoo afu qimbaseenoo mina akiiqara idukusee aiqainanoo amaqa fuani. ²⁷ Kafaa mifa narí ainainira fasiqa fee maanaqa fee arumaree afai itairiseenoo mina akiiqara idukusee aiqainanoo amaqa fuani.

Burimakau fannoo aaqama sainnana andeeqara ufa.

²⁸ Burimakau akoona fannoo faiqí fee anaasee fee kuqa narusainaqa ooni samu mi burimakau akoonna kuqa aruseeqa mina amaqi sia naaqa. Mi burimakau akoona arusaifanoo mina akoona

aupurarana amirafa sia mariannoo. ²⁹ Mi burimakau akoonnafa ooqai faiqí nárí marifa maridanoo kafaa moo fasiqa kuqa arinaqa mina akoofa sia ququsaki mara quqainanoo kafaa narinaqa mina akiiqara ooni samu mi burimakauna kuqa aruseeqa mina akoona faqa kuqa aruqa. ³⁰ Kuqina akiiqara aqira feefauruara ooqai auqu ramaqaana amana kai aquseenoo nárí kuqiranasaa ititaannoo. ³¹ Burimakau akoona moo fannoo maanaaqa fee akoonaiqi fee narusainaqa innee ooqai qimaqaa ufa mau kai fuaqa. ³² Burimakau akoona moo fannoo ainainira kumaaraa fee maanaaqee narusainaqa mi burimakauna akoofa ainainira faiqi uriqararana firaa feefauru amiannoo.

³³⁻³⁴ Faiqí moo fannoo madika indufuseenoo rafaafafu qainanoo moo fannoo oonu mina rafaqaamma sainanoo burimakau fee doonki fee minaki aqufiqa kuqifanoo, madika afu rafaqaa ifa mi aandauna akiiqara feefauru maseenoo nariara mi aandauna maraannoo. Faiqí moo fannoo madika indufusee sia rafaqa finanoo aandauqa minaki aqufiqa kuqifanoo mi fasiqafa aandau akoona feefauru amiseenoo nariara mi aandauna maraannoo. ³⁵ Moo fasiqa burimakau akoona fannoo moona burimakau akoona arusainaqa burimakau akooqanda kaqi mari burimakauna mareeqee moosaa quqasee feefauru marasee miqanda mi munnimmana rainaqaraasa mandee kuqira burimakau qambaana aukuqaraasa masee moo fannoo dinni maraina moo fannoo dinni maraqa. ³⁶ Mi burimakau akoonafa ooqai

nárí maru burimakaufa marifanoo mina akoofa sia ququsaki quqainanoo moona burimakau kuqa arusainanoo mina akiiqara moo kaqi mari burimakauna amiseenoo kuqirana nariara maraannoo.

22

Aaqarana andeeqara sandufa.

¹ Faiqí moo fannoo burimakau fee sipsipa fee qummuara mamaree munu moona amisee feefauru maraina fee arusaina fee mi fasiqafa moodaa burimakau akiiqara moodaannai qisauku burimakau mina amiannoo. Moodaa sipsipa qummuarinnana akiiqara qaara faqa qaara faqa sipsipa amiannoo.

²⁻⁴ Mi fasiqafa nárí qummuarirana akiiqara feefauriannoo. Moo ainaina sia marinaqa mi fasiqana mareeqee moo maqannaa nimisee mina feefauru mareeqee mifa qumuarina akiiqara nimiaqa. Mi fasiqafa burimakau fee doonki fee sipsipa fee maraqainafa kaqi riri marinanoo qaraqanda mina akiiqara nimiani. Eendakinai qummuarira fasiqa fannoo maaqa ruiqasee keeqainaqa mina qumarasee kuqa arusainafa sia mina akiiqara ufa maraannoo. Faasaana miqi marinaqa kuqa arinna fasiqafa mina akiiqara ufa maraannoo.

⁵ Faiqí moo fannoo nárí burimakau fee sipsipa fee andanda nee marinana sia amiqimmasee rakisinanoo moona afuqaki keeqafi narana nainanoo mina akiiqara narana faqaana nárí afuqakinaana amiqirana kai unaku maree munu amiannoo.

⁶ Faiqí moo fannoo narí afuaki ida arasainanoo qamammareenoo moona afuqa qeenoo narana unaku quqaqainnana qamasainanoo mina akiqara idarai fasiqafa mina amiannoo.

⁷ Faiqí moo fannoo munnimma moo fasiqasaa quqasaina marinanoo moo fasiqa fannoo qummuari marinaqa paquri masaifanoo mina akiaqara qaara kari feefauru amiannoo.

⁸ Qummuari fasiqana innee sia paquriqa munnimmasaa rakisii fasiqana afixamaree innaaru qimaria maqusanaki munusee irafanoo mifa narí amana aqamasee kuqaa sia qinee maree fee qiannoo.

⁹ Aiqama ainainara aanooqiranaki burimakaura faqa doonkiuqara faqa sipsipauqa faqa qamunnara faqa akaqa ainainara faqa qinindi kai fee qimasee aanoo qinna fasiqa qanda nifiqamaree innaaru qimariaqoo nifiqee aniaqa. Anutufa yanaree unnaqiifoo qinafa mifa mina akiiqara qaara kari feefauru amiannoo.

¹⁰ Faiqí moo fannoo moona doonki fee burimakau fee sipsipa fee moo aandau fee rakisi marinanoo moo aandau fannoo kuqinoo fee nana afaaqee mandaikinanoo fee namuqaa fee mara maraafanoo moo fasiqa fannoo sia minauqa qafeenoo.

¹¹ Mi andausa saa rakisirafa innaaru qimariaqoo oonureenoo amana aqiqamaseenoo qinee sia uqanna mi andausa ummuari fee qiani. Mi andausa sia ummuarifanoo aandau akoofa minara amanammifoo qimasee sia mina akiiqara rakisiinafinnai feefauru maraannoo.

¹² Kuqaa mi fasiqafa ummuarinoo mifa aandau akoona mina akiiqara feefauru amiannoo.

¹³ Kaasau

faini mi aandauna aruneenoo fee mina rakisi mari fasiqafa mina asausifee amudaani fee mara mina akoona uqafiqaseenoo sia mina akiiqara feefauriannoo.

¹⁴ Faiqí moo fannoo moona aandaau akaqa ainainirana dadaaqianifeera marasainanoo kuquannoo fee amudaani itairinoo fee mi aandauna akoofa uqanna sia marinanoo ufaasu marai fasiqafa feefauriannoo. ¹⁵ Mi aandauna akoofa uqanna mina afusaa miqifanoo sia mina akiiqara feefauru aandaau akoona amiannoo. Ufaasu feefauru masaafanoo ainainirana dadaaqi mari aandaufa kuquannoo fee amudaani itairiannoo fee feefauru maqaifa miqiannoo.

Akaqa sandufauqa.

¹⁶ Faiqí moo fannoo maanaaqa moo faiqí moo sia utaaqama amaqarana sararamma amaqaaseenoo mi fasiqafa mararara mina akoona feefauru amiseenoo marasainanoo mina aanaaqaikinoo mariannoo. ¹⁷ Mi manaaqana akoofa mi fasiqanara akooqainanoo sia narí araamuna maraannee qinanoo mi fasiqafa fuka maanaaqa feefauri mariana amana kai mina akoona amiannoo.

¹⁸ Aukainaina maraqanua aanaaseesa kuqa naruaqa.

¹⁹ Faiqí moo fannoo aandaau amuaaqa akarainnana mina kuqa aruaqa.

²⁰ Qini Yaaaweesa kai aandaau tatufirana suqa qimiaqa. Moo unnaqira anutuna tatufirana suqa aminnana kuqa aruaqa.

21 Innee ooqai Isipa maqasaa aanaamuru marunaki mandainainaki marunnara irisee sia aanaamuru inniki marinausa mandaikamma nimaqaaqa.

22 Innee adeedaana anaasee fee faiqi faiqi fee sia mandaikamma nimaqaaqa. 23 Innee miqifaqa misa qini daaraifaqa qinee Yaaweesa irianaura. 24 Qini qirana qainaqa rakiranaki inni kuqa naruanaura. Narusaanaqa inni ninaaqmaaka adeedaana marifaqa inni faiqi namu faiqi marifaranoo.

25 Inniki qari qini Yaaweesa faiqí anaasee moo fannoo munnimmara sarau imarinnana ufaasu munnimma aminana sia ufaasu munnimma nimimariasaa naanna raaqa. Misa nimiseeqa nárandi akiiqara maraseeqa aabaa faqa maridaqa. Innee inneeqaindi akiiqara kai maraaqa. 26 Innikiqari faiqí moo fannoo ani ainaina ufaasu maraseenoo kafaa amianauree qimasee narí suara siuta amiseenoo minannoo narí amianinna ainainara kooroo idanoo kuqaa amianauree qidanoo. Miqi qinana anee suani afu sia keeqanoo marinana mina suara siuta kai kaqi narí amia. 27 Mi suara siutafa tootooqirana amianifeera quqaqaina marifanoo nanee moo ainaina akusee faqaannoo. Anee sia aminanoo suara arinanoo qinee unnannai innaaru qinaqa qinee mina ufa irianaura. Qinee kaaqa faiqiara qimudaoo qimarunausa maridaqa miqianaaura.

28 Innee sia qini Anutusara manda ufa qiaqa. Inniqa rakisirausara faqa sia miqi qiaqa.

29 Innee fuka narana afiana neeqa sakuma faqa uainna faqa oorifa fadameena faqa in-

neeqa ooqa faiqi faqa qini Anutusa naaree qimi-aqa. ³⁰ Inneeqa burimakau sipsipa ooqasaa maqarana akoonauqa dinni taikaseenoo dinni oonu qaara marasee 7 faasaana narí anoona faqa mariseenoo dinni oonu qaaramoo 8 faasaanaiki-naqa mina arusee tatufirana suqa qimiaqa.

³¹ Innee qini faiqí anaasee marianara kaasau faini fannoo aru quqaqainna andauna amaqi sia suqasee naaqa. Faini mara nimifaqa naaqa.

23

Isaraee maqannaasa andeeqara oosana auqaaqa.

¹ Innee aatata qaraa unna ufa iriseeqa sia moona munu qimamia. Innee sia aaqee mari fasiqana unna ufannai mina dadaaqaqa.

² Kootaki oonureeqa moomoosa unna ufa qifana anee sia misa dadaaqa. Misa ufaki kikiqa mafi andeeqara ufa mara furufarifana sia misa dadaaqa. ³ Kudi fasiqa moo fannoo kootaki kikiqa mafinana sia kudi marinnana roo qimasee dadaaqa. Andeeqara nara kai qiaqa.

⁴ Innee inneeqa namuqaa burimakau fee doonki fee furufariqa nifaqa innee qafamaseeqa maree narí akoona munu amiaqa. ⁵ Mi fasiqana doonki fannoo ummaara mara maree fidanoo aanai saamurinoo marinaqa innee oonu qafee sia flaaqaraaqa dadaaqa uqeera aisaqa.

⁶ Kudi fasiqa fannoo kootaki marinaqa innee sia minara manda fasiqee qimasee andeeqara

oosana sia mina amiaqa. ⁷ Innee sia unna qi-masee kootaki aqoonnana kikiqa usua. Sia andeeqarasa numoo siaisa fifau kuqiranaki mara quqannisaa. Qinee Anutusa mi manda ainainna auqainnana kuqa aruanauranoo.

⁸ Moo fannoo maqandanai kootaki minasaa roo qiannee munnimma aminana sia uqanna maraa. Miqira munnima fannoo faiqi nifu dimbarau-saikamma saifaqa sia andeeqarana qafaidaqa. Andeeqara fasiqa faqa mara furufaramma aisaidanoo.

⁹ Innee ooqai Isipa maqasaa maridaqa aanaamuru aupurana qafeeusa mariafanoo minara innee sia quandafi aanaamuru inni faqa marinausa mandaikamma nimaqaaqa.

Qisauku dinni taikasee dinni ani qaara marasee 7 aukuanara faqa sabatara faqa qira sandufa.

¹⁰ Inneeqa maqa ummaqu nee maria maqanaki minaki dinni qisauku taikasee dinni ani moodaa marasee 6 aukuanana ummaqusaidaqa unaku-saidaqa naaqa. ¹¹ Miqiqqa fifi inaqa qisauku dinni taikasee dinni ani qaara marasee 7 aukuanasaa saifanoo maqa fanoo idooaani. Mi maqanasaa moo ainaina kambiqainnana sia unaku naaqa. Kudi fasiqauqa mina naaqa. Misa naidaqa andaanauqa mafi sainnana kaasau aandauqa naaqa. Inneeqa uainna afuqa faqa oorifa saqari faqa miqi kai iaqa.

¹² Innee moodaannai qisauku taikasee dinni ani moodaa marasee 6 faasaana ainainiaqa. Ainainiaqa fifi inaqa dinni taikasee dinni ani qaara marasee 7 faasaanasaa sia ainainiaqa. Inni

ainainira faiqiuqa faqa aanaamuru inni ainaini marinausa faqa inni aandaufa faqa aiqama idooaqa.

¹³ Qinee Yaaweesa aiqama ufa qimarunnana iriaqa. Innee maa amaana ufausa amiqimasee irimaree fuaqa. Sia unna anutusara innaaru qiaqa. Sia uqanna misa nuqu raaqa.

Qaaramoo uriqarara faasaana amaana qira faasaana.

(Raf 34:18-26; Lo 16:1-17)

¹⁴ Aiqama aukuanaki qaarammoo kari oomaqa sakasee naidaqa qini Anutusara innaaruqiaqa.

¹⁵ Innee Isipa maqa maaqaindari anu quqoonnana Abiba quqoonasaa qinee qimannimifannandee iqa innooqee mari pauraqana sia aqira bereeta naidaqa asasiaqa. Mi oomaqanaki 7 faasaanasaa sia innooqee mari pauraqana aqira bereeta naaqa. Innee qini qimooqiraree qimasee sia kaqi aniaqa. Qini tatufirana suqara ainaina faqa maree aniaqa.

¹⁶ Fukakinaana unakusee oomaqa sakasee asaidaqa namaseeqa inneeqa narana ummaquqaana oosandarasee unaku naaqa. Saqari aqama akuqainaqa innee mina tiqisee auqaanai maridaqa moo oomaqa sakasee naida asasiaqa.

¹⁷ Aiqama aukuaana mi qaaramoo oomaqiranakina aiqama Isaraee maqannaa fasiqauqa anireeqa qini Yaaweesa inneeqa Anutusa qimooqiaqa.

¹⁸ Innee andaunoo qini tatufirana suqa qimiraree qimasee sia innooqee mari pauraqana

aqira bereeta namu faqa moodaanaki suqaaqa. Tatufira aandau fadameena fannoo sia faiqee kananaana kaqi mariani aaqee kai aiqama idaki aqusaifanoo qama taikafuani.

¹⁹ Aiqama aukuana innee fukakinaa narana unaku maree qini Yaaweesa inneeqa Anutusa amaana maqaki maree aniaqa. Innee sipsipa aanaaqi fee mimmi aanaaqi fee arusee sia nari anoona naamma anoonannai suqaaqa.

Anutufa Isaraee maqannaasa naamuaqira ufa faqa qima afeekaikira ufa faqa niminau.

²⁰ Anutufa kafaa qinau. Qinee qeeqa kai qeeqa Qangiroo aqiqaananoo mifa qumuree inni indaaru nikidanoo innisaa rakisi marinaqa qinee inni deedaqamma nisaafanna maqa maaqanaki fifaranoo. ²¹ Innee mi qangiroofa qinnandee iaqa. Sia mina ufa rukiaaqa. Qinee mina aiqau-nanoo qumu marinara sia mina ufa rukiaaqa. Mifa sia inni manda oosana akiiqara nifauaanoo. ²² Innee mina ufa irisee andeeqasee qinee qunnufa mau kai fifaqa qinee inni namuqaauqa faqa rakuanaura. ²³ Qini qangiroo fannoo inni indaaru nikiinoo nifiqee Amoorra maqa maaqa faqa Heeta maqa maaqa faqa Perisita maqa maaqa faqa Kannaana maqa maaqa faqa Hifitana maqa maaqa faqa Yeebusa maqa maaqaki mariasa faqa naru taikaseenoo inni miqoo quqannisaannoo. ²⁴ Innee miqoo oonu maridaqa sia misa unna qira anutusara niqoori saunu arafi innaaru qi-aqa. Sia misa innaaru qimariandee iaqa. Innee misa unna anutusa turi taari maseeqa ooni

rakiaaqee minara innaaru qimariana raudaan-dammeeqee aqusaafa. ²⁵ Innee qini Yaaweesa inneeqa Anutusa qimooqifaqa qinee narana faqa nammari faqa inni nimiseeqa inni auriranauqa mara aqunnisaanaura. ²⁶ Innee Yaaweena kai amooqifaqa sia aanaaseeuqa eedada faiqi maqee faranoo. Sia moo aafa anaasee mariannoo. Innee sia dauni kuqifara, kisaafaqasaa marifaranoo.

²⁷ Qinee inni nifiqee fidaqa inni namuqaa qiniara rufiarana nimiseeqa inni faqa rakinausa furufarirana nimianaura. Nimiseeqa qianaqa inni namuqaauqa quqasee sandeefara. ²⁸ Qinee ukaqa nimimari doodaanina inni namuqaaki quqasaana ukaqa niminaqa naaqoo nifu furufarinaqa sandee faranoo. Innee fimarifaqa qinee Hifita maqannaasa faqa Kannaana maqannaasa faqa Heeta maqannaasa faqa nifaqasaanaqa innee miqoo oonu marifaranoo. ²⁹ Qinee sia moodaa aukuanaki inni namuqaa rapatutumma aquanaura. Qinee miqimma saananoo naakunduka mafinaqa kaasau aandauqa moomoo mi maqa maaqanaki maridaqa inni narifoora. ³⁰ Qinee misara qianaqa misa moodaa kai qaara kai idaga taikafifaqa innee moomoo kammafi amana mi maqa maaqana maree faranoo.

³¹ Qinee inni oosu maaqimasee oosumma nisaanaura. Dinni taatuqee nammari mariannoo. Dinni Firistia ooruku nammari mariannoo, dinni aadana maqa maaqa mariannoo, dinni Eeufarateesa nammari mariannoo. Qinee inni afeeka nimianaqa innee mi maqa maaqanaki fimarifaqa qinee inni namuqaa rapatutu iqa fimar-

ianaqa innee misa maqa maaqa mareefaranoo. ³² Innee sia uqanna misa ufara eedoo qimasee moodaanaki kira ufa qiaqa. Misa unna anutusara faqa sia uqanna moodaanaki kiaqa. ³³ Mi maqannaasa sia inni maqa maaqaki mariaqa. Innee miqifaqa misa inni mareeqee qini numookamma qimaqara tinai quqeeffaranoo. Innee misa unna anutusa nimooqifanoo mifa inni ninuka ufanara foora fufinoo mariannoo.

24

Yaaweefa Isaraee maqannaasa faqa moodaanaki kinau.

¹ Anutufa aiqama ufauqa Mooseena qimamiseenoo kafaa maaqi qinuu. Moosee anee faqa Aarona faqa Nadabana faqa Abiquna faqa Isaraee maqanna rakisirausa 70 uriqararausa faqa nifiqa maree urureeqa nianasaa kummaramafinaqa qiniara innaaru qidaqa qimooqiaqa. ² Moosee anee kai adeedi ania. Sia akaqa rakisirausa qini daaqa aniaqa. Faiqi anaasee faqa sia uqanna aaqana uruaqa.

³ Mooseefa ooqureenoo faiqi anaasee Yaaweena sandufa aiqama qimannimisoo faqa misa maaqi qimasee moodaa kari noo raqamaree qiqau. Yaaweefa qindee iqa maasa aiqama ainaina auqaanaura. ⁴ Miqi qimasoo fanoo Mooseefa Yaaweena sandaufa aiqama akara rinuu. Akara rumaseenoo kananaana iaqoofanoo aaqana aikunni aandau tutufira qainda auqinuu. Auquseenoo ooni qisaukuqara taikasee qikunni ooqu qaara marasee 12 ooni maraseenoo qainda fiqumma Isaraeena faiqi

namu nimana kai rakiqanau. ⁵ Rakiqaseenoo kumaaraauqa qimannimufaqa burimakau arusee munu Anutuna tatufirana suqaqau. Mi tatufira aandauna Isaraee maqannaasa faqa Anutuna faqa moodaanaki suqira tatufirane qiqau. ⁶ Misa arusoofanoo Mooseefa burimakau fidika akaqana difaanikiaqa sakaseenoo kaqi maruna qumarenoo aidarai rurufinau. ⁷ Rurufa maseenoo Akiiseenoo Mooseefa Anutufa moodaanaki kira ufa qimaqoo bukana akara rumaqoona maree findifinoo aiqama minakinaa ufa asaana rumasee firaqoo faiqi anaasee qimanniminau. Misa iriseeqa qiqau. Maasa Yaaweena mi sandaufana aiqama irisee afaqaanaura.

⁸ Mooseefa misa ufa iriseenoo difaanikinaa fidika kaqi maruna indaku faiqi anaasee kiaqa aqidanoo qinau. Anutufa maa sanda ufausa nimuqooqari maa fidikafa Anutufa inni faqa moodaanaki kuna afeekaikamma nimaqaidanoo.

⁹ Miqi qimaseenoo Mooseefa Aarona faqa Nadabana faqa Abiqufana faqa Isaraee maqanaa uriqararawsa 70 faqa nifiqeenoo aqanasaa ooru-finau. ¹⁰ Oorureeqa miqoo misa Isaraee maqanaa Anutuna qafaqau. Mina aiku ameemaanai innaaruna kudimandara foora ira ooniuqa mina auqu safiree fee qimaru oonisa ausirirafauqa marinau. ¹¹ Misa Anutuna qafuofanoo sia misa narinau. Misa miqoo moodaanaki suqufu faqa narana nammari naqau.

Mooseefa Sinai aaqana saa ooru finau.

¹² Misa namasoofanoo Anutufa Mooseena qimaminau. Anee aaqanai qinee marunnannai urua. Ururainaqa qinee qeeqa sandufa anee faiqi anaasee naakapaanneera qaara oonisaa akara ruma amianauro.

¹³ Mooseefa mina iriseenoo nari dadaaqi-maruna Yoosuaana faqa deedaqamma seeqa Mooseefa aaqanai Yaaweefa marunnai ooru finau. ¹⁴ Ooru fidanoo Mooseefa Isaraee maqannaa uriqararousa maaqi qimasee qimanniminau. Innee maaqoo uiqaana maqusaki maridaqa maaqanda qifeesiaqa. Aaroonafa faqa Hurafa faqa inni faqa maaqoo marifaranoo. Akaqausaki ufa rainarafa kambiqainaqa miqanda andeeqa nimaqeeffaranoo.

¹⁵ Miqi qimasee qimannimiseenoo Mooseefa aaqanai oorufufanoo qasuru fannoo aaqana rafaqa finau. ¹⁶ Yaaweefa kaaqa qarafa aaqana aaqa qumuroonara Sinai aaqana saa qasuru quminau. Isaraee maqannaasa mi kaaqa qaranna qafoofanoo aaqanasaa firaa ida qeera foora qimarinau. Dinni ani moodaa marasee 6 faasaana qasuru fannoo aaqana rafaqa finoo marinau. Dinni ani qaara qanda marasee 7 faasaana Yaaweefa qasurukiqari Mooseenara mai uruannee qinau. ¹⁷ Faiqi anaasee afaasasaa marusa aaqana qafeeqa naaquqara kudifaannammiifoo qiqau. Anutuna kaaqa qarafa aaqana saa firaaqoo idauruara foora imarinau. ¹⁸ Mooseefa aaqanai ooru fidanoo qasuruki keeqakufanoo aaqanasa ooru

qaara fasiqa niku nisauku taikasee 40 eendaki faqa faasaana faqa marinau.

25

Faiqí anaasee Anutuna naaquqara uiqaana maqa usakara ainainauqa amiaqa.

(Raf 35:4-9)

¹ Mi aaqannanasaa Yaaweefa Mooseena qimaminoo qinau. ² Anee Isaraee maqannaasa qimanniminaga misa oosana oosana ainaina qini qimiani qinnana qimiaqa. Faiqí anaasee qini qimirara nidinaga minisainna ainaina anee mara quqaa. ³⁻⁵ Maa ainainausa maree anifaranoo. Kooru faqa siruaa faqa booroosa faqa amiqira qamunna faqa dirindaasi akira sipsipa asausi faqa pannoonu akira sipsipa asausi faqa faeena akira sipsipa asausi faqa mimmi asausinai auqira qamunna faqa sipsipa akoona apatasaa faeena akirana faqa ooruku nammari mari firaa noodaana apata faqa akasia saqari amiqira saqari faqa maree minisaifana mara quqaa. ⁶ Qooma qumbi maria fadameenna faqa aanaiqikirausa aki maria oosana oosana fadameenna faqa moo pauraqa ida arasaafanoo munino amiqira afundi mari pauraqana faqa mini amiaqa. ⁷ Firaa feefauru aqi maria oonisa faqa aka amiqira ooniuga faqa aanaiqikirausa eefooda qamunnasaa faqa nimuqusasaa rumbee marianasaa faqa atooqaqa.

⁸ Isaraee maqannaasa qimanniminaga qini naaquqara uiqaana maqa usakasaifaqa qinee misa qambaanai mariana. ⁹ Innee uiqaana

maqa faqa minakinaa aiqama ainaina faqa qinee naakapaunandee miqi kai masee auquaqa.

Innee moodaanaki kira bukisa auquaqa.
(Raf 37:1-9)

¹⁰ Innee akasia saqari marasee minannai moodaanaki kira bookisa auquaqa. Mina kisaqa 110 centimetres amana auquaqa. Mina qusandanai faqa mina kuradarafa faqa amana amana kai 66 centimetres amana auquaqa. ¹¹ Innee amiqira koora marasee turimmasai ausi rumafinaqa minannai kai bookisa adisaa faqa aundurai faqa ititaaqa. Mi bookisana afaimau koorannai amatookika masee rafaqafuqa. ¹² Innee koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaqa. Dinni aikusaa qaara qanda dinni aikusaa qaara qanda quqaqa. ¹³ Akasia saqari qaindusi fandinna qanda koora turimandee ausiruma qumaree minannai kukuqiaqa. ¹⁴ Kukuqa maseeqa dinni dinni amaaqa auquqainnanaki ausuaqa. ¹⁵ Miqimmaseeqa sia radukuqa, saifanoo miqinoo mariani. ¹⁶ Miqimma saifaqa kasooaqee qaara oonisaa qeeqa sanda ufa akara ruma nimianaqa minaki quqaqa.

¹⁷ Bukisa afu faqa Koorannai kai auquaqa. Mina kisaqa 110 centimetres amana mariani. Mina qusa 66 centimetres amana mariani. ¹⁸ Innee koora turimmaseeqa bukisa afu auquseeqa minannai kai dinni dinni qangiroo qaara qanda nimana auquaqa. ¹⁹ Afu dinni atinni moo qangiroo amana auqusee dinni moo

qangiiroo amana auquaqa. Afu faqa mi qangiiroo qanda nimana faqa moodaa koorannai kai auquaqa. ²⁰ Mi qangiiroo qanda bukisa afusaa quqasaifaqa noori nari qafee nari qafee iaqa. Miqanda niqoosa uqeerasaifanoo bookisa afusaa ititanoo mariani. ²¹ Qaara oonisaa sanda ufa marina mi bukisanaki quqasee afu rafaqaqafuaqa. ²² Qinee inni faqa miqoo moodaanakika mafifa bukisa afusaa qaara qangiiroo qambaana maridaqa qeeqa sanda ufa inni Isaraee maqannaasa nimianaara.

Innee aiku faqaa teeboora auqusee Yaaweena aminna feemuna miqoo quqaaqa.

(Raf 37:10-16)

²³ Innee akasia saqarinnoo teeboora auqauqa. Mina kisaafa 88 centimetres mariani. Mina qusandanai 44 centimetres mina kuradarafa 66 centimetres mariani. ²⁴ Innee amiqira koora marasee turimmasaifanoo ausiruma finaqa minannai teeboora rafaqa fusee kafa moonnai teeboora atiqara fiqumma rafaqa fuaqa. ²⁵ Innee teeboora atiqara fiqumma 8 centimetres amana ititasee mina afaimau koorannai rafaqa fuaqa. ²⁶ Innee koorannai qaindusifandinnana amaqa 4 auqusee teeboora aiqama aiku namusaa quqaaqa. ²⁷ Teeboora afai ameemaandanai qaindusirana amaqa auqauqa. ²⁸ Qaindusifandinna saqari qanda akasia saqari atekasee koorannai mina kuku iaqa. ²⁹ Amiqira koorannai kai teeboorasaa quqeefandinna pirita kaafausa faqa kisaafa kaafauqa faqa uainna adiara pirita uqnaurirana

faqa auquaqa. ³⁰ Qini qimifandinna bereetana mi teebooranasaa quqaqaifanoo aigama kari qini moodaanaki kira bukisa aaqa mariani.

*Innee qooma qumbifandinna aikana auquaqa.
(Raf 37:17-24)*

³¹ Innee qooma qumbifandinna aikana amiqira koorannai auqa. Innee koora turiiseeqa minannai kai qooma aika oosana faqa adaka faqa asaanaauqa faqa auquaqa. Mi asaanausa saa mi koorannai kai taatuqee aqama afufeenaari marindee maseeqa auqusaifanoo kaafara foora afisu amaqaanoo mariani. ³² Mi qooma aikausa qisauku dinni taikasee dinni ani moodaa marasee 6 mariani. Dinni qaaramoo dinni qaaramoo mariani. ³³ Aigama mi asaana namuna atimau koorannai taatuqee aqama afufeenaari marindee masee afaaqa auquaqa. Mi afufeenaarirafa teeqnoorina aqamara foora marufaqa mi asaana namuna saa auquaqa. ³⁴ Mina adakasaa qaara faqa qaara faqa 4 saa taatuqee aqama teeqnoorina aqamara foora auquaqa. ³⁵ Moodaa aqama indaaruuqaa asaana gara ameemaanai mariani. Kafaa mina murufi asaana gara ameemaanai moo aqama mariani. Kafaa mina murufi asaana gara ameemaanai moo mariani. ³⁶ Amiqira koora turiiseeqa minannai kai oosana faqa asaanaauqa faqa afufeenaarirana faqa auquaqa.

³⁷ Miqimmaseenana dinni taikasee dinni ani qaara qanda marasee 7 qooma auqusee mi asaanausa ati mau quqaa. Quqaseenana mara quandasainanoo mi qoomausa kaaqa qarafa sia

kaqinni fuani. Maaqa aundurai kai kaaqa qaani.
³⁸ Mina ufaqa faqa futufita faqa amiqira koorannai kai auquaqa. ³⁹ Qooma quqara aika amiqira koorannai 35 kilogram ummaara amana kai marasee auquaqa. ⁴⁰ Moosee qinee aaqanasaa ani qimamunandee aiqama ainaina miqikaim-masee andeeqasee auqua.

26

*Innee Anutuna uiqaana maqa usakaaqa.
 (Raf 36:8-38)*

¹ Innee qini naaquqara uiqaana maqasaa akifandinna qamunna kisaqa maaqimasee auquaqa. Sipsipa asaasi dirindaasi akirana faqa pannoona akirana faqa faena akirana faqa sufusee amiqira qamunna auqusee aqoosa faqaa aandau amana auqusee minasaa atooqasee akuniaqa. Miqimmasee minauqannai innee qisauquqara taikasee 10 firaa qamunna auqusee moodaanaki akuniaqa. ² Mi aiqama qamunnausa amana amana kai 12 metre kisaqa mina qusa 2 metre mariani. ³ Mi qamunnausa moodaannai qisauku 5 marasee moodaanaki ootupamasee akuniaqa. Dinni qisauku taikasee 5 faqa miqi kai iaqa. ⁴ Miqimmaseeqa mi qamunna qanda atiqara dirindaasi arira qamunnannai anaanu auqusee moodaanaki ootupaaqa. ⁵ Firaa qamunna atimau anaanu 50 auquaqa. Moo qamunna faqa miqi kai iqa moo qamunna saaqaraa aanaanu amummaqa kai auquaqa. ⁶ Koora qumaree turimandee qusa tafara foora saaeemma qumaree dinni dinni anaanuki

upeekasaifanoo mi qamunna qanda moodaara maqi inoo mariani.

⁷ Uiqaana maqa saa akira qamunna firaana mimmi asausinnai 11 auquaqa. ⁸ Innee aiqama moodaa karirana kai auquaqa. Mina kisaqa 13 metres amana mariani. Mina qusa fannoo 2 metres amana mariani. ⁹ Mi qamunnausa moodaanai qisauku taikasee 5 qamunna akunusainanoo moodaa qamunnaika mafuani. Kafaa moodaanai qisauku taikasee dinni ani moodaa marasee 6 narisaa narisaa akuniisaifanoo firaafaikiani. Miqimma finaqa uiqaana maqa kooqindaraana murufi tukaanda quqaqa. ¹⁰ Qamunna atimau anaanu 50 akuniyaqa. Moo atimau faqa mina amummaqa kai akuniyaqa. ¹¹ Booroosannai tafara foora ati saaeemmasee 50 auqusee minannoo dinni dinni anaanuki aususee ootupama saifanoo moodaa qamunnara foora mariani. ¹² Mi firaqa qamunnana uiqaana maaqa akua-maqa saifanoo mina ati fiqaramasee akunirafa uruanatinai naambeeqai qumiqaranoo mariani. ¹³ Aabaa akunira qamunna fannoo uiqaana maqa ati fiqaree aiqaree inoo mariani. Dinni dinni amana amana kai 50 centimetre kai mariani. ¹⁴ Mina taikasee mina amuaaqa qaara qanda faqa auquaqa. Moo sipsipa akoona apata faeena akiranannai auquaqa. Auquseeqa moo ooruku nammarikinaa aandau kuara fooqaa irana apatan-nai auquseeqa minannoo meeraqoo amuaaqa akuaqa.

¹⁵ Innee akasia saqarinnai kai naaquqara uiqaana maqa atuna auqusee kuradaaqa.

¹⁶ Maaqi mandee maaqa atuna auquaqa. Saqari

dinni dinni kuradarafa 4 metres mariani. Mina ausana qusa 66 centimetres amana kai auni ruaqa. ¹⁷ Aiqama atuna maqaki rakiqaranara irisee ati ooqi qara masee ateekaaqa. Aiqama maaqa atuna miqi kai masee ateekaaqa. ¹⁸ Innee suani afu ataaqeenni south kisaqandanai maaqa atuna 20 narisaa narisaa apamandee kuradaaqa. ¹⁹ Maaqa atuna oosana sia maqaki kaqi rakiaaqa. Siruaannai amaaqa auqusee minaki maaqa atuna kuradaaqa. Siruaannai 40 maaqa atuna oosana amaaqa auqusee minaki kuradaaqa. ²⁰ Uuqaana maqa suani dinni ataaqeenni north kisaqandanai maaqa atuna 20 narisaa narisaa apamandee kuradaaqa. ²¹ Maaqa atuna sia maqaki kaqi rakiaaqa. Siruaannai 40 amaaqa auqusee minaki maaqa atuna kuradaaqa. ²² Suani keeqee mari qaannai (west) uuqaana maaqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auquuqa. ²³ Maaqa dinni dinni munu raqaranaki kafaa qaaraqanda auqusee kuradaaqa. ²⁴ Raudaranaki maaqa atuna oosanaki apammasee kuradama saifanoo amiqimasee narisaa narisaa apinoo mariani. Maaqa atuna rakiqarana oosanaki rumba atukarasee miqi kai mamaree mirinni murufisaqa. Dinni dinni munu raqaranaki miqi kaimmiaqa. ²⁵ Miqimmaseeqa maaqa atuna 8 oosanaki siruaannai qaaraqanda qaaraqanda amaaqa auqusaifanoo 16 mariani. ²⁶⁻²⁷ Innee qauniri fandinnana akasia saqari 15 maraqa. Uuqaana maqa ataaqee dinni dinni faqa uruanai faqa faifa faifannoo auni

rumasaifanoo maaqa atukarama qumaraani.
²⁸ Mi maaqa atunna qambaana aunirira saqari fannoo maaqa amana kai dinni dinni ati mariani.
²⁹ Maaqa atuna aiqama koorannai kai rafaqa fuaqa. Maaqa atuna mau aiqama koorannai kai anaanu mamaree fuaqa. Aunirifandinna saqaris faqa koorannoo rafaqafusee mi anaanusaki ausuaqa. ³⁰ Doo Moosee qini uiqaana maqa aaqanasaa qinee qimamiafanandee masee usakaa. ³¹ Innee sipsipa asausi dirindaasi akirana faqa pannoona akirana faqa faena akirana faqa sufusee minannai amiqira qamunna auquqa. Miqimmasee mi qamunnana saa qangiroo qaqaosa faqaana amana auquqa. ³² Akasia saqari qaara faqa qaara faqa 4 marasee koorannai aiqama rafaqa fusee mina atisaa mirinni qamunna dirifandinna amaaqa auquqa. Miqimmasee mina kuradee fandinnana amaaqa 4 oosanaki siruaannai auqusee minaki kuradaqa. Kaaqa naaquqara oosirana ititaanifeera kuradaqa. ³³ Miqimmaseeqa mi qamunnana amaaqa auquqaanasaa dirisaifanoo amaaqa auqirana ameemaanai qamunna ati ooreeqanoo mariani. Miqimmasaifanoo mi qamunnana ititarafa ataufaka ameemaanai ooreeqanoo mariani. Mi qamunnafa ititaranaki moodaanaki kira bukisaki qaara oonisaa sandufa marina quqaqa. Mi qamunnafa naaquqara oosirana faqa kaaqa naaquqara oosirana faqa rainaannoo. ³⁴ Moodaanaki kira bukisa kaaqa naaquqara oosiranaki quqasee koorannai mina afu

auqusee rafaafa fuaqa, nifauara afu minasaa rafaafa fuaqa. Dirira qamunna fannoo raina nimaqaidanoo kooqi kinaa oosiranara naaquqara maqa fee qimasee kukeeqara oosiranara uriqaramasee naaquqara maqa fee qiaqa. ³⁵ Teeboora mareeqee naaquqara oosirana maaqoo oonumafi kooqiki suani afu dinni ataaqee qaannai (north) mafi quqaaqa. Qooma saqari suani afu dinni ataaqee qaannai (south) mafi quqaaqa. ³⁶ Uuqaana maqa kooqiki ititee fandinna qamunnana sipsipa asausi dirindaasi akirana faqa pannoona akirana faqa faena akiranannai faqa marasee auquuqa. Oosana oosana sandannai mooka maakira ainainauqa mi qamunnanasaa auquuqa. ³⁷ Mi qamunnana dirifandinnana moodaannai qisauku 5 akasia saqari marasee koorannai mina atimau rafaafusee qamunna dirifandinnana anaanu auqusee quqaaqa. Miqimmasee booroosannai moodaannai qisauku 5 atuna oosana amaaqa auqusee minaki kuradaaqa.

27

Innee aandau tatufi fandinna qaindana auquuqa.

(Raf 38:1-7)

¹ Innee akasia saqari marasee minannoo taturirana suqara qainda auquuqa. Mina kisaqaqandana faqa qusandanai faqa amana amana kai mariani 2.2 metres. Maqasaqari urirafa qaara faqa qaara faqa aiku 4 amana 1.3 metres mariani. ² Mina qaara faqa qaara faqa atisaa

aanaira foora auqinoo mariani. Tatufira qainda moodaa saqari fannoo kai atimau faqa qambaanai faqa aanai faqa moodaa saqarinnai kai auqusaifanoo mariani. Mi aiqama ainainausa booroosannai rafaafa fuaqa. ³ Mi tatufirana suqeemaria qaindanasaa suqee maria ainainausa booroosannai kai auquaqa. Fadameena dandaki aqufinnana afaqee maria futufitauusa faqa savoorauqa faqa uqnaurira piritauga faqa tafa fooqaa irana ati saae irana faqa ida auni afaqee maria futufitauusa faqa aiqama booroosannai kai auquaqa. ⁴ Innee fukaa asaana booroosannai auqusee booroosannai kai aanaanu faqa auqusee qaara faqa qaara faqa atinni quqaqa. ⁵ Mi fukaa asaanafa tatufira bukisa aundurairi kasaafai ooqeeqanoo qambaanai mariani. ⁶ Akasia saqari tatufira qainda qaindusi fandinnana qaaraqanda maraseeqa booroosannai miqanda rafaafuqa. ⁷ Mi qaindana maree fuaqee qifaqa kai mi saqari qanda dinni dinni anaanuki aususaifaqa maree fuaqa. ⁸ Tatufira qainda indooira saqarinnai kai aundura faqaana auquaqa. Qinee aqaanasaa ani uqafiqaa fanandee masee auquaqa.

Innee Yaaweena uiqaana maqa fiq fiqu fiq du pu rakiaaqa.

(Raf 38:9-20)

⁹ Innee amiqira sanda sufusee auquqaa qamunnannoo uiqaana maqasaa ququsara foora auqu ititaaqa. Suani afu dinni ataageenni South mina kisaafa 44 metres mariani. ¹⁰ Mi qamunnana dirifandinnana booroosannai dapu 20

fuannoo. Mi qamunnana amiqira qamunna kaqikaa sandannai sufirafa afeeka mariani. Mina dapu oosanaki booroosannai amaaqa auqirafa maqaki mariani. ¹⁹ Uiqaana maqaki oosana oosana ainainira ainainauqa aiqama booroosannai auqirafauqa kai mariani. Uiqaana maqa ati mau apupuka arifandinna aikausa booroosannai kai auquqa. Uiqaana maqa dapu rakiqarana qumaraanifee qimasee apupuka aqoosai faqa afuqai faqa arifandinafa aiqama booroosannai auqira apupuka kai mariani.

Qoomauqasaa rakisira saika.

(Wok Pris 24:1-4)

²⁰ Moosee anee Isaraee maqannaasa qimanniminaqa oorifa saqari qaqaamakinaa fadameena amiqirana kai minisaifana aiqama eendirana minannoo qooma qumbia. ²¹ Aaroonafa narí faiqi namu faqa qini Anutusa naaquqara uiqaana maqaki moodaanaki kira bukisa ititee maria qamunna naaquqara oosiranaki qoomauqa quqaaqa. Miqoo qini qifusaa eendi marinaqa qumbisaifanoo qamammareenoo iaqarana kai raquru amiani. Maa naamuaqira ufana Isaraee maqannaasa faqa misasaa ani arua kinausa faqa naaru naaru afaqaaqa.

28

Innee aanaiqi kirausa qamunna auquqa.

(Raf 39:1-7)

¹ Yaaweefa kaifaa Mooseena qimaminoo qinuu. Anee aneenna afasaana faqa mina faiqi namu

Nadabana faqa Abiuna faqa Eeriasana faqa naara masee Itammarana faqa Isaraee maqannaasa kinaana raina naaduma quqasainaqa qini aanaiqi kira saika maraaqa. ² Aneenna afasaana Aarona misakina uriqarara aanaiqikira qamunna auqu amia. Miqimmasainanoo mi qamunnafa amiqirana faqa uriqararausee qirana faqa amiani. ³ Moosee anee Aarona qamunna akunifandinna fasiqausa irirana fiqararausa qinee irirana nimiqaunausa misa kai suqusee qimanniminaqa mina qamunna akuni-aqa. Akunusaifanoo mina afisusee miqooqari qini aanaiqikira saika maraani. ⁴ Anee qimanniminaqa nimuqusasaa rufi maria ainainna faqa eefooda qamunna faqa kisaqa qamunna aikusaa faqa ititeemari qamunnana faqa akara faqaa siuta faqa akiiqa rafaqa fimari qamunna faqa aranandauganna rumberana faqa minamuna auquaqa. Misa miqimmaseeqa uriqarara aanaiqikira qamuna ani afasaana faqa mina faiqi namu faqa auqu nimisaifaqa misa qini aanaiqi kira saika maraaqa. ⁵ Akunirana akoofasauqaindi sipsipa asausi dirindaasi akirana faqa pannoona akirana faqa faena akirana faqa koora tiritanda faqa amiqira tiritanda faqa mi aininausannai aanaiqikirausa qamunna auquaqa. ⁶ Misa sipsipa asausi dirindaasi akirana faqa pannoona akirana faqa faena akirana faqa koora tiritanda faqa amiqira tiritanda faqa aiqama mi aininausannai eefooda qamunna auquseeqa minasaa oosana oosana akara ruaqa.

⁷ Eefooda qamunna anaanu qaaraqanda

aururusaa aakandianinnana auqusee eefooda qamunnasaa dinni dinni rumbaaqa. ⁸ Mina ooiqanda ianinnana amiqira qamunnannai eefooda qamunna auquandee kai masee auquaqa. Mifa eefooda qamunnasaa akunirafa mariani. ⁹ Eefooda anaanusaa akumaaqa ooni qaaraqanda pupuooni marasee dinni anaanusaa moo dinni anaanusaa moo quqasee Yakooboona faiqi namu qisauku qara taikasee qikunni ooqu qaara marasee nuqu mi ooni qandasaa akara ruaqa. ¹⁰ Dinni pupu oonisaa dinni taikasee dinni ani moodaa marasee 6 nuqu akara ruani, dinni pupu oonisaa miqikai mandee 6 akara ruani. Aiqama nari kambiqoona amana kai nuqu akara ruaqa. ¹¹ Oonisaa akara rirana akoofasa marina afiqasaifanoo mifa qaara oonisaa Yakooboona faiqi namu nuqu akara ruani. Akara rumaseeenoo mi ooni qanda koora qambaana quqasainanoo atukaranoo mariani. ¹² Miqimmasee aururusaa eefooda qamunna aakandammasainanoo Yakooboona faiqi namu qisauku qaara taikasee qikunni ooqu qaara marasee 12 Isaraee maqannaasa kikiqusinoo mariani. Miqimasai fanoo Aaroonafa misa nuqu nari aururusaa maranoo ninarinaqa qinee Yaaweesa qeeqa faiqi aanaaseera aiqama kari iriana. ¹³⁻¹⁴ Aururusaa qaara ooni atukaramma qumaree mari kooranasaa qaara qanda amiqira koora sainanda sufirana moo ati moo oonisaa moo ati moo oonisaa ootupaaqa.

Innee aanaiqi kirausa uriqararana amuqusa

saaqaraa qamunna auquaqa.
(Raf 39:8-21)

¹⁵ Innee nimuqusa saa rufi mariana aanaiqiki-rausa auqu nimisaifaqa minannoo misa Anu-tuna iriranara aidiranara irifarannoo. Eefooda qamunna auqu ainainausannoo kai auquseeqa moodaa karira akara kai ruaqa. ¹⁶ Qambaana tukaandasaifanoo aiqama ati amana amana kai 22 centimetres mariani. ¹⁷ Innee ooni amiqirana firaa feefauru aqi mariana kai marasee qaara faqa qaara faqaki mi qamunnanasaa padiaqa. Indaaruuqa padiranaki moo ooni auqu rubi faqa moo ooni toopasa faqa moo ooni ganeeta faqa minamuna padiaqa. ¹⁸ Mina aanaaqian-naa padiranaki moo ooni auqu eemeerara faqa moo ooni safairee faqa moo ooni daimanna faqa minamunannai padiaqa. ¹⁹ Mina aanaaqiannaa padiranaki moo ooni auqu teerakoosa faqa moo ooni agatee faqa moo ooni auqu ameeetisa faqa minamunannai padiaqa. ²⁰ Mina aanaaqianaa padiranaki moo ooni auqu beerira faqa moo ooni kanirianna faqa moo ooni yasapaa faqa minamunannai padiaqa. Mi oonisa koorandannai amuqusa saa ititanoo mari qamunnanasaa isooqa araaqa. ²¹ Mi oonisa moodaa moodaa ooni fannoo Yakooboona faiqi namu qisauku qara taikasee qikunni ooqu qaara marasee 12 Isaraee maqannaasa kikiqa usinoo mariani.

²² Innee nimuqusasaa rufirana anaanu amiqira koorannai auqira sanda seenandara foora auquseeqa afundasee dinni dinni atisaa qusuaqa. ²³ Koorannai anaanu qaaraqanda

auqusee amuqusa saa rufinna qamunnana mirinni atisaaqara qusuaqa. ²⁴ Qaara qanda seennanda koorannoo afundaranannai mi anaanu qandaki qusuaqa. ²⁵ Mi sandana ati qarannai aururusaa koorandannai ooni isooqa aruqaanaki ootupaaqa. Miqimmasaifanoo aururusaa eefooda qamunnasaa rumbaaqa. ²⁶ Kafaa nimuqusa saa rufi mariana anaanu qaara qanda koorannai auqusee aunduraindari ati saa mi anaanuna rumbasaifanoo eefooda qamunna mammaaqai mariani. ²⁷ Kafaa qaaraqanda aanaanu koorannai auqusee afunni qumu mari eefooda qamunnana saa aqaasanai amiqira qamunnannai sufirana ooi qandianinnana aaqa rumbaaqa. ²⁸ Nimuqusa saa diri maria qamunnana saa anaanuki dirindaasiandannai sufira sanda qusuaki eefooda qamunna saaqaraa aanaanuki qususee rumbaaqa. Miqimmasaifanoo amuqusa saa ititara qamunna sia kasi kasiani. ²⁹ Aaroonafa naaquqara maaqaki keeqafinoo mi qamunnana Israaee maqannaasa nuqu akara rirana afisusainaa qinee Yaaweese aqama kari qeeqa faiqi aanaaseera irianauranoo. ³⁰ Amuqusaa ititara qamunna raqandaamasee uqara foora akunusai mariani. Mi uqanaki ooni qaaraqanda miqanda nuqu Urimma faqa Tumimma faqa Aaroonafa mi uqanaki uqarumasee qini uiqaana maqaki aniani. Miqiraree qimaseenoo aqama kari nimuqusa saa diri maria qamunnana rufu maree anireenoo mifa qini irirana iriseenoo Israaee maqannaasa qimannimiannoo.

*Akaqa aanaiqikirausa qamunna auquaqa.
(Raf 39:22-31)*

³¹ Innee eefooda qamunna meeagoo qaraana auqirara dirindaasi akira sipsipa asausinnai kai auquaqa. ³² Anuka amaaqa auquaqa. Qamunna raqandaammasee akunusaifanoo anuka upeekaina sia anaqiani. ³³⁻³⁴ Mina atimau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusuaqa. Dirindaasi akira sipsipa asausinnai faqa pannoona akiranannai faqa faena akiranannai faqa mi saqri aqamana amana auquaqa. Auquseeqa mi saqari aqamana faqa koorannai auqira biru faqa qamunna atimau moo mafi quqee moo mafi quqee iaqa. ³⁵ Aaroonafa aanaiqikira saika auqararee qimasee mi qamunnana afisuani. Mifa naaquqara maaqaki qinee umee marunnana qifusaa aninanoo fee quqasee finanoo fee mi birusa narisaa narisaa ariqa ufa qifanoo Aaroonafa sia kuquannoo.

³⁶ Innee amiqira kooraa marasee aqiniandirana auqusee mina saa akara rumaasee Yaaweena ainainira faiqi fee qiaqa. ³⁷ Akiiqa aanaamu qusirana aqini saa quqasee dirindaasiandannoo rumbaqa. ³⁸ Aaroonafa mina aqinaaqa rumbasainaqa qinee Yaaweesa aqama Isaraee maqanaasa aaduma qini qimiraree qinna ainainausara eedoo qimasee maraanaura. Misa akaqa aaqarana auqamasee qimifaqa qinee Aaroonaa mi aqiniandiranara irisee sia minni saanaura. Kaqi maraanaura.

39 Innee amiqira sanda sufuseeqa Aaroona siuta auqusee mina akiiqa aanaamu faqa auqusee minannoo kai aranandauqa rumberana faqa auquseeqa minasaa oosana oosana akarannoo afaqa auquaqa. 40 Aaroona faiqi namu siutauqa faqa niranandauqanna rumbee mariana faqa nikiiqa aanaamu faqa kaqa amiqiranauga auqu nimiaqa. 41 Moosee anee maa qamunnausa mara maree aneenna afasaana Aaroona narí faiqi namu faqa afisu nimaqaa. Oorifa fadameena misa nikiiqa amoondunna adia nimaqasee naaduma mara quqasee mi saikana nimia. Miqimmasainaqa misa qini aanaiqikira saika maraqa. 42 Innee qusa karausisa nooiqakiqari nifundana saa ooqeeqarana auqu nimiaqa. Miqimmasaifaqa misa sia nári nifaaqa kooroo iaqera. 43 Aaronafa narí faiqi namu faqa qinee umee marunnanaki qini uiqaana maqaki keeqafinoo qini qaindasaa naaquqara qoo aanaiqikira ainaina auqararee qimasee aiqama kari mi karausisana afisuaqa. Miqiqá sia nári nifaaqa kooroo iqa sia kuqifaranoo. Maa ufafa Aaroona faqa mina saa ani aruakinausa saa faqa naaruara mariannoo.

29

Aanaiqi kirausa fukasaa mara quqasee naa-muaqira ufa.

(Wok Pris 8:1-36)

1 Maaqimmasee Aaroona faqa mina faiqi namu faqa naaduma mara quqasaifaqa

qini saikaki aanaiqikirausa mariaqa. Innee burimakau akoona timmusa faqa sipsipa akoona qaaraqanda dinee teeroo siaina kai maree aniaqa. ² Amiqira parauaqa qaindirirana innooqee mari pauraqana sia aqirana oorifa fadameenannai suqaaqa. Akaqana sia oorifa fadameennannai suqaaqa. Akaqana ausirira feemu auqusee oorifa fadameena akusee suqaaqa. ³ Mi ainainausa nafisaa amanee uqa fooqaa iranaki rumaseeqa innee burimakau akoonannoo faqa sipsipa akoona qaara qandannoo qini tatufirana suqa qimiraree qimasee mi ainainausa namufaqa qimiaqa. ⁴ Moosee anee Aarona narí faiqi namu faqa nifiqamaree qinee umee marunna uiqaana maqa kooqiki minisee qimanniminaqa amiqimmasee nammari auqaaqa. ⁵ Miqimmasaifana anee uriqarara aanaiqikira qamunna Aarona afisuamaqaa. Siuta faqa kisaqa qamunna aiku ataa dukunirana faqa eefooda qamunna meeaqoo afisirana faqa mina amuaaqa eefooda faqa nimuqusa saa rufi maria qamunnana faqa nooiqandi mariana faqa aiqama mi ainainausannoo afisu amaqaqa. ⁶ Nikiiqa aanaamu afisu amaqasee naaquqara kooroo ira fee qimasee rumbaa. Maaqi qimasee minasaa akara ruaqa. Yaaweena saikaki marifee qimasee akara ruaqa. ⁷ Rumba amaqasee Yaaweenaindi fee qimasee utaaqama amaqara fadameena akiaaqa adiaaqa. ⁸ Anee Aarona faiqi namu nifiqa quqasaina mi siutausa afisuaqa. ⁹ Niranandauganna rumbee

mariana rumbasee nikiiqa aanaamu faqa afisu nimaqaaqa. Miqimmaseeqa Aaroona faqa mina faiqi namu faqa mi saikana nimia. Misa faqa misa saa aniaruakinausa qini aanaiqikira saikaki naaru naaru marifaranoo.

¹⁰ Moosee anee Aaroona narí faiqi namu faqa qamunna afisu nimaqasainaqa burimakau akoona timmusa mara qinee umee marunna uiqaana maaqana kooqinni minisaifana Aaroona narí faiqi namu faqa qimanniminaqa mina akiiqasaa nisauku quqaqa. ¹¹ Miniseeqa mi burimakau akoonnana qinee umee marunna naaquqara uiqaana maqana kooqiki aruaqa.

¹² Aruseeqa mina fidika marasee aneenna asauku amukasaa raaraammasee qaidara qaara faqa qaara faqa atisaa aanai fooqaa iranasaa akua. Miqimmasee akaqa fidika kaqi marinauqa mara maree qaidara qainda oosanaki adiaaqa.

¹³ Miqimmasee kafaa aradanda saaqaraa ainoo aiqama maraaqa. Mina annaama faqa mina atakisa qara faqa ainoo minasaa marina faqa amaandamoona saaqaraa karoo karoonna faqa marasee tatufira qaindasaa quqasee suqa qimia.

¹⁴ Burimakau akoona amaqi faqa apata faqa arada faqa inneeqa naambeeqai aqoosai ida arasaifanoo qaani. Mifa aanaiqikirausa numoo maraqu niseenoo taika nimaqaannoo.

¹⁵ Sipsipa akoona moodaa marasee Aaroona faqa mina faiqi namu faqa qimanniminaqa nisauku mina akiiqa saa quqaqa. ¹⁶ Miqimmasaifana mina arusee mina fidika marasee qaidara qaara faqa qaara faqa atinni mi fidikana adiaa. ¹⁷ Miqimmasee

mi sipsipa akoonnana kaqikaana kaqikaana auku quqasee mina aunduraindaraa ainaina faqa aikuqara faqa nammari uqusee minauqa mareeqee mi sipsipana akiiaaqa akaqa aukiranauqa namufaqa quqaaqa. ¹⁸ Mi sipsipa akoonna aiqama afaaqa qaidarai quqasee qini tatufiranara foora ida araaqa. Mina afundara qinee asasianaura.

¹⁹ Mina ida arasee sipsipa akoona moo aanaiqikira saikaki quqee mariana mara minisainanoo Aaroonafa narí faiqi namu faqa mina akiiqasaa nisauku quqaaqa. Quqasaafana arua. ²⁰ Aruseenana mina fidika afeeriqiseenana Aaroonafa narí faiqi namu faqa nisauku uqannai naaqsosaa akusee nisauku uqannai nisauku akoonnanasaa akusee, nisauku uqannai niku akoonnana saa faqa akua. Akusee fidika kaqi marina qumaree qaidara qaara faqa qaara faqa atinni adia aquaqa. ²¹ Qaindasaqaaraa fidika akaqana qumaree nikiqaki aki maria fadameena namu faqa marasee Aaroonafa narí faiqi namu faqa nifaaqai faqa qamunnasaa faqa rurufida akunnimaqaqa. Miqi masaiqaqa Aaroonafa narí faiqi namu faqa misa fuka qamunna faqa qinindi kiani.

²² Mi sipsipana ainoo ameesa saa qaraana faqa audurakinaa afaaqa saa qaraa ainoo faqa anaama ati amiqirana faqa qaara atakisa mina saa ainoo marina faqa asauku uqannai afundana faqa ateeka aqua. ²³ Qini qimia nafisa amanee uqana kinaana oosana oosana narana moodaa moodaa maraaqa. Oorifa fadameenan-

nai suqarana moodaa faqa moo sia oorifa fadameenannoo suqarana moodaa faqa ausirira feemu moodaa faqa maraa. ²⁴ Mi naranausa Aarona faqa mina faiqi namu faqa nisaukuki quqasainaa uriqarara kaqi nimirafa qini Anutusaandi fee qiaqa. ²⁵ Miqi maseenana kafaa nisaukukinaana mareeqeenana qaindasaa sipsipa akoona auku quqaqaana amuaaqa quqasee ida arasaifanoo qaani. Qini qimira narana foori ida araaqa. Mina afundara qinee asianaara. ²⁶ Moosee anee mi sipsipa akoonana marasee qini Yaaweesa qifu saa uqeerasee qini Yaaweesa uriqarara qimira ainainee qimasee aneenna mi andauna naa.

²⁷ Innee faiqi aanaiqi kirausaikamma nimaqararee qimasee qini qimia narannakinaana sipsipa akoona ameemeeqana marasee qini qifu saa uqeeraseeqa mina asakuqannai afundana uqaqifiqaaqa. Miqimmaseeqa mi andauna aanaiqikirausa naaqa. ²⁸ Mi ufafa qini ufa marinaqa naaruura naaruura qini faiqi anaasee qini faqa moodaanaki suqira tatufirana suqaaqa. Mi andauna ameemeeqana faqa asakuqannai afundana faqa aanaiqikirausaindi mariani. Faqiqi anaasee qini Yaaweesa kaqi qimira ainaina miqimminoo mariannoo.

²⁹ Aarona kuqinaqa mina uriqarara aanaiqikira qamunna mina faiqi namu maraaqa. Mi saikana oosana arainna faasaana mi qamunnana afisusaifaqa fadameena nikiiqa amoondunna adiaaqa. ³⁰ Aarona amaaku nari akoona amaqa maqainafa uiqaana maqaki qinee umee marunnnanaki keeqafinoo

naaquqara oosiranaki ainainiraree qimaseenoo mi uriqarara qaanaiqikira qamunnana afisusee moodaannai qisauku taikasee dinni ani qaara marasee 7 faasaana saa mi naaquqara oosiranaki ainainiani.

³¹ Yaaweefa kafa Mooseena qimaminoo qinau. Anee Aarona faqa mina faiqi namu faqa nikiiqa amoodunna fadameena adia nimaqaidana suqeenna sipsipa akoonnana ameemmeeqana faqa asaukuqannai afundana faqa marasee qini naaquqara oosiranaki afeeki quqasee nammari namufaqa suqaaqa.

³² Qinee umee marunna uiqaana maqana kooqiki mina naaqa. Nafisa amanee uqaki kaqi mari feemusa namu faqa naaqa. ³³ Misa namasaifana aanaiqikira saikaki keeqarana fadameena nikiiqa amoondunna adiasainanoo misa numoo akiqara mininnisarafa mariannoo. Mi narannafa naaquqarafa marinara aanaiqikirausa kai naaqa. ³⁴ Akaqa aandau faqa feemu faqa nimuaquinaqa sia naifandinnana kananaana kaqi marinaqa ida araseeqa minaki aqusaifanoo amiqimmasee qama taikaani. Mi naranafa naaquqarafa marinara sia naaqa.

³⁵ Aaroonafa narí faiqi namu faqa aanaiqikira saika oosana arainna qooqari qinee ani aamua qunandee iqa moodaannai qisauku taikasee dinni ani qaara marasee 7 faasaana uqanna kai mi ainainausa auqaaqa. ³⁶ Mi moodaa moodaa faasaannasaa anee burimakau akoona tatufirana suqa qiminanoo aiqama numoo taikaanoo. Miqinanoo qini qaidara fannoo anukarafa mariannoo. Miqimmafina oorifa fadameena

qaidarasaa adiasainanoo naaquqanoo mariani.
³⁷ Aiqama kari moodaannai qisauku taikasee dinni ani qaara marasee faasaana saa miqia. Miqinanoo qini qaidara fannoo kaaqa uqanna naaquqarafa mariannoo. Moo fannoo fee moo ainaina fee mina auqainafa mina naaquqara afeeka fannoo aruannoo.

Aiqama faasaana tatufirana suqara oosana.
(Namba 28:1-8)

³⁸ Yaaweefa kafa Mooseena qimaminoo qinau. Innee sipsipa aanaaqi qaaraqanda moodaa aukuna marara qanda marasee qaidarai tatufirana suqaaqa. Naaru naaru aiqama faasaana miqi kaimmiaqa. ³⁹ Moo sipsipa kananaana tatufuaqa moo eendimarina tatufuaqa. ⁴⁰ Kananaana suqainna sipsipana namu faqa amiqira sakumannoo qaindirira parauaqa mina ummaara fannoo 1 kilogramme oodaa namu faqa amiqira oorifa fadameena namu faqa quandasee suqa qimia. Uainna nammari oodaa 1 litre amana kai qinee Anutusa naannana adiaaqa. ⁴¹ Eendi marinaqa suqainna tatufirana kananaana suqaandee kai iqa sakuma qaindiriranannoo faqa oorifa fadameenannoo faqa uainna nammarinnoo faqa suqaaqa. Mifa qini Yaaweesa qimira narana maridanoo. Mina afunda fannoo qini asairana qimidannoo.

⁴² Naaru naaru kasooaqee maa tatufira suqarafa qinee umee marunna uqaana maqa kooqiki qini qifu saa tatufu qimiaqa. Miqifaqa miqoo qinee inni qeeqa faiqi anaasee faqa moodaanaki maridaqa ufa

qima nimianauro. ⁴³ Miqoo qinee Isaraee maqannaasa faqa mariananoo qinee umee marunna maaganakiqari daroo daraa ira kaaqa qarafa mi saqanna naaquqainaqa sia faiqi anaasee kaiqeesa miqoo fifaranoo.

⁴⁴ Qinee qeeqa uiqaana maqa faqa qaidara faqa naaquqara faika masaanauro. Qinee Aaroono nari faiqi namu faqa qini ainainirausa mariafaqa naaduma misa aanaiqikira saikaki quqaanauro. ⁴⁵ Qinee Isaraee maqannaasa qambaana maridaqa misa Anutusa marianauro.

⁴⁶ Misa qini Yaaweesa nariqa Anutusa Isipa maqa maqaqaindaraana nifiqee aniafannanara iri marifaqa qinee misa qambaana marianauro. Qinee Yaaweesa misa Anutusa marianauro.

30

Amiqira undimari ida munana suqara qainda auquaqa.

(Raf 37:25-28)

¹ Yaaweefa kaifaa Mooseena qimaminoo qinau. Moosee innee akasia saqari marasee amiqira afundi mari ida munana aree fandinna qaidarana auquaqa. ² Mi qaidarafa dinni dinni amana kai mariani. Mina kisaqandanai 45 centimetres mariani. Mina qusandanai miqi kai inoo 45 centimetres mariani. Maqa saaqari ooru firafa 90 centimetres mariani. Mina qaara faqa qaara faqa ati moodaa saqarinnoo kai burimakau aanaira foora auquaqa. ³ Mina afu faqa aanai fooqaana faqa ataaqeeqara faqa amiqira koorannai kai rafaqaqafusee koorannai

mina fiqumma auquuqa. ⁴ Koorannai qaara qanda aanaanu auquusee dinni moo dinni moo quqasaifanoo qaindusi fandinna saqarina atukaramma qumaraani. ⁵ Mi qaindusira saqari qanda akasia saqarinnai auquusee koorannai rafaqa fuaqa. ⁶ Mi qaidarana mara maree naaquqara oosirana dinni qini moodaanaki kira bukisa marina oorinni quqaaqa. Miqoo qinee inni faqa moodaanaki kianaara.

⁷ Aiqaama kananaana Aroonafa qoomauqa andeeqarara anireenoo mifa mina saa amiqira adiafaa ira afundi marina suqaani. ⁸ Mifa kaifaa eendi marinanoo qoomauqa qumbiseenoo amiqira adiafaa imari afundana imarina suqaani. Mi oosanafa naaru naaru sia uqanna taikaannoo kaqi kai mariannoo. ⁹ Innee sia moo mi qaidarana saa qinee qaoo qima qaunna afundirana suqaaqa. Aandau tatufiranee sakuma qaindirira tatufiranee uainna nammari adiasee suqara tatufiranee sia minasaa suqaaqa. ¹⁰ Aiqaama aukuaana moodaa faasaana kai Aaroonafa mi qaidaranasaa ainaininanoo qini qifusaa amiqiannoo.

Yaaweena uiqaana maqanara takisa aqira oosana.

¹¹ Yaaweefa kafa Moosena qimaminau. ¹² Moosese anee Isaraee maqannaasa nuqu marasainaga moodaa moodaa fasiqa nariqa mariranara qini feefauru qimiaqa. Miqimmasee nuqu maree marinaga moo ummaara sia misa saa aqufuannoo. ¹³ Aiqaama nuqu akaraki marisa uriqararawsa auqu ramaqaa munnimmana

amana kai quqaaqa. Aiqamausa mi feefauruna aqiqa qini qimira ainaina qimifaranoo. ¹⁴ Faiqi moodaa fasiqa aiku asauku taikasee 20 aukuaana faqaasa faqa mina fiqarara aukuaana faqaasa miqimmasee qini feefauru qimiaqa. ¹⁵ Misa nariqa marirana maaqimmasee feefauriaqa. Ainaina faqaasa sia fiqaramasee aqifaranoo. Ainaina siaisa sia oorudupi masee aqifaranoo. Aiqama amana amana kai aqifaranoo. ¹⁶ Mi munnimmana Isaraee maqannaasiannai marasee qinee umee marunna uiqaana maaqafa mandaikinana minannoo itipia. Misa nariqa mariranara mi takisana aqusaifaqa qinee misa saa itita nimaqaranara irianaara.

Booroosannai fraa difaani auquaqa.

¹⁷ Yaaweefa Mooseena maaqi qimasee kafa qimaminau. ¹⁸ Moosee anee nammari auqemaria difaanina fraana auqua. Booroosannai auqusee mina aiku faqa booroosannai kai auqua. Auqusee nammari minaki adiasee qini uiqaana maaqa dinni marinana qaidara dinni marinana qambaana quqaa. ¹⁹ Aaroonu faqa nari faiqi namu faqa minaki niku nisauku nammari uqimarifaranoo. ²⁰ Misa qini ufa suqira maaqaki keeqaane qimasee niku nisauku minaki mafi nammari uqusee qini qimifandinna narana qaidarasaa suqa qimiaqa. Miqiqqa sia kuqifaranoo. ²¹ Misa nari niku nisauku nammari uquseeqa sia kuqifaranoo. Maa sanda ufana Aaroonafa nari faiqi namu faqa kasooqaqee misa saa

aniaruakinausa faqa maa sanda ufana afaqee faranoo.

Aanaiqi kirausa utaaqara fadameena auquaqa.

²² Yaweefa kaifaa Mooseena qimaminoo qinau.
²³ Moosee anee makaqa anoona moomoo 6 kilograms faqa isaaqa anoona moomoo 3 kilograms faqa amiqira undi mari innupina anoona moomoo 3 kilograms faqa maraa. ²⁴ Saadapu moomoo 6 kilograms faqa maraa. Aiqama ainaina uiqaana maqa sikeera amana kai mari-ani. Oorifa fadameena 4 litres amana minaki adiaaqa. ²⁵ Mi naaquqara fadameena Yaaweenaindi fee qimasee nikiiqa amoondunna adiee fandinana auqusee amiqira afundi marina namufaqa quandaqa. ²⁶ Anee mi fadameenauusa auqu maree qini uiqaana maqasaa akuseenana qini moodaanaki kira ufa mari bookisanasaa faqa akua. ²⁷ Aiku faqaa teeboora faqa minasaa qaraa ainainauqa faqa qooma saqari faqa minasaa qaraa ainainauqa faqa amiqira afundi mari pauraqana ida qee mari qaidarana faqa akua-maqa. ²⁸ Tatufirana suqee mafia qaidarana faqa minasaqaraa ainainauqa faqa akuamaqasee nammari difaani faqa mina aiku faqa akua-maqa. ²⁹ Miqimmasee mi ainainausa aaduma saa mara quqasainanoo kaaqa naaquqanoo mariani. Moo fannoo fee moo ainainee mi ainainausa auqainafa mi ainainausa naaquqara afeeka fannoo naruannoo. ³⁰ Miqimmasee Aaroonna nari faiqi namu faqa mi fadameenna aku nimaqa sainaqa qini aanaiqikira saikaki mariaqa. ³¹ Moosee anee Isaraee maqannaasa

maaqi qimasee qimannimia. Maa naaquqara fadameenna nikiiqa amoondunna adiee fandinana qini ainainiranaki naaru naaru quqaqa. ³² Maa fadameennafa sia kaiqee fasiqa adianimaqee mariafa maridanoo. Innee sia moo fadameena miqirana auquqa. Mifa naaquqara ainaina marinara innee minara naaquqara fee qimasee eerairiaqa. ³³ Yafee moo fannoo maa fadameennara foora auqusee moona akiiaqa adiainafa qini faiqi aanaaseeki sia mariannoo.

Amiqira undimari munana auqimaria pauraqana oosana.

³⁴ Yaaweefa kaifaa Mooseena qiminoo qinau. Moosee anee oosana oosana amiqira undi mari pauraqana sitakatee pauraqa faqa oonikaa pauraqa faqa karabanumma pauraqa faqa amiqira makaqa anoona faqa aiqama amana amana kai maraa. ³⁵ Maraseenana amiqira afundi mari-faqa nifaaqai aki marianara foora auqamasee ida arasainanoo qeenoo amiqira muna afundi-ani. Ooruku faqa oodaa quqasainanoo amiqi-noo naaquqara faikiani. ³⁶ Anee mina atiuqa maraseenana kaada ririisainanoo kookoomaika mafinana mara maree qinee umee marunna maqanaki muruseenana moodaanaki kira bukisa oorinni quqaa. Mi amiqira undana imarinara kaaqa naaquara fee iaqa. ³⁷ Innee sia moo miqira afudimarinnana auquqa. Innee minara naaquqara andeeqara ainaina Yaaweenaindi fee qiaqa. ³⁸ Yafee moo fannoo miqirana amiqira undi marina afaaqai akiraree qimasee auqinafa sia qini faiqi aanaaseeki mariannoo.

31

Yaaweefa uiqaana maqa kinaa ainaina auqifandinna fasiqausa mara quqanau.

(Raf 35:30–36:1)

¹ Yaaweefa kafaa Mooseena qimaminoo qinau.
² Moosee qinee innikinaana Beesareerana utaaqeeqa. Mifa Urina amaaku Hurana anaiqi Yudana oosanakinaafa maridanoo. ³ Qinee qeeqa maraquna afeeka aaku amaqqeeqa. Qinee irirana faqa aiqama ainainirana akoofasaikira saika amiqa. Aiqaama amiqira ainaina auqirana akoofasaikirana faqa amiqa. ⁴ Mifa koorannoo faqa siruaannoo faqa booroosannai faqa oonu mafi irisaidanoo oosana oosana ainaina akoofasauqa akara rimaria irirana faqa auquani feera amiqa. ⁵ Qinee firaa feefauru aqi maria oonina atekara oosana faqa saqarinnai ainaina amana auqirana akoofasaikirana faqa Basareerana amiqa. ⁶ Qinee moo fasiqa Ooqooriabana Aqisamakana amaaku Dannana oosanakinaana mara quqasaanoo Beesareerana faqa ainainiannoo. Qinee akaqausa faqa firaa irirana oosana oosana ainaina auqirana akoofasaikirana nimiqa. Miqimma saanaqa misa qinee qimannimianna aiqama ainainna auquaqeera. ⁷ Qinee umee marunna uiqaana maaqana faqa moodaanaki kira bukisa faqa mina afu numoo taikannisarana faqa aiqama uiqaana maqakinaa ainainauqa faqa auquqa. ⁸ Teeboora faqa minasaa mari ainainausa faqa ramma dirirana amiqira koorannoo auqirana faqa minasaa mari aiqama

ainainausa faqa amiqira afundi mari tatufirana suqara qainda faqa auquaqa. ⁹ Tatufirana suqee maria qaindana faqa mina suqee maria ainainausa faqa niku nisauku nammari uqimaria difaanina faqa mina oosana faqa auquaqa. ¹⁰ Misa amiqira qamunnauqa Aarona faqa mina faiqi namundi faqa aanaiqi kira saikaki maridaqa afisifandinnana faqa auquaqa. ¹¹ Qinindi fee qimasee akunnimaqee fandinna fadameenna faqa adiafaa ira amiqira afundimarina naaquqara oosirana kinaana faqa auqua. Misa auqidaqa qinee qunandee kaimaseega auquaqa.

Sabata idooara faasaana maridanoo.

¹² Yaaweefa Mooseena qimaminoo qinau. ¹³ Moosee anee maaqi qimasee Isaraee maqannaa qimannimia. Sabata qini idooara faasaana amiqimandee ireedakai mariaqa. Mi faasaanafa qini faqa inni faqa qambaana naaru naaru maridanoo qinee Yaaweesa inni mara qeeqa faiqi anaasee kunnanara quqannifiqaannoo.

¹⁴ Innee qini idooara faasaana naaquqarafa marinara ireeda kai mariaqa. Faiqi moo fannoo sia ireeda marirai mi faasaana ainaininnana kuqa aruqa. ¹⁵ Qisauku dinni taikasee dinni moodaa marasee 6 faasaana innee inneeqa ainainiaqa. Qisauku dinni ani qaara marasee 7 faasaana firaa idooara faasaana qini naaquqara faasaana maridanoo. Yafee mi faasaana ainaininnana innee mina kuqa aruqa. ¹⁶ Isaraee maqannaasa innee faqa qinee faqa moodaanaki

kunnanara mi faasaanafa uqannifiqaani. ¹⁷ Mi faasaanafa inni Israaee maqannaa faqa qini faqa naaru naaru aqoondikirana koorooi mari faasaanafa mariannoo. Qinee Yaaweesa dinni taikasee dinni ani moodaa marasee 6 faasaanasaa maqa faqa innaaruna faqa auqusee dinni ani qaara marasee 7 faasaana ainainirana quqasee idooafannanara mi faasaanafa idooara faasaana mariannoo.

¹⁸ Anutufa aiqama ufa Mooseena Sinai aaqanasaa qimami taikaseenoo qaara ooni ausiriranasaa Anutufa narí asaukunnai sanda ufa akara rumaqoona aminau.

32

Faiqí anaasee koorannai burimakau akoona aanaaqi auqiqau.

(Lo 9:6-29)

¹ Mooseefa aaqanai kisaaqasaa ooru maru-faqa Israaee maqanna faiqí anaasee Aaroonafa maruqoo suqumaree aniree Aaroonaa maaqi qimasee qimamiqau. Maa fasiqafa maasa Isipa maqa maaqaindari qifiqee anufa naqaafee imari faqee maasa sia iridaqa. Minara anee moo anutuna auqusainanoo maasa indaarunnikamma ni-maqaani.

² Aaroonafa misa ufa iriseenoo qinau. Inneeqa faiqí anaasee naaqookinaa koora faqa fidinaanu faqa tatuseeqa mini qimiyaqa. ³ Miqi qufaqa aiqama faiqí anaasee narí naaqookinaana raduku maree mini Aaroonaa amiqau.

⁴ Amisoofanoo Aaroonafa mina qumareenoo

idannai tasirisiri mandeenoo maqasaa burimakau akoona aanaaqi amana auqu qoon-aki adiasoofanoo burimakau amana auqinau. Auquseenoo paipanannai mina atiuqa andeeqanau. Miqimmasoofaqa faiqi anaasee qiqau. Isaraee maqannaasa maafa maasa Anutufa maridanoo. Maafa kai maasa Isipa maqannaindari nindiqee anufa maridanoo.

⁵ Aaroonafa misa ufa iriseenoo burimakau akoona amana auqirana aqa tatufira qainda auquseenoo faiqi anaasee qimannimino qinau. Duna aiqama suqumaree aniraifaqa oomaqa sakasee nidaqa Yaaweena aqa uqeeraa. ⁶ Miqi qimasoofaqa iaqoo kananaana faiqi anaasee akaqa aandau mara maree minisee qaindasaa tatufirana faqa Yaaweena faqa moodaanaki kira tatufirana faqa suqaqau. Suqamiseeqa ooqu marifiqa afeeka nammari faqa narana faqa namaseeqa findifiqa aanaaseeuqa faqa manda oosana maraqa.

⁷ Yaaweefa misa nindafeenoo Mooseena qimaminau. Anee kai kaqi oqufua. Faiqi anaasee anee Isipa maqannaindari nifiqee anianausa qini minnisee aqara oosana maraidammia. ⁸ Misa doo qinee fuagee qimasee naamuqiafanna aana minniseea. Misa koorannai burimakau akoona aanaaqi amana auqusee mina tatufirana suqamiseeqa minara innaaru qidaqa. Misa maaqi qidaqa Isaraee maqannaasa maasa Anutufa maafa maasa Isipa maqannaindari nifiqee anufa maridanoofee qidaqa.

⁹ Minara qinee Yaaweesa Isaraee maqannaasa kaaqa ramoo ramaa imariafaqa iridaqa. ¹⁰ Doo firaqoo qini qirana qaifaqa misa kuridi taikasaanaura. Anee sia qiniara qaoo qia. Miqimaseeqa ani faqa anisaa ani aruakinausa faqa kai amiqi amiqimma nisaanaqa firaa maqanna marifaranoo.

¹¹ Mooseefa irinoo Yaaweena aanoo qiranara innaarukiqari qaoo qidanoo qinau. Oo Yaawee nanaree anee aneenna faiqi aanaaseera arana qaidanoo fee. Anee firaa afeekannai misa Isipa maqanaindari nifiqee anianafa naqaafanee aanoo qima nimaqaidanee. ¹² Anee miqinaqa Isipa maqannaasa aniara nari kai qimirisee Isaraee maqannaasa nifiqee aqana aikunni munusee naru taikarara nifiqee fiifoo qifaara. Sia arana qaani aneenna arana qara irirana quandasee sia ummaara aneenna faiqi anaasee nimia. ¹³ Anee aneenna ainainira faiqiuqa Abarahammana faqa Isakeena faqa Yakooboona faqa kuqaa qima afeekaikira ufa qunnanara oonumafi iria. Anee misara fasaura foora mafifaqa qinee qima afeekaikiafanna maqa maaqana inni nimanaree qinau. Nimisaananoo mi maqa maaqafa innindikamminoo naaru naaru mariannoo fee qinau. ¹⁴ Mooseefa miqi qufanoo Yaaweefa nari aranaqara irirana quandasee sia ummaara nari faiqi anaasee nimaau.

¹⁵ Yaaweefa Mooseena qaara oonisaa akara rumamufanoo mareenoo aqanaindari afaasai nari maqanna marunnai ooqu finau. Ausirira ooniqandasaa Anutufa sanda ufa dinni dinni akara rumaqoona uqirafa ooqu finau. ¹⁶ Anutufa

narí kai mi oonina auquseenoo minasaa sanda ufa akara rinau.

17 Yoosuafa irufaqa faiqí anaasee nariqa uíqaana maqusakiqari faaqa fuisee qida qufanoo iriseenoo Mooseena qima minoo qinau. Qinee rakidaqia ufana iridaqa. 18 Miqi qufanoo Mooseefa qinau. Sia qufoona rira ufa fau maridanoo fau. Sia qiki faafau qirufa fau maridanoo. Idi rarana kai iridaqa.

19 Mooseefa uíqaana maqusa adeedi ooqureenoo nindafoofaqa burimakau aanaaqi amana auqirana faiqí anaasee fusakidaqa idi ree mariqau. Miqi marufanoo Mooseefa nindafoofanoo aranaqoofanoo akara rira ooniqara aaqana aikunni maqasaa aqusoofaqa miqanda rukamiqau. 20 Mooseefa aranaqoofanoo burimakau aanaaqi amana auqirana qumareeqeenoo idaki aqusoofanoo tasiris irinau. Tasirisiri maseenoo andaana rumeeqee nammariqi aqusee naqee qufaqa Isaraee maqannaasa mi nammarina naqau.

21 Miqimandeenoo Mooseefa quandakufanoo Aarona qimaminau. Maa fasiqa anaaseesa ani naqi fee mamaqaafanee anee maa manda firaa aaqarana misa nifaaqai quqeenee.

22 Miqi qufanoo Aaroonafa Mooseena qimaminau. Oo qini uriqararafa anee sia qiniara aanoo qia. Anee maa fasiqa anaaseesa oosana irimariananoo. Misa kaaqa mandoosana auqarara sandanainai qimariasa maridaqa. 23 Misa qiniara maaqi qia. Maasa maa fasiqafa Mooseefa maasa Isipa maqa maaqaindaraana qifiqee anunaki

kambiqai ainainnara sia iridaqa. Anee moo anutuna auqu sainanoo maasa indaarunnikamma qimaqaani. ²⁴ Miqi qiafaqa qinee qimannimiqi koora faqaasa qimiagee qunaqa uaqee iasa akaqana qimia. Qimiafaqa idaki aqusaunanoo burimakau aanaaqi kambiqeenoo.

²⁵ Mooseefa qafoofaqa Aroonafa eedoo qufaqa faiqi anaasee nariqa namuqaa nifusaa oosana oosana manda oosana maroofaqa namuqaa misara uteetiqiqau. ²⁶ Minara Mooseefa arana qoofanoo uiqaana maqusa kooqiki kikiqamma fufanoo maaqi qimasee nammeera qinau. Aiqamausa yafee Yaaweenaindi kiani qinafa maqoo aniaqa. Miqi qufaqa aiqama Reefina aiku asauku kai suqumaree miqoo ani mina fiqumma fiqau.

²⁷ Aniroofanoo Mooseefa maaqi qimasee qimanniminau. Isaraeerana Anutufa Yaaweefa maaqi qimasee aiqamausa inni naakapaidanoo mifa inneeqa rakira paipana mara maree innee uiqaana maqusa dinni kooqindari dinni kooqinni oonuree aniree idaqa unna anutuna amana auqi mariana akiiqara inneeqa nikaqaafasaaauqa faqa inneeqa niqoondiuqa faqa inni naaqa mariasa faqa aiqama kuqa naru taikaaqa. ²⁸ Miqi qufaqa Reefina aiku asauku eedoo qimasee mi faasaanna 3,000 fasiqa nariqau. ²⁹ Narusoofanoo Mooseefa kafa qimanniminau. Innee inneeqa faiqi namufaqa inneeqa nikaqaa fasaauqa faqa naruanara innee Yaaweena aanaiqikirusai kiqa mariafanoo. Miqi mariafanoo Yaaweefa nari amiqi amiqirana inni niminoo.

³⁰ Iaqoofanoo kananaana Mooseefa faiqí anaasee qima nimirau. Innee firaa manda aaqarana marasaafaqa aqbee qinee aaqanai kaifaa ooruree inniara Yaaweena iramiriananoo inni aaqarana akiiqara minnisaannoo fee.

³¹ Miqi qimaseenoo Mooseefa Yaawee funnai aaqanai ooruree qimaminoo qinau. Maa fasiqa anaaseesa firaa manda aaqarara marasee unna qira anutuna koorannai auqusee minara innaaru qiqiiaafanoo. ³² Amanee misa aaqarana akiiqara minninnisaa. Sia minninniseenana qini duqu ani faiqí anaasee faqa ani bukaki akararinoo marina kai rukaa.

³³ Yaaweefa iriseenoo qinau. Sia kaiqeesa nuqu qeeqa bukakinaana rukaanaura. Qini ufa rukiee mariasa nuqukai rukaanaura. ³⁴ Doo oonuree faiqí anaasee nifiqamaree qinee qimamifanna maqa maaqanai fua. Anee iria, qini qangiroo fannoo inni indaarunni kamma nimaqaannoo. Mi fasiqa anaaseesa aaqarana akiiqara ummaara nimianna aukuanafa anidanoo. ³⁵ Miqi qimaseenoo Yaaweefa manda aurirana mi fasiqa anaaseesa nimirau. Misa Aaroonara qufanoo koorannai burimakau akoona aanaaqi auqunara miqinau.

33

Yaaweefa Isaraee maqannaasara Sinai aaqana aikunni maruna minnisee fuaqera qimannim-inau.

¹ Yaaweefa maaqi qimasee Mooseena qimaminoo qinau. Anee faqa Isipa maqa maaqaindari nifiqee anianna fasiqa anaaseesa

faqa maa maqana quqasee qinee qima afeekaikammasee Abarahaamana faqa Isakeena faqa Yakooboona faqa misasaa ani aruaki kambiqainausa faqa nimiraree qiafanna maqanasaa fua. ² Qinee qeeqa angiroo aiqaananoo inni nifu uqi marinaqa fimarifaqa qinee Kannaa maqannaasa faqa Amooraa maqannaasa faqa Heeta maqannaasa faqa Peerisa maqannaasa faqa Hifita maqannaasa faqa Yeebusa maqannaasa faqa naru nifaqaaqa ianaura. ³ Innee ainoo faqaa maqasaa ainaina ummaqusaa fanoo reemindeemiri mari maqanasaa fifaranoo. Qinee qeeqa sia inni faqa fuanaura. Innee ramooramaa imariasa mariafaqa qinee inni faqa fidaqa aanai inni naruanoora.

⁴ Isaraee maqannaa Yaaweena mi ufana iriseeqa nifaaqa auqira ainaina aiqama raipagu quqasee soofaara maridara foora mafiqau. ⁵ Yaaweefa maa ainaina auqaqeeru qimannimufaqa miqiqau. Maaqi qimasee Yaaweefa Mooseena qimaminau. Innee kaaqa ramooramaa imariasa mariafanoo. Qinee inni faqa maqee fiqa inni kuridi nimaqaunaiqini. Doo maqee inneeqa nifaaqa auqirana raipagu quqasee kaqi marifaqa qinee inni naqaafee mannimaqaannanara oonumafi irianaura. ⁶ Miqi qimasoofaqa Sinai aqana quqasee fidaqa Isaraee maqannaasa sia nári nifaaqa auqirana afisiqau.

Yaaweefa Mooseena faqa ufa qimaru uiqaana maqafa.

7 Isaraee maqannaasa nariqa uiqaana maaqauqa usakasoofanoo Mooseefa naaquqara uiqaana maaqa naambeeqai nianasaa usakanau. Usakasee mina auqureenoo Yaaweefa umee mari uiqaana maaqa fee qinau. Faiqí anaasee moo fannoo Yaaweena iriranara irianee qimasee mi maaqana kooqinni fimariqau. 8 Mooseefa narí uiqaana maaqai fufaqa faiqí anaasee narí uiqaana maqa kooqikiaga kikiqamafi qafee maru fanoo keeqanau. 9 Mooseefa uiqaana maaqaki keeqafufanoo asuru qumureenoo mi kooqinaki marufanoo Yaaweefa minakiqari Mooseena faqa ufa qimarinau. 10 Asuru uiqaana maqa kooqiki qumu kasoo inoo marufaqa faiqí anaasee mina qafamasee ninuka tuqu naumoo amisee Yaaweena amooqi mariqau. 11 Yaaweefa Mooseena faqa narí oori narí oori qafaida ufa qimarinau, faiqi narí aqoondi faqa ufa qimarindee inau. Ufa taikaseenoo Mooseefa anirandee faiqí anaasee maru uiqaana maaqanai finau. Kumaaraa moo mina dadaaqa marufa Yoosuafa Nunnaana amaaku naaquqara uiqaana maaqaki kaqi marinau.

Yaaweefa narí faiqí anaasee faqa marianauree qimasee qima afeekaikinau.

12 Mooseefa Yaaweena qimaminoo qinau. Oo Yaawee kuqaa anee qiniara maa fasiqa anaaseesa indaarunnikamma nimaqainaqa mi maqanasaa fuaqee qinau. Anee sia qini faqa fidanoo qini dadaaqianinna fasiqanara qimaqimiananoo.

Anee qiniara amiqimmasee iridana qiniara asasi-
daqee qiananoo. ¹³ Anee kuqaa qiniara miqi-
dana anee qimiriannana qimaqiminaqa qinee
ani ainainiranaki maridqa maqee maqee ani
asasamma amaqaanaura. Anee maanara faqa
iria, maa maqannaasa ani faiqí anaasee anee
utaaqama qaanausa maridaqa.

¹⁴ Yaaweefa mina iriseenoo Mooseena qimam-
inau. Qinee ani faqa fidaqa adooarana inni
nimianaaura.

¹⁵ Mooseefa iriseenoo Yaaweena qimaminoo
qinau. Anee sia maasa faqa finana sia maasa
maaqqooqari diqiqaa. ¹⁶ Anee sia maasa faqa
finaqa naqaafee masee akaqausa anee qiniara
faqa aneenna faiqí aanaaseera faqa rimarianna-
nara irifaranoo fee. Anee maasaki marinaqa maa
maqa maaqana kinaasakiqari naaduma moo ki-
rausa marianaaura.

¹⁷ Yaaweefa Mooseena mi ufana iriseenoo
qimaminau. Doo anee qianandee kaimmi-
anaura. Qinee amiqimmasee aniara irimarun-
nanara faqa aniara asasi marunнанara faqa
miqianaaura.

¹⁸ Mooseefa mi ufana iriseenoo kaifaa
Yaaweena iramirinoo qinau. Amanee aneenna
oori daroo daraa irana uqaqifiqasainaqa
qafaanauree qufanoo Yaaweefa qinau.

¹⁹ Amana qinee qeeqa amiqira areenarana
quqasaananoo ani aiaaqaree afunni fuannoo.
Qinee ani afusaa qeeqa naaquqara duquara
koooroianaaura. Qinee Yaaweesa qeeqa ni-
fauarana faqa qeeqa qimudao qirana faqa qinee
utaaqama qaanausa nimianaaura. ²⁰ Moosee anee

qini doori sia qafeenaranoo moo fannoo qini qiqafainafa sia amana kaqi mariannoo kuqannoo. ²¹ Moosee anee qini daakaarinni oonisaa kikiqina maria. ²² Qini doori areenarafa finaqa qinee ani ooni afoo iranaki quqaseeqa qeeqa qisauku anisaa ititaseeqa fiqaramafiqa qisauku maraanaura. ²³ Qinee qisauku mara maraanana anee qini itaufaka kai qiqafa. Sia doori qiqafeenaranoo.

34

Mooseefa kafaa inaaqianna sandufa maranau.
(Lo 10:1-5)

¹ Yaaweefa Mooseena qimaminoo qinau. Moosee anee maa aaqannasaaqari ooquree ooni ausiqara atekasee maree urua. Anee indaarugaa qanda amana kai atekasee maree urua. Murusainaqa indaaruru kamunnaasaa akara ruafannufana kafaa akara ruanaura. ² Anee magee deedaqamaqai marinana duna kananaana eendai mara maree Sinai aaqanasaa ururee qini paquria. ³ Faiqi moo fannoo sia ani faqa uruannoo. Sia uqanna moo fannoo aaqanai fee aaqana aqa fee mariani. Sia misa burimakau sipsipa faqa aaqana aikunni andanda naqa.

⁴ Mooseefa iriseenoo ooni ausirirana qaara qanda atekamaree kananaana Yaaweefa qimamundee inoo Sinai aaqanai oorufinau. ⁵ Yaaweefa asurukina qumureenoo Mooseena faqa kikiqa mafinoo nari auquara koorooinoo qinee Yaaweese qinau. ⁶ Yaaweefa Mooseena oorinni fiqaree oonuree maaqi qimasee firaqoo

qinau. Qinee Yaaweesa maridaqa. Qinee qimuqusirana faqa qimudao qirana faqa umbiqaransa maridaqa. Qinee sia kai kaqi aanooqunansa maridaqa, qinee kaqa faiqi anaaseera qimuqusi marunansa mardaqa, qinee ooqai marunnaqoo kai marunansa maridaqa. ⁷ Qinee qeeqa qima afeekaikira ufa kasooaqee nukudara foora kambiqainausara qima qaafanna ufana kaqi kai iridqa, numoo faqa manda oosana akiiqara faqa minnisaanaura. Qinee numoo auqainna fasiqa anaaseesa faiqi namu faqa mina anaiqi mara faqa mina asaifaqausa faqa afaqnausa faqa sia sia naruanaura, naruanaura.

⁸ Mooseefa mi ufausa iriseenoo kai kaqi maqasaa oorindari mapamufufanoo Yaaweena amooqinau. ⁹ Amooqidanoo maaqi qimasee Yaaweena qimaminau. Yaawee anee kuqaa uqanna qiniara asaidana qinee aniara maasa faqa fuanneera iridaqa. Maa fasiqa anaaseesa ramooramaa idaqa anee maasa numoo akiiqara minniqiseenana maasara aneenna faiqi anaasee fee qia.

Anutufa faiqi anaasee faqa kafa moodaanaki kinau.

(Raf 23:14-19; Lo 7:1-5; 16:1-17)

¹⁰ Yaaweeefa Mooseena qimaminoo qinau. Maqee qinee Isaraee maqannaasa faqa moodaanakikira ufa qidaqa. Qinee misa nifusaa firaa ainainauqa sia maa maqanasaa moo atinai faqa moo maqanna qambaana faqa auqaafanna ainainansa auqaanaura. Aiqama

faiqí anaasee qínee Yaaweesa fíraa ainaina auqaanaqa qafaifanoo naaquqaannoo. Inni dadaaqianifeera miqianaúra. ¹¹ Qínee magee qimannimianna sandufana amiqimasee irisee mimau fuaqa. Qínee Amoorá maqannaá faqa Kannaana maqannaá faqa Heeta maqannaá faqa Peerisa maqannaá faqa Hifita maqannaá faqa Yeebusa maqannaá faqa inni noorinni fidaqa misa nifaqasaana fifaranoo. ¹² Innee fuka maqasaa oonuree sia mi maqannaasa faqa kaqikaa ainaina ree fíraa ainaina ree sia misa faqa moodaanaki kira ufa qiaqa. Misa ufaanara foora fufusaifaqa innee minaki arifoora, minara qeerairiaqa. ¹³ Misa tatufirana suqee maria qaidarana misa ooni atekarana rakiaaqee maasa naaquqara anutunee qimariana innee mina rukamu aquaqa misa saqari ateeka rakiqasee maasa anaasee anutufa Aseeraafee qimariana minauqa faqa ateekaateekamma aquusaqa. ¹⁴ Innee sia moo unna anutunara innaaru qiaqa. Qínee Yaaweesa unna anutufa qini qímaaqa maqaranara rairai qimarunausa maridaqa.

¹⁵ Innee fuka maqasaa oonuree sia uqanna misa faqa moo ainainara moodaanaki kira ufa qiaqa. Misa nariqa unna anutuna innaaru qidaqa tatufirana suqami mariana inniara naaqee qifaqa nee foora. ¹⁶ Inni faiqi namu mi anaamuru anaaseesa maraseeqa qini minnisee moo unna qira anutusara innaaru qifoora. Mi oosanafa qini qifusaa dapi nua aanaaseesara foora maridaqa.

¹⁷ Innee sia moo ainaina tasirisiri masee unna anutuna amana auqusee minara innaaru qiaqa.

18 Ooqai innee Abiba quqoonasaa Isipa maqasaaqari anusa mariafanoo. Minara Abiba quqoona anirainaaqa maqee maqee innee sia yis mari feemuna oomaqa sakasee maqee maqee naaqa. Dinni qisauku taikasee dinni oonu qaara marasee 7 faasaana mi oomaqana sakasee naaqa. Isipa maqasaaqari anu quqoonafa marinara miqiaqa. 19 Aiqama ainaina ooqasaa aanaaqi qinindi maridanoo. Innikina ooqasaa akoonaiqi maqainafa faqa aiqama maaqeenaa aandauqa ooqasaa akoona maqainafa faqa qinindi kai mariannoo. 20 Innee inni doonki aanaaqi ooqasaa maqarafa kaqi marianifee qimasee sipsipa aanaaqi mina amaaqa maqasee tatufirana suqa qimiaqa. Innee sia miqiaqa mina anuka kuridiaqa. Innee aiqama inneeqa ooqa faiqiuqa feefauru masaifaqa kafaa inniqaindi kiaqa. Sia moo fannoo tatufirana suqara ainaina sia uqirafa qini Yaaweesa qifusaa aniannoo.

21 Dinni taikasee dinni ani moodaa marasee 6 faasaanasaa inni ainainira faasaana maridanoo. Dinni ani qaara marasee 7 faasaanasaa sia ainainiaqa. Umaqira aukuanee aqira aukuanee anirainaaqa sia mi faasaanna ainainiaqa, idooaaqa.

22 Innee unakirana oosana arasee miqoo afi-ana nara oomaqa suqaaqa. Innee asumu aiqum quqara oomaqa faqa sakasee naidaqa mina auqu reeqa asumu aiqum quqara oomaqa fee qiaqa. 23 Moodaa aukuanaki qaarammoo kari aiqama Isaraee maqannaasa moodaaqoo suqufi qini Yaaweesa Isaraee maqannaasa Anutusa qimooqiaqa. 24 Qinee aanaamuru innee finnatinai

nifaqaseeqa misa maqa maaqa inni nimisee inni mi maqa maaqana firaanaikamma nisaanaqa innee aiqama aukwana qaaramoo kari moodaaqoo suqufi inneeqa Anutusa qini Yaaweesa qifusaa marifanoo sia moo aanaamuru aniree inni maqa maaqa mareefaranoo.

²⁵ Innee aanda arusee tatufirana suqa qimira-ree qimasee sia innooqeemari pauraqana nam-ufaqa feemu suqaaqa. Ainnaaqarara oomaqaki arusainna aandauna ataraasa fannoo sia akaqafa kaqi marinanoo faiqee iaqaani.

²⁶ Aiqama aukwana indaarugaa narana afiana nararee qinnana Yaaweena naree maree munu amiaqa. Innee sia mimmi fee sipsipafee arusee nari anoona naamma anoonannai suqaaqa.

²⁷ Yaaweefa mi ufanara Mooseena qimaminoo qinau. Anee aiqama maa ufausa akara rua. Maa ufausa qinee ani faqa Isaraee maqannaasa faqa moodaanaki qima afeekai kamma qaunna ufana oosana maridanoo. ²⁸ Miqi qimasoo fanoo Mooseefa aaqanasaa Yaaweena faqa kisaagasaa marinau. Qaara fasiqa niku nisauku taikasee 40 faasaana faqa eendaki faqa nammari faqa narana faqa sia neemarinau. Yaaweena moodaanaki kira sanda ufa ooni qarasaa akara rinau.

Mooseefa Sinai aaqanaindari quminau.

²⁹ Mooseefa Sinai aaqanaindari Yaaweena sanda ufa akara rira ooniqara uqirafa quminau. Mifa Yaaweena faqa ufa qiqiunara mina oori afri daroo daraa imarufanoo nari sia minara irinau. ³⁰ Aaroonafa Isaraee maqannaasa faqa Mooseena

oori afiri daroo daraa imaruna qafamaseeqa rufiida nianasaa mariqau. ³¹ Mooseefa misa nindafamaseenoo Aarona faqa faiqí firaasa faqa naarama quqasoofaqa aiqama aniroofanoo ufa qima niminau. ³² Adeedi aniroofanoo Yaaweefa Sinai aaqanasaa aiqama sandufa Mooseena qimamu ufana qimanniminau.

³³ Mooseefa qimannimi taikaseenoo karoo karoonaikira qamunna qumaree oorisaa rafaafaqafinau. Mina oori qafee rufieefoora miqinau. ³⁴ Mooseefa aqoosai kaqikaa uiqaana maqaki keeqafinoo qamunna uturuquseenoo Yaaweena faqa ufa qimarinau. Qimaseenoo madaanai raudamafinoo faiqí anaasee Yaaweefa qimamu ufana qima niminau. ³⁵ Qima nimi marufaqa misa mina oori qafoofanoo daroo daraa ufanoo Mooseefa narí oorisaa qamunannai ititaseenoo qima nimi taikaseenoo quandaki Yaaweena faqa ufa qiraree qimasee uiqaana maaqaki keeqafinoo kaifaa qamunna uturuqinau.

35

Idoora faasaanara qira sandufa.

¹ Mooseefa Isaraee maqannaa faiqí anaasee aiqama suquseenoo qima niminau. Yaaweefa inniara maa ufamau fuagee qidanoo. ² Qisauku dinni taikasee dinni ani moodaa marasee 6 faasaanasaa ainainiaqee qinoo. Dinni ani qaaraikinoo 7 qini firaa naaquqara idoora faasaana mariannoo. Faiqí moo fannoo mi faasaanna ainaininaqa innee mina kuqa aruaqa.

³ Innee sia Sabata faasaannasaa inneeqa maaqaki suqa naaqa.

Mooseefa Yaaweena uiqaana maqa usakara ainaina amiaqee qinau.

(Raf 25:1-9)

⁴ Mooseefa Isaraee maqannaa aiqama kafaa maaqi qimasee qimanniminau. Yaaweefa maaqi qimasee naamua qidanoo. ⁵ Innee Anutuna amiraree qimasee nifaaga asasinausa koora faqa siruaa faqa booroosa faqa maree aniaqa. ⁶ Amiqira qamunna faqa sipsipa asausi dirindaasi akirana faqa pannoona akirana faqa faeena akirana faqa mimmi asausinnai auqira qamunna faqa maree aniaqa. ⁷ Sipsipa akoona apata faeena akirana faqa ooruku nammarikinaa aandau apata faqa akasia saqari faqa maree aniaqa. ⁸ Qooma qumbi maria fadameena faqa amiqira afundi mari ainainna andaana rirana idaki adiasaafanoo adiafaa ira undi marina faqa mi ainainna kai nikiiqa amoondunna adiee maria fadameenaki quqarara faqa maree aniaqa. ⁹ Pupu ooniuqa faqa akaqa amiqira ooniuqa faqa aanaiqi kirausa uriqararaisa afisi maria eefooda qamunnanasaa faqa amuqusasaa ititara qamunna saa faqa quqeeffandinna oonisa maree aniaqa.

Mooseefa Anutuna uiqaana maqa kinaa ainaina auquaqera qimanniminau.

(Raf 39:32-43)

¹⁰ Inni kiqari oosana oosana ainaina auqarana akoofasauqa kai anireeqa Yaaweena uiqaana maaqaki ainaina mifa naamua qimaqaimau kai

auqaqa. ¹¹ Misa uiqaana maqa faqa mina rafaqafi maria qamunnana faqa mina anaanu faqa mi maqana usakara atunauqa faqa au-nirira saqari faqa oosuki faqa kooqiki faqa rakiqee fandinna saqarisa faqa saqari maqaki rakiqarana amaaqa auqirana faqa auquaqa. ¹² Moodaanaki kira bookisa faqa mina qaindusira saqari qara faqa mina afu faqa minasaa ititara qamunna faqa auquaqa. ¹³ Aiku faqaa qainda faqa mina aindusira saqari qara faqa minasaa quqee maria ainainna faqa auquaqa, Anutuna amifandinna feemuna faqa uquaqa. ¹⁴ Qooma saqari faqa mina qoomauqa faqa mina oosana oosana ainaina faqa mina qeemari fadameenna faqa auquaqa. ¹⁵ Afundi marina andaana rirana suqee maria qaidarana faqa mina qaindusi maria saqari qanda faqa faiqi nikiiqa amoon-dunna adieemaria fadameenna faqa afundima-rina andaana rirana faqa uiqaana maaqa kooqi qamunna faqa auquaqa. ¹⁶ Aandau tatufi-rana suqee maria qaidarana faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari auqara difaani faqa mina oosana faqa auquaqa. ¹⁷ Dapusaa diri maria qamunnana faqa dapu saqari faqa saqari ku-radee mariana oosana amaaqa auqiranauqa faqa dapu kooqiki keeqee maria qamunnana faqa auquaqa. ¹⁸ Kafaa dapu faqa uiqaana maaqa apupukauqa faqa mina rumbee maria sanda ainaina faqa auquaqa. ¹⁹ Aaroona idaaqira qamunna faqa mina faiqi namu qa-

munna faqa uiqaana maaqaki naaquqara oosiranaki aanaiqikira saika maraidaqa afisifandinna qamunnana faqa mi aiqama ainainna auquqa.

Faiqí anaasee Yaawee finnai oosana oosana ainaina maree aniqau.

²⁰ Mooseefa mi ufana qima nimisoofaqa faiqí anaasee irisee daraaniqau. ²¹ Nifaaqa اساسا mi ainainausa Yaaweena mini amisoofaqa mi ainainausannai Yaaweena uiqaana maqa usakaqau. Yaaweena amooqifandinna ainainausa faqa aanaiqikirausa afisifandinna qamunnausa auqifandinna ainainausa faqa maree aniqau. ²² Faiqí anaasee Yaaweena amirara nidimarusaa misa kai nifaaqa auqimaru ainainausa nikiiqa asaasi rumbee maru pinnana faqa naaqoo kinaa fidinaanu faqa nisaukuki quqee maru isaaqamana faqa ninukaki rufi maru kukukakana faqa oosana oosana ainaina nifaaqa auqi maruna koorannai auqiranauqa mini Yaaweena amidee qiqa mini quqaqau. ²³ Akaqausa amiqira qamunna maqeeusa faqa sipsipa asaasi dirindaasi akiranee pannoona akiranee faeena akiranee maqeeusa faqa mimmi asaasinnai auqira qamunna maqeeusa faqa sipsipa akoona apata faeena akirana maqeeusa faqa ooruku nammariki maru aandauna apata maqeeusa faqa maree aniqau. ²⁴ Siruaa faqa booroosa faqa Yaaweena amirara amanaikusa maree aniqau. Akaqausa akasia saqari Yaaweena uiqaana maqa usakarana amana maqeeusa maree aniqau. ²⁵ Akoofasa anaaseeuqa oosana oosana amiqira sanda sipsipa asaasinnai

dirindaasianda faqa faeenanda faqa pannoona ariranda faqa sufirana mini quqaqau. ²⁶ Misa mimmi asausinnai faqa sufimariqau. ²⁷ Faiqí firaasa aanaiqikirausa uriqarana qamunnasaa faqa amuqusasaa faqa quqaaqeera faraafana ooniuga faqa firaa feefaura aqimaru amiqira oonisa faqa maree aniqau. ²⁸ Kafaa misa adiafaa imaru ainainausa oosana oosana faqa qooma qumbi maru fadameennana faqa nikiqqa amoondunna adiee maru fadameennana faqa adiafaa ira afudimaru ainaina aindirirana idaki teeqimmasoofanoo adiafaa ira afundi maruna faqa maree aniqau. ²⁹ Israaee maqannaasa faiqí anaasee Yaaweena amirara nidimarusa Yaaweefa Mooseenara auqaanifeera aakapoo ainainausa maree aniqau.

Yaaweena uiqaana maqa usakaaqeera mara quqanau.

(Raf 31:1-11)

³⁰ Mooseefa kaifaa Israaee maqanna maaqi qimasee qima niminau. Yaaweefa faiqí moo mina auqu Beesareerana Urina amaaku Hurana anaíqi Yudana atikinaana mara quqeenoo. ³¹ Yaaweefa Beesareerana aiqama amiqira ainaina auqaanifeera narí maraquna afeeka umbiqa amaqeenoo. Aiqama ainaina auqirana akoofasaikirana faqa amanaikirana faqa oosana oosana ainaina amana auqira irirana faqa aminoo. ³² Yaaweefa Beesareerana oonu mafi irisee auqara irirana amisaifanoo mifa koorannai faqa siruaannai faqa boroosannai faqa oosana oosana ainaina

auqirana akoofasa maridanoo auquannoo.
³³ Kafa mifa amiqira ooni ateekeemaria
 irirana faqa koorannai mi oonina quqarana
 amaaqa auqira irirana faqa saqarisaa oosana
 oosana ainaina amana auqira irirana faqa
 amiqaifanoo auqaannoo. ³⁴ Ooqooriabana
 Aqisamakana amaaku Dannana oosanakinaana
 faqa Yaaweefa inniki quqaqaifanoo mifa faqa
 Beesareerana dadaaqianifeera maridanoo.
 Yaaweefa miqanda akaqausa uqannifiqaaqee
 irirana faqa niminoo. ³⁵ Yaaweefa oosana oosana
 ainaina nisaukunnai auqarana akoofasaikirana
 nimiqaifaqa maridaqa. Oonisaa akararirana
 faqa oosana oosana amiqira akara rira irirana
 faqa amiqira qamunna afundara irirana faqa
 sipsipa asaasi dirindaasi akiranannoo faqa
 pannoona akiranannoo faqa faena akiranannoo
 faa akaqa qamunna auqira irirana faqa niminoo.
 Nimsaifaqa miqanda oosana oosana ainaina
 auqira irirana akoofasa qara maridaqa.

36

¹ Mooseefa Isaraee maqannaasa qima nimitanoo qinau. Beesareerana faqa Ooqooriabana faqa miqanda dadaaqi marusa oosana oosana ainaina auqirana akoofasaikira irirana Yaaweefa nimiqaosa aiqama ainaina Yaaweefa naamua qundee kai masee naaquqara uiqaana maqa auqaqa.

Faiqi anaasee moomoo ainaina maree aniqau.

² Miqi qimaseenoo Mooseefa Beesareerana faqa Ooqooriabana faqa Yaaweefa aiqama

ainaina auqira irirana akoofasaikirana nimimaru fasiqausa faqa naarama quqaseenoo qimanniminau. Doo innee oosana arasee auqaaga. ³ Isaraee maqannaasa Yaaweena amideequu ainainausa mini soo fanoo Mooseefa mi ainainira fasiqausa nimufaqa auqimariqau. Faiqí anaasee eedoo qimasaida aiqama kananaana Anutuna amidee quu ainainausa kaqikai maraidaqa Mooseefunnai munu quqee mariqau. ⁴ Naaquqara maqa usakee marusa moomoo ainaina qafamasee nariqa ainainirana minnisee Moosee finnai oonuree qimamiqa qiqau. ⁵ Faiqí anaasee moomoo ainaina aabaa faqa maree anidammia. Yaaweefa maasara auqaqee qimaqaina amana minisee aabaa faqa minisaafannoo kaqi fifau mariannoo.

⁶ Mooseefa mina iriseenoo ufa quqasoofaqa aiqamausa qimannimiqa qiqau. Faiqí anaasee sia moo fannoo kafaa moo ainaina naaquqara uiqaana maqa usakaaqera maree aniaqa. Miqi qimasee qimanimufaqa faiqí anaasee mina iriseeqa sia kafaa maree aniqau. ⁷ Indaaru mini qoo ainainausa aiqama ainaina taikarana amana faqa fiqaramasee aabaa faqa maree aniqau.

*Misa Anutuna uiqaana maqa usakaqau.
(Raf 26:1-37)*

⁸ Irirana kaaqa fiqararausa kai indaaruqaa gamunna uiqaana maqasaa akirana auqiqau. Sipsipa asausi dirindaasi akirana faqa pannoona akirana faqa faena akirana faqa sufusee amiqira gamunna auqusee aqoosa faqaa aandau amana auqusee minasaa atooqasee akuniqau.

Miqimmaseeqa minauqannai qisaukuqara taikasee 10 firaa qamunna auqusee moodaanaki akuniqau. ⁹ Mi aiqama qamunnausa amana amana kai 12 metres kisaqa mina qusa 2 metres mariani. ¹⁰ Mi qamunnausa moodaannai qisauku 5 marasee ootupamasee akuniqau. Dinni qisauku taikasee 5 faqa miqikai iqau. ¹¹ Miqimmaseeqa mi qamunna qanda atiqara dirindaasi arira qamunnannai anaanu auqusee moodaanaki ootupaqau. ¹² Firaa qamunna ati mau anaanu 50 auqiqau. Moo qamunna faqa miqi kai iqa moo qamunna saa qaraa anaanu amummaqa kai auqiqau. ¹³ Koora qumaree turimmandee qusa tafara foora saaeemma qumaree dinni dinni anaanuki upeekasoofanoo mi qamunna qanda moodaaraa maqi inoo marinau.

¹⁴ Uiqaana maqasaa akira qamunna firaana mimmi asausinnai 11 auqiqau. ¹⁵ Misa aiqama moodaa karirana kai auqiqau. Mina kisaqa 13 metres amana marianoo mina qusa fanoo 2 metres amana marinau. ¹⁶ Mi qamunnausa moodaannai qisauku taikasee 5 qamunna akunusoofanoo moodaa qamunnaika mafinau. Kafaa moodaannai qisauku taikasee dinni ani moodaa marasee 6 narisaa narisaa akunusoofanoo firaanaikinau. ¹⁷ Qamunna atimau anaanu 50 akuniqau. Moo atimau faqa mina amummaqa kai akuniqau. ¹⁸ Booroosannai tafara foora ati saaeemmasee 50 auqusee minannoo dinni dinni anaanuki aususee ootupamasoofanoo moodaa qamunnara foora marinau. ¹⁹ Kafaa misa uiqaana maqa akuamaqara qa-

munna sipsipa akoona apata faeena akiranannai moo auqigau. Inaaqianna amuaaqa akirana ooruku nammarikinaa aandau apatannai auqirafa marinau.

²⁰ Misa akasia saqarinnai kai naaquqara uiqaana maqa atuna auqusee kuradaqau. ²¹ Maaqi mandee maaqa atuna auqigau. Saqari dinni dinni kuradarafa 4 metres marinau. Mina ausana qusa 66 centimetres amana kai auniriqau. ²² Aiqaama atuna maqaki rakiqaranara irisee ati ooqiqaaramasee ateekaqau. Aiqaama maaqa atuna miqi kaimasee ateekaqau. ²³ Misa suani afu ataaqeenni south kisaaqandanai maaqa atuna 20 narisaa narisaa apamandee kuradaqau. ²⁴ Maaqa atuna oosana sia maqaki kaqi rakiqau. Siruaannai amaaqa auqusee minaki kuradaqau. ²⁵ Misa uiqaana maqa suani dinni ataaqeenni north kisaaqandanai maaqa atuna 20 narisaa narisaa apamandee kuradaqau. ²⁶ Maaqa atuna sia maqaki kaqi rakiqau. Siruaannai 40 amaaqa auqusee minaki maaqa atuna kuradaqau. ²⁷ Suani keeqeemari qaannai west uiqaana maqa uruanatinai maaqa atuna dinni qisauku taikasee dinni ani moodaa marasee 6 narisaa narisaa apamandee auqigau. ²⁸ Maaqa dinni dinni munu raqaranaki kafaa qaaraqanda auqusee kuradaqau. ²⁹ Raudaranaki maaqa atuna oosanaki apammasee kuradama soofanoo amiqimasee narisaa narisaa apinoo marinau. Maaqa atuna rakiqarana oosanaki rumba atukarasee miqi kai mamaree mirinni murufi saqau. Dinni dinni munu raqaranaki miqi

kaimmiqau. ³⁰ Miqimmaseeqa maaqa atuna 8 oosanaki siruaannai qaaraqanda qaaraqanda amaaqa auqusoofanoo 16 marinau.

³¹⁻³² Misa aunirifandinnana akasia saqari 15 maraqau. Uiqaana maqa dinni dinni ataaqee faqa uruanai faqa faifa faifannoo auniruma-soofanoo maaqa atukarama qumaranau. ³³ Mi maaqa atunna aunirira saqari fannoo maaqa amana kai dinni dinni ati marinau. ³⁴ Maaqa atuna aiqama koorannai kai rafaqa fiqau. Maaqa atunamau aiqama koorannai kai anaanu mamaree fiqau. Aunirifandinna saqarisa faqa koorannoo mi anaanusaki rafaqa fiqau.

³⁵ Misa sipsipa asaasi dirindaasi akirana faqa pannoonna akirana faqa faena akirana faqa sufusee minannai amiqira qamunna auqiqau. Miqimmasee mi qamunnanasaa angiroo niqoosa faqaasa nimana auqiqau. ³⁶ Mi qamunnana dirianee qimasee qaara faqa qaara faqa 4 atuna akasia saqari ateeqasee koorannai rafaqafusee kuradaqau. Mina atimau koorannai qamunna dirifandinna anaanusa auqiqau. Mi saqarisa oosanaki siruannai amaaqa auqusee minakiaqa kuradaqau. ³⁷ Uiqaana maqa kooqiki ititeefandinna qamunnana sipsipa asaasi dirindaasi akirana faqa pannoonna akirana faqa faena akiranannai faqa marasee kooqiki dirifandinna amiqira qamunna auqiqau. Oosana oosana sandannai mooka maakira ainainauqa mi qamunnanasaa auqiqau. ³⁸ Mi qamunnana dirifandinnana moodaannai qisauku 5 akasia saqari marasee koorannai mina atimau rafaqafusee qamunna dirifandinnana

anaanu auqusee quqaqau. Mi atunnana qumaraanifeera koorannai saqari kukuqamasee atimau auniriqau. Miqimmasee booroosannai moodaannai qisauku 5 atuna oosana amaaqa auqusee minaki kuradaqau.

37

Innee moodaanaki kira ufa mari bookisana auquaqa.

(Raf 25:10-22)

¹ Beesarerafa nari dadaaqa marusa faqa akasia saqari marasee minannai moodaanaki kira bookisa auqiqau. Mina kisaaga 110 centimetres auqiqau. Mina qusandanai faqa mina kuradarafa faqa amana amana kai 66 centimetres amana auqiqau. ² Misa amiqira koora marasee turimmasoofanoo ausirumafuafaqau. ³ Misa koorannai qaindusi fandinnana amaaqa qaara faqa qaara faqa 4 auqusee aiqama aikusaa quqaqau. Dinni aikusaa qaara qanda dinni aikusaa qaara qanda quqaqau. ⁴ Misa akasia saqari qaindusi fandinna qanda koora turimmandee ausiruma qumaree minannai kukuqiqau. ⁵ Kukuqammaseeqa dinni dinni amaaqa auquqoonaki ausiqau.

⁶ Bookisa afu faqa koorannai kai auqiqau. Mina kisaaga 110 centimetres amana marinau, mina qusa 66 centimetres amana marinau. ⁷ Misa koora turimaseenoo bookisa afu auquseeqa minannai kai dinni dinni qangiroo qaaraqanda

nimana auqıqau. ⁸ Afu dinni atinni moo qangiroo amana auqusee dinni moo qangiroo amana auqıqau. Afu faqa mi qangiroo qanda nimana faqa moodaa koorannai kai auqıqau. ⁹ Mi qangiroo qanda bookisa afusaa quqasoofaqa noori narı qafee narı qafee iqa mariqau. Miqanda niqoosa uqeerasoofanoo bookisa afusaa ititanoo marinau.

Misa aiku faqaa teeboora auqusee Yaaweena amiraree qu feemuna miqoo quqaaqu.
(Raf 25:23-30)

¹⁰ Beesareerafa akasia saqarinnoo teeboora auqınau. Mina kisaaga 88 centimetres marinau. Mina qusa 44 centimetres marinau. Mina kuradarafa 66 centimetres marinau. ¹¹ Mifa amiqira kooraa marasee turimmasoofanoo ausiruma fufanoo minannai teeboora rafaaga fusee kafa moonnai teeboora atiqara fiqumma rafaaga finau. ¹² Mifa teeboora atiqara fiqumma 8 centimetres amana ititasee mina afaimau koorannai rafaaga fiqau. ¹³ Mifa koorannai qaindusifandinnana amaaqa 4 auqusee teeboora aiqama aiku namusaa quqanau. ¹⁴ Teeboora afai ameemaanandanai qaindusirana amaaqa auqınau. Mifa mi anaanusa afai ameemaanai ququseenoo atukaranau. Atukarasainaqa aindusira saqari minaki ausuaqeera atukuranau. ¹⁵ Mifa akasia saqari qaindusifandinna qanda koorannai kukuqınau. ¹⁶ Mifa amiqira koorannai kai teeboorasaa quqeeandinna pirita kaafausa faqa

kisaaqa kaafauqa faqa Yaaweena amifandinna uainna adiara pirita uqnaurirana faqa auqiqau.

*Misa qooma qumbifandinna aikana auqiqau.
(Raf 25:31-40)*

¹⁷ Misa qooma qumbira aika amiqira koorannai auqiqau. Misa koora turiiseeqa minannai kai qooma qumbira aika oosana faqa adaka faqa asaanauqa faqa auqiqau. Mi asaanausa saa mi koorannai kai taatuqee aqama afufeenaari marindee maseeqa kaafara foora afisu amaqaqau. ¹⁸ Mi qooma aikausa qisauku dinni taikasee dinni ani moodaa marasee 6 marinau. Dinni qaaramoo dinni qaaramoo marinau. ¹⁹ Aiqama mi asaana namuna atimau koorannai taatuqee aqama afufeenaari marindee masee afaaqa auqiqau. Mi afufeenaarirafa teeqnoorina aqamara foora marufaqa mi asaana namuna saa auqiqau. ²⁰ Mina adaka saa qaara faqa qaara faqa 4 saa taatuqee aqama teeqnoorina aqamara foora auqiqau. ²¹ Moodaa aqama indaaruaqa asaana qara ameemaanai marinau, kafa mina murufi asaana qara ameemaanai moo aqama marinau. Kafa mina murufi asaana qara ameemaanai moo marinau. ²² Amiqira koora turiiseeqa minannai kai qooma oosana faqa asaanauqa faqa afufeenaarirana faqa auqiqau.

²³ Misa amiqira koorannai qoomauqa dinni taikasee dinni ani qaara marasee 7 qooma auquseeqa mi asaanausa atimau quqaqau. Mina ufaqa faqa danda afaqee mariana faqa auqiqau.

²⁴ Qooma quqara aika amiqira koorannai 34 kilogram umaara amana kai marasee auqiqau.

Amiqira undimari munana suqara qainda auqiqau.

(Raf 30:1-5)

²⁵ Misa akasia saqari marasee amiqira afundi mari ida munana areefandinna aidarana auqiqau. Mi aidarafa dinni dinni amana kai marinau. Mina kisaagandanai 45 centimetres marinau. Mina qusandanai miqi kai inoo 45 centimetres marinau. Maqasaa qari ooru firafa 90 centimetres marinau. Mina qara qaara faqa qaara faqa ati moodaa saqarinnai kai burimakau aanaira foora auqiqau. ²⁶ Mina afu faqa aanai fooqaana faqa ataaqee qara faqa amiqira koorannai kai rafaagafusee koorannai mina fiqumma auqiqau. ²⁷ Koorannai qaaraqanda anaanu auqusee dinni moo dinni moo quqasoofanoo qaindusifandina saqarina atukaramma qumaranau. ²⁸ Mi qaindusira saqari qanda akasia saqarinnai auqusee koorannai rafaagafiqau. ²⁹ Misa naaquqara fadameenna Yaaweenaindi fee qimasee nikiiqa amoondunna adiee fandinnana auqiqau. Idaki quqasaafanoo adiafaa ira undimari pauraqara amiqira undimari fadameennara foora auqiqau.

38

Misa fadameena faqa pauraqa faqa amiqira ida muna undianifeera auqiqau.

(Raf 27:1-8)

¹ Beesareerafa akasia saqari marasee minan-nai tatufirana suqara qainda auqinau. Mina kisaagandanai faqa qusandanai faqa amana amanakai 2.2 metres marinau. Maqa saaqari kuradarafa qaara faqa qaara faqa 4 amana 1.3 metres marinau. ² Mina qaara faqa qaara faqa 4 atisaa aanaira foora auquqoofanoo marinau. Tatufira qainda moodaa saqari fannoo kai atimau faqa qambaanai faqa aanai faqa moodaa saqarinna kai auquqoofanoo marinau. Mi aiqama ainainausa booroosannai rafaafaq finau. ³ Mi tatufirana suqee maria qaindanasaa suqee maria ainainausa booroosannai kai auqinau. Danda afaqara futufitauqa faqa savoorauqa faqa uqnaurira piritauga faqa tafa fooqaa irana ati saae irana faqa ida qauni afaqee maria futufitauqa faqa aiqama booroosannai kai auqinau. ⁴ Mifa fukaasaana booroosannai auquseenoo tatufira bookisa aundurai kasaafaqi ooqeeqasee qambaanai quqanau. ⁵ Tatufira qainda atiqara anaanu qaara faqa qaara faqa 4 auquseeqa bookisa atiuqasaa rumbaqa. Misa aindusi fandinna saqari qanda upeekaageera rumbaqa. ⁶ Mifa akasia saqari tatufira qainda aindusi-fandinnana qaaraqanda maraseenoo booroosannai miqanda rafaafaq finau. ⁷ Mifa akasia saqari marasee anaanu auquqoonaki ausinau. Tatufira qainda indooira saqarinna kai aundura faqaana auqinau.

Firaa pirita nammari auqee fandinnana auqinau.

(Raf 30:18)

⁸ Uuqaana maqa kooqiki dadaaqa maru aanaaseesa nariqa booroosannai auquqoo tanukana Beesareerana amufanoo minannai nammari auqara difaanina faqa mina oosana faqa auqinau.

Yaaweena uuqaana maqa dapu auqu fiq u fiq u fiq u fiq u.

(Raf 27:9-19)

⁹ Amiqira sanda sufusee auquqaa qamunnanannoo uuqaana maqasaa ququsara foora auqu ititanau. Suani afu dinni ataaqeenni (south) mina kisaaga fannoo 44 metres marinau.

¹⁰ Mi qamunnana dirifandinnana booroosannai dapu 20 auqusee mina kuradeefandinnana amaaqa miqi kai masee 20 auquseeqa siruaannai tafara foora mina amana kai auqusee aunirifandinna saqarina faqa minannai kai auqiquau. ¹¹ Suani afu dinni ataaqeenni undee kai iqa dinni ataaqeenni faqa miqi kai miqau.

¹² Suani keeqee maru qaannai dapu qusandanai mina kisaaga 22 metres marinau. Mina dapu saqari 10 faqa mina amaaqa auqirafa faqa 10 kai marinau. Qamunna dirifandinnana tafarafoo iranauqa faqa aunirifandinna saqarisa faqa siruaannai kai auqiquau. ¹³ Suani oosana qaannai kooqi marutinai aqa uruanai inoo maruna amana kai 22 metres marinau. ¹⁴⁻¹⁵ Mi kooqina dinni dinni dirifandinna qamunnafa 6.6 metres marinau. Mi kooqina dinni dinni qaaramoo dapu faqa mina amaaqa faqa dinni dinni qaaramoo faqa mina amaaqa faqa marinau. ¹⁶ Aiqama qamunna dapusaa dirinoo

marufa amiqira qamunna kai auqirafa marinau. ¹⁷ Aiqaama dapu fiqfi fiqfi irafa siruaannai rafaafa fuqaa saqarinasaa ootupanoo marinau. Minasaa qamunna dirifandinnana tafara maqi iranauqa siruaannai kai auqifau. Mina dapu atimau faqa siruaannai kai rafaafa fiqfi. Mi saqarisa rakiqeebandinnana amaaqauqa booroosannai auqifau.

¹⁸ Kooqisaa ititara qamunna amiqirafa marinau. Misa sipsipa asaasi dirindaasi akirana faqa pannoona akirana faqa faena akiranannai faqa sufusee mi qamunnana auqifau. Auquseeqa amiqira sandannai oosana oosana ainaina amana auqifau. Mi qamunnana kisaafa fannoo 9 metres marinau. Mina qusa fannoo 2.2 metres marinau. Mi kooqina qamunna dapu rakiqarana amana kai marinau. ¹⁹ Misa mi qamunnana dapu saqari qaara faqa qaara faqa kooqiki rakiqaranasaa dirifau. Mi dapusa oosanaki booroosannai amaaqa auqusee minaki rakiqau. Mi dapusa ati rafaafaqirana faqa auni rumaqaa saqarisaa faqa tafara foora iranauqa faqa siruaannai kai auqifau. ²⁰ Uuqaana maqa atimau apupuka arifandinna aikausa booroosannai kai auqifau. Uuqaana maqa dapu rakiqarana qumaraaniffee qimasee apupuka aqoosai faqa afuqai faqa aruqaafa aiqama booroosannai auqira apupuka kai marinau.

Misa koora faqa siruaa faqa booroosa faqa marasee Yaaweena uuqaana maqaki minannai ainaini mariqau.

²¹ Yaaweena uiqaana maqaki qaara oonisaa qisaukuqara 10 sanda ufa akara rirafa marinau. Mi maqanaki ainaini maruna koora faqa siruaa faqa booroosa faqa marinau. Aanaiqikirana Aarona amaaku Itamarafa Reefina aiku asauku qimannimi marufaqa misa mi koora ainainausa asaana rumasee akara rimariqau.

²² Beesarerafa Urina amaaku Hurana anaiqi Yudana ati marufa mifa aiqama ainaina Yaaweefa Mooseena qimamundee kai masee auqinau. ²³ Mina dadaaqi marufa Ooqooriabafa marinau. Mifa Aasamakana amaaku Dannana ati marinau. Mifa oonisaa oosana oosana ainaina amana auqi marufa marinau. Mifa sipsipa asausi dirindaasi akiranannai faqa pannoona akiranannai faqa faena akiranannai faqa amiqira sanda sufusee amiqira qamunna auqimarufa marinau. Kafa mifa oosana oosana ainaina amana auqirana akoofasa marinau.

²⁴ Aiqaama koorauqa naaquqara uiqaana maqa usakarara Yaaweena amidee qufa mina ummaara uiqaana maqakinaa ainainauqa amana masee qafee maru sikeerana amana 998 kilogram maree aniqau.

²⁵⁻²⁶ Aiqaama fasiqauqa 20 aukwana faqaasa nuqu marasoofaqa misa nambaqa 603, 550 fasiqauqa takisa munnimma aqi mariqau. Mi takisana aqusoofaqa mi siruaana qumaree uiqaana maqa sikeerasaa diriseeqa qafuofanoo 3,430 kilograms marinau. ²⁷ Maaqa atuna oosana amaaqa auqirafa 100 marinau. Mi siruaana moodaanaki asaana rumasoofanoo 3,400 kilograms marinau. Naaquqara uiqaana

maaḳaki qamunna diri maru saḳarisa rakiḳarana amaaḳa faḳa maaḳa atuna rakiḳarana amaaḳa aiḳama moodaa moodaa 34 kilograms kai marinau. ²⁸ Miḳimmaseeqa akaḳa siruaa 30 kilograms amana kaḳi marunannoo aunirira saḳari faḳa atuna rakiḳarana ati mau faḳa qamunna dirirana tafara maḳi irana faḳa auḳiḳau.

²⁹ Yaaweena amu booroosana umaara fannoo 2,425 kilograms marinau. ³⁰ Mi booroosanannai Yaaweena uiḳaana maḳa kooḳiki saḳari rakiḳarana amaaḳauḳa auḳiḳau. Aandau taturifira qainda faḳa mina fukaa asaana faḳa minaki suḳee maru ainainausa faḳa minannai kai auḳinau. ³¹ Dapu saḳari rakiḳarana amaaḳauḳa faḳa kooḳi saḳari rakiḳarana amaaḳauḳa faḳa uiḳaana maaḳa apupukauḳa faḳa dapu fiḳu fiḳu irana apupukauḳa faḳa aiḳama mi booroosanannai kai auḳiḳau.

39

Aanaiqi kirausa qamunna auḳiḳau.

(Raf 28:1-14)

¹ Misa sipsipa asaasi dirindaasi akirana faḳa pannoona akirana faḳa faeena akirana faḳa marasee aanaiqikirausa naaḳuḳara oosiranaki ainainiaqeera amiḳira qamunna auḳiḳau. Aaroona aanaiqikira qamunna faḳa Yaaweefa Mooseena qimamundee masee auḳiḳau.

² Misa sipsipa asaasi dirindaasi akirana faḳa pannoona akirana faḳa faeena akirana faḳa koora sanda faḳa sufuseeqa eefooda qamunna

auqiqau. ³ Misa koora turiisoofoano adamanaika mafufaqa tiritandara foora aukiiseeqa sipsipa asausi dirindaasi akirana faqa pannoona akirana faqa faeena akirana namu faqa sufuseeqa amiqira qamunna auqiqau. ⁴ Eefooda qamunna anaanu qaaraqanda fannoo aururusaa aakandianinnana auqusee eefooda qamunnasaa dinni dinni rumbaqa. ⁵ Mina ooiganda ianinnana amiqira qamunnannai eefooda qamunna auqundee kai masee auqiqau. Mifa eefooda qamunnasaa akunirafa marinau. Yaaweefa Mooseena qimamundee kai iqau.

⁶ Eefooda anaanusaa akumaaga ooni qaaraqanda pupu ooni marasee dinni aanaanusaa moo dinni aanaanusaa moo quqasee Yakooboona faiqi namu qisaukuqara taikasee qikunni ooqu qaara marasee nuqu mi ooni qandasaa akara riqau. ⁷ Miqimmasee aururusaa eefooda qamunna aakandammasoofoano Yakooboona faiqi namu qisaukuqara taikasee qikunni ooqu qaara marasee 12 Isarae maqannaasa kikiqa usinoo marinau.

*Nimuqusasaa rumbara qamunna auqiqau.
(Raf 28:15-30)*

⁸ Eefooda qamunna auqu ainainausannoo kai amuqusasaa rumbara qamunna auquseeqa moodaa karira akara kai riqau. ⁹ Mi qamunnana tukaandasoofoano aiqama ati amana amana kai 22 centimetres marinau. ¹⁰ Misa ooni amiqirana firaa feefauru aqimariana kai marasee qaara faqa qaara faqaki mi qamunnanasaa padiqau. Indaaruaa padiranaki moo ooni auqu rubi faqa

moo ooni toopasa faqa moo ooni ganeeta faqa minamuna padiqau. ¹¹ Mina aanaaqianna padiranaki moo ooni auqu eemeerara faqa moo ooni auqu safairee faqa moo ooni auqu daimanna faqa minamunannai padiqau. ¹² Miqanda muqufi padiranaki moo ooni auqu teerakoisa faqa moo ooni auqu agatee faqa moo ooni auqu ameeetisa faqa minamunannai padiqau. ¹³ Inaaqiana atimau padiranaki moo ooni auqu beerira faqa moo ooni auqu kanirianna faqa moo ooni auqu yasapaa faqa minamunannai padiqau. Mi oonisa koorandannai amuqusasaa maru qamunnnasaa isooqa araqau. ¹⁴ Mi oonisa moodaa moodaa ooni fannoo Yakooboona faiqi namu qisaukuqara taikasee qikunni ooqu qaara marasee 12 Isaraee maqannaasa kikiqa usinoo marinau.

¹⁵ Misa nimuqusasaa rumberana aanaanu amiqira koorannai auqira sandannai seenandara foora auquseeqa moodaanaki quqasee afundasee dinni dinni ati saa qusiqau. ¹⁶ Koorannai anaanu qaara qanda auqusee amuqusasaa rufuaninna qamunnana mirinni atisaa qara qusiqau. ¹⁷ Qaaraqanda seenanda koorannoo afundaranannai mi anaanu qandaki qusiqau. ¹⁸ Mi sandana ati qarannai aururusaa koorandannai ooni isooqa aruqaanaki ootupaaqa. Miqimmasoofanoo aururusaa eefooda qamunnnasaa rumberanau. ¹⁹ Kafaa nimuqusasaa rufimariana anaanu qaara qanda koorannai auqusee aunduraindari atisaa mi anaanuna rumberasoofanoo eefooda qamunna mammaaqai marinau. ²⁰ Kafaa

qaaraqanda aanaanu koorannai auqusee afunni qumu maru eefooda qamunnasaa aqaasanai amiqira qamunnannai sufirana ooiqandi maruna aakaariqara rumbaqa. ²¹ Nimuqusasaa diri maria qamunnasaa anaanuki dirindaasiandannai sufira sanda usuaki eefooda qamunnasaa qaraa anaanuki ususee rumbaqa. Miqimmasoofanoo amuqusasaa ititara qamunna sia kasi kasinau. Yaaweefa Mooseena qimamundee kai iqau.

Innee akaqa qamunna aanaiqi kirausaindi auquaqa.

(Raf 28:31-43)

²² Misa eefooda qamunna meeaaqoo qaraana auqirara dirindaasi akira sipsipa asausinnai kai qamunna kisaaga auqiqau. ²³ Misa anuka amaaqa auqiqau. Qamunna raqandaammasee akunusoofanoo anuka upeekoofanoo sia anaqinau. ²⁴⁻²⁶ Mina ati mau raqandaammasee akunuseeqa saqari aqama faqa kaqikaa biru koorannai auqirana faqa mina atimau qusiqau. Dirindaasi akira sipsipa asausi faqa pannoona akiranannai faqa faena akiranannai mi saqari aqamana amana auqiqau. Auquseeqa mi saqari aqamana aaga koorannai auqira biru faqa qamunna atimau moo mafi quqee moo mafi quqee iqau.

²⁷⁻²⁹ Misa sipsipa asusi dirindaasi akirana faqa pannoona akirana faqa faena akirana faqa tirta uqanna namu faqa sufusee Aaroonna narí faiqinamu siutauqa faqa Aaroonna uriqarara qata faqa mina faiqinamu kaqikaa qatauqa faqa

auqìqau. Auqusee ooiqanda ianinnana minannai kai auquseeqa oosana oosana akarannoo afaaqa auqìqau. Miqimmaseeqa misa tarausisa tirità uqannannai auqìqau. Yaaweefa Mooseena qimamundee kai iqà aigama ainaina auqìqau.

³⁰ Misa amiqira koorannai niqinaaqa rumbeemaru doodapaaninara foora auqusee minasaa Anutunaindi fee qimasee akara rìqau.

³¹ Misa doodapaani dirindaasiandannai auqirana marasee qatasaa quqasee akuniqau. Yaaweefa Mooseena qimamundee kai iqau.

Doo aigama saika taikanau.

(Raf 35:10-19)

³² Miqimasee Yaaweena uiqaana maqa taikaqau. Isaraeena aiku asauku Yaaweefa Mooseena qimamundee kai aigama ainaina iqau. ³³ Misa uiqaana maqa faqa mina rafaqa fimaria qamunnana faqa mina anaanu faqa mi maqana usakara atunauqa faqa aunirira saqari faqa oosuki faqa kooqiki faqa rakiqee fandinna saqarisa faqa saqari maqaki rakiqarana amaaqa auqirana faqa maree Mooseefa marunnai munu quqaqau.

³⁴ Sipsipa akoona apata faeena akirana minannai uiqaana maqasaa akirana faqa ooruku nammarikinaa aandau apata uiqaana maqasaa akirana faqa kaaqa naaquqara oosiranaki ititara qamunna faqa maree munu quqaqau. ³⁵ Misa moodaaniki kira bookisa qaara ooni minaki maruna faqa mina afu faqa mina qaindusira saqari qara faqa maree munu Mooseefa unnai quqaqau. ³⁶ Misa aiku faqaa qainda faqa minasaa mari ainainausa

faqa Anutuna afusaa quqara feemu faqa maree munu quqaqau. ³⁷ Misa amiqira koorannai auqira qooma saqari faqa mina qoomauqa faqa mina oosana oosana ainainauqa faqa mi qoomausa fadameena faqa maree munu quqaqau. ³⁸ Koorannai auqira aidara faqa Yaaweenaindi fee qimasee utaaqama amaqaasee adia nimaqee maria fadameenna faqa afundi mari pauraqana faqa uiqaana maqaki kooqi ititara qamunna faqa maree munu quqaqau. ³⁹ Booroosannai auqira aidara faqa mina fukaa asaana booroosannai auqirana faqa mina qaindusira saqari qara faqa mina oosana oosana ainaina faqa nammari adiee maria difaanina faqa mina oosana faqa maree muna Mooseefa unnai quqaqau. ⁴⁰ Dapu qamunna faqa dapu faqa dapu oosana amaaqa auqirana faqa dapu kooqi qamunna faqa dapu sanda faqa apupuka faqa aiqama ainaina naaquqara uiqaana maaqa aundurai auqee maria ainainausa faqa maree munu Mooseena uqafiqaqau. ⁴¹ Minauqa munu uqafiqaseeqa Aarona naaquqara qamunna faqa nari faiqi namundi faqa naaquqara maqaki ainainidaqa afisifandinna qamunnana amiqirana munu Mooseena uqafiqaqau.

⁴² Isaree maqannaasa Yaaweefa Mooseena qimamundee kai masee aiqama ainaina auqaqau. ⁴³ Mooseefa aiqama ainaina aiququ masee qafamaseenoo Yaaweena irirana mau kai auqeeaafoo qimaseenoo amiqi amiqimma nimaqanau.

40

Uiqaana maqa usakasee Yaaweena utaaqama amaqaqa.

¹ Yaaweefa Mooseena qimaminoo qinau. ² Indaaruuqaa quqoonasaa indaaruuqaa faasaana innee qini naaquqara uiqaana maqa oosana arasee usakaqa. ³ Moodaanaki kira bookisaki qisauquqara taikasee 10 sanda ufa marina kaaqa naaquqara oosiranaki quqasee ititee fandinnana firaa qamunna marasee minasaa ititaqa. ⁴ Aikufaqa qainda maree mini quqaseeqa minasaa ainainifandinna ainainausa minasaa mini quqaaqa. Qooma saqari faqa mini quqaseeqa mina qoomauqa mina ati mau quqaaqa. ⁵ Quqaseeqa koorannai auqira aidara amiqira afundi mari pauraqana suqee mariana mareeqee maamiqoo oosiranaki moodaanaki kira bookisa amummaqa quqaaqa. Quqaseeqa kooqiki ititee maria qamunnana maraseeqa kooqiki diriaqa.

⁶ Qaidara firaana aandau tatufirana suqee mariana uiqaana maaqa kooqi amummaqa ququsaki quqaaqa. ⁷ Kafaa nammari difaani mareeqee maaqa kooqi dinni firaa qaidara dinni qambaana quqasee nammari adia umbiqaqa. ⁸ Ququsa dapu uiqaana maaqa aru fiqumma datimasee kooqiki qamunna diriaqa.

⁹ Yaaweefa Mooseena kafaa qimaminoo qinau. Qini naaquqara fadameena maraseenana uiqaana maaqa faqa minakinaa aiqama ainaina qini utaaqama qimaqaranasaa rurufa masainanoo naaquqanoo mariani.

¹⁰ Miqimmaseenana firaa aidara aandau tatufirana suqee mariana faqa minasaa qaraa ainainauqasaa faqa mi fadameenna rurufa masainanoo kaaqa naaquqanoo mariani.

¹¹ Nammari difaanisaa faqa mina oosanasaa faqa miqi kai iaqa.

¹² Miqi masee Aarona narí faiqi namu faqa nifiqamaree uiqaana maqa kooqiki munusainaqa nammari auqaqa.

¹³ Auqamasaiwana aanaiqikirausa qamunna marasee Aarona afisu amaqaasee qini utaaqama qimaqara fadameena akiiqa amoondunna rurufammasainanoo naaquqanoo maridanoo qini aanaiqikira saikaki mariani.

¹⁴ Mina faiqi namu nifiqee miniseenana aanaiqikirausa qamunna afisu nimaqaa.

¹⁵ Miqi maseenana Aarona ianandee inana mina faiqi namu faqa fadameena nikiiqa amoondunna rurufamma nimaqaa. Miqimmasainaqa qini aanaiqikira saikaki mariaqa. Mi fadameenafa misa naaruara qini aanaiqikira saikaki marirana nimiannoo.

¹⁶ Mooseefa aiqama ainaina Yaaweefa qimamundee kai masee auqanau.

¹⁷ Isipa maqa maaqa kiiqari anukari moo aukwana aiqarooafaqa moo aukwana indaaruuqaa uqoona mina indaaruuqaa faasaanasaa Yaaweena naaquqara uiqaana maaqa usakaqau.

¹⁸ Mooseefa qufaqa uiqaana maaqa atuna amaaqauqa maqaki quqaseeqa maaqa atuna minakiaqa kuradamasee ausana auni rumasee kooqindanai atuna faqa rakiqau.

¹⁹ Rakiqaseeqa indaaruuqaa qamunna qairi

akuseeqa mina amuaaqa qaaramoo mina rafaafufuanifeera qairi akiqau. Yaaweena ufamau kaimbiqau.

²⁰ Mooseefa sanda ufa akararira oonigara bookisaki quqaseenoo mina aindusira aikaqara anaanuki upeekaseenoo mina nifauara afu rafaafufinau. ²¹ Rafaafufuseenoo mi bookisana mareeqeenoo uiqaana maqaki quqaseenoo qamunna qumareenoo dirisoofanoo minasaa itita amaqaanau. Yaaweena ufamau kai miqinau.

²² Mooseefa aiku faqaa teeboora mareeqeenoo naaquqara oosiranaki suani afu dinni ataaqeeni North quqanau. ²³ Quqaseenoo mi teebooranasaa Yaaweena amiraree qu feemuna quqaqoofanoo marinau. Yaaweena ufamau kai finau.

²⁴ Miqi maseenoo Mooseefa qooma saqari uiqaana maqaki suani afu dinni ataaqeeni (South) maaqa atuna mammaaqai quqanau. Dinni taatatai aiku faqaa teeboora quqasee dinni taatatai qooma saqari quqanau.

²⁵ Yaaweefa qumi maru uiqaana maqanaki qooma saqari quqasee qumbisoofanoo qanau. Yaaweefa qimamundee kai inau. ²⁶ Miqi maseenoo Mooseefa koorannai auqira qaidara mareeqeenoo uiqaana maqa maamiqoo oosiranaki ititaqoo qamunnana aqa quqanau.

²⁷ Quqaseenoo mifa amiqira afundimaruna andaana rirana quqaseenoo idaranau. Yaaweena ufamau kai finau. ²⁸ Mifa uiqaana maqa kooqiki qamunna d irinau.

²⁹ Diriseenoo tatufirana suqee maru qaidarana uiqaana maqa kooqi amummaqa madaanai

quqanau. Quqaseenoo Mooseefa aandau tatufirana faqa sakuma fooqaa irana qaindi rirana faqa tatufinau. Yaaweena ufamau kai miqinau.

³⁰ Miqi maseenoo Mooseefa nammari difaani madaanai qaidara mianni marufanoo uiqaana maqa kooqi murunni marufanoo qambaana quqanau. Quqaseenoo nammari minaki adia qumbiqanau. ³¹ Mi nammarinaki Mooseefa faqa Aaroonafa narí faiqi namu faqa mi nammarinaki niku nisauku nammari uqi mariqau. ³² Misa uiqaana maqaki keeqararee qimasee fee tatufira qaidara aaqa firaree qimasee fee mi nammarinaki niku nisauku nammari uqusee fimariqau. Yaaweena ufamau kai miqi mariqau.

³³ Miqimma taikaseeqa Mooseefa qufaqa uiqaana maqa faqa firaa qaidara faqa ququsa dapu fiqumma rakiqaaqau. Rakiqaseeqa dapu kooqiki faqa qamunna ititaqau. Miqimmasee misa Mooseena faqa aiqama ainainirana taikaqau.

Qasuru fannoo Anutuna uiqaana maqa akiiqa amummaqa marinau.

(Namba 9:15-23)

³⁴ Miqi masoofanoo qasuru fannoo uiqaana maqa dukunimambufanoo Yaaweena kaaqa qara daroo daraa irafa uiqaana maqaki qumbiqa finau. ³⁵ Miqimmafunara Mooseefa sia uiqaana maqa keeqanau.

³⁶ Qasuru fannoo uqeeree fukari kai Isaraee maqannaasa nári uiqaana maqa faqa Yaaweena uiqaana maqa faqa aiqama ainaina faqa tatu

maree fiqau. ³⁷ Qasuru fannoo kaqi miqoo marufaqa misa faqa kaqi miqoo mariqau. ³⁸ Isaraee maqannaasa fida marufanoo qasuru fannoo aiqama faasaana Yaaweena uiqaana maqa aki-iaaqa marinau. Aiqama eendaki idauruara foora mina akiiaaqa marufaqa qafee mariqau. Miqinoo marufaqa fiiuufaqa Yaaweefa nimirree qu maqa maqaanaki oonu raqau.

**Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 11 Nov 2022 from source files dated 4 May 2021

4a891130-f25d-5e30-a81c-882b2e037698